

Ekwo Ndu Uke

Ngweja-akpo-oku

¹ Chipfu gbẹ l'ulo-ekwa-ndzukọ kua Mosisu oku bya epfuru yeru iya; sụ iya: ² “Waa opfu, ii-pfuru nụ unwu Ízurelu baa: Ọ -duru g'unu ha onye gude ngweja abya anụ Chipfu; g'onye ono jejekwa l'eka eswi; ọzoo aturu mę eghu iya dọru je akputa nanụ gude bya anụ iya.

³ “Ọ -buru onye bụ eswi bę o gude abya egweru mu ngweja-akpo-oku; g'onye ono kputakwa oke-eswi, adudu eka iphe mebyiru iya; bya anụ l'onu-abata ulo-ekwa-ndzukọ; k'ophu Chipfu a-natakwanụ iya. ⁴ G'onye ono byabę anụ ono, ọ nuru g'ọ buru ngweja-akpo-oku ono eka l'ishi. Aa-nata iya g'ọ nochia enya onye ono; buru iphe, ee-gude pfua ugwo iphe-eji, onye ono meshiru.

⁵ G'onye ono nọdu l'iphu Chipfu gbua oke-eswi ono. Unwu Eronu, bụ ndu-uke egude mee oke-eswi ono phephee ọru-ngweja mgburugburu; mbụ l'onu-abata ulo-ekwa-ndzukọ ono. ⁶ G'ọ swakwaa anụ ono akpo; bushia anụ iya iphiriba iphiriba. ⁷ Unwu Eronu ono, bụ onye uke ono abya akpobe oku l'ọru-ngweja ono; bya eworu nkụ doo byemubyemu l'oku ono. ⁸ Ndu uke ono, bụ iya bụ unwu Eronu ono abya eworu iphiriba iphiriba anụ ono; mękpoo ishi iya; yę eba iya doo lę nkụ ono, e doru l'oku ono, a kpoberu l'ọru-ngweja ono. ⁹ Iphe-epho iya; waa eka iya; mę

ọkpa iya bẹ onye ono e-gude mini saa asasa. E -mechaa; onye uke atuko iphemiphe ono kpoo ọku l'oru-ngweja ono; g'ọ buru ngweja-akpo-ọku; mbu ngweja, aakpo ọku anu Chipfu, mkpo iya du Chipfu ree.

¹⁰ “Ọ -buru l'onye obu bu egwu; ozoo aturu be o gude bya egwe ngweja-akpo-ọku; g'ọ bukwaru iphe, oo-wota bu okee ya, adudu eka iphe mebyiru iya. ¹¹ G'onye ono gha iphu l'uzo isheli woru iphe-ngweja ono gbua le mgbureku oru-ngweja ono l'atatiphu Chipfu. Unwu Eronu, bu ogbo-uke eworu mee anu ono phephee mgburugburu oru-ngweja ono. ¹² Onye ono eworu anu ngweja ono bushia iphiriba iphiriba. Onye uke abya achiru yele ishi iya; yee eba iya doo byemubyemu l'eli nku ono, no l'oku ono, a kpoberu l'oru-ngweja ono. ¹³ Iphe-epho iya; waa eka iya; yee okpa iya be onye ono e-gude mini saa asasa. Onye uke atuko iphemiphe ono kpoo ọku l'oru-ngweja ono; g'ọ buru ngweja-akpo-ọku; mbu ngweja, aakpo ọku anu Chipfu, mkpo iya du Chipfu ree.

¹⁴ “Ọ -buru l'oo iphe furu nku be onye obu gude bya egweru Chipfu ngweja-akpo-ọku obu; g'ọ bukwaru ndo; ozoo kparaka be oo-gude bya. ¹⁵ Onye uke anwuta iya bya l'oru-ngweja ono; bya aswi-bufu iya ishi woru iya kpoo ọku l'oru-ngweja onoya. L'ọ haa mee ya g'ọ lashia l'aguga oru-ngweja ono. ¹⁶ L'ọ bya achifuta iya okpanri; bya anmashia ya eba bya eworu iya wushi l'ibiya k'uzo enyanwu-awawa oru-ngweja ono; mbu l'uzo eka ono, aawushije ntu ono. ¹⁷ L'ọ gbẹ

lẹ òkù ẹnu ono lajaa ya ẹbo g'o gheru ọnu; ọle g'ọ tọ lajashì iya ẹbo g'ọ nọdu iche iche. Onye uke abya eworu iya kpọo ọku l'ọru-ngweja; mbụ l'eli nkụ ono, e doru l'eli iya ono; g'ọ bụru ngweja-akpọ-ọku; mbụ ngweja, aakpọ ọku anụ Chipfu, mkpọ iya dụ Chipfu ree.”

2

Ngweja-nri

¹ “Ọ -bụru onye gude ngweja-nri abya agwa Chipfu; g'onye ono gude ukpokutu iphe gude bya. L'ọ gbashì iya manụ; yekwa iya phọ ùnwù-isensu. ² O -mechaa ya nno l'o woru iya nù ùnwu Erọnu, bụ ndu-uke. G'onye uke woru ukpokutu iphe ọphu jiru mkpoji-ẹka a gbashiru manụ; bya eworu iphe, bụ ùnwù-isensu, e yeru iya kpọo ọku l'ọru-ngweja ono; g'ọ nọchia ẹnya ngweja-nri ono; g'ọ bụru iphe, aakpọ ọku anụ Chipfu, mkpọ iya dụ Chipfu ree. ³ Ngweja-nri ono ọphu ghuduru nù a-bụwaro kẹ Erọnu yẹ ùnwu iya. Ọ dụ nsọ shii kẹle o shi lẹ ngweja, aakpọ ọku anụ Chipfu.

⁴ “Teke ọ bụ ngweja-nri, e gheru lẹ ntụ-ọku bẹ i wotaru; g'ọ bụkwaru akara, e yeduru iphe, ekoje buredi, e meru l'ukpokutu witi, a gwọru lẹ manụ; odumeka l'ọ bụru ẹcha-mbekee, e yeduru iphe, ekoje buredi, a gwọru lẹ manụ. ⁵ Teke ọ bụ lẹ ngweja ngu bụ ngweja-nri ọphu e gheru lẹ mbeji; g'ọ bụkwaru ukpokutu ereshi, a gwọru lẹ manụ; mbụ ereshi, e yeduru iphe, ekoje buredi. ⁶ Gwepyaşia ya egwepyaşia; l'i

bya agbashì iya manù l'eli; kele ọ bụkwa ngweja-nri. ⁷ Teke ọ bụ lẹ ngweja ngu bụ ngweja-nri, e shiru l'ite; g'ọ bụkwaru ukpokutu ereshi, e yeru manù bẹ ii-gude mee ya. ⁸ Ọ bụru ngweja-nri, dughbaa egube ono bẹ unu e-gudeje byapfuta Chipfu. Teke e gwetarù iya bya anù onye uke; l'ọ gude iya bya l'ọru-ngweja ono. ⁹ Onye uke ono e-wota ọphu a-nọ-chi ẹnya ngweja ono je akpọo ọku l'ọru-ngweja; g'ọ bụru ngweja, aakpọ ọku anù Chipfu, mkpọ iya dū Chipfu ree. ¹⁰ Ngweja-nri ono ọphu phoduru nù bụwaa ke Eronu yee unwu iya. Ọ dū nsọ shii kele o shi lẹ ngweja, aakpọ ọku anù Chipfu.

¹¹ “G'ọ tọ dukwa ngweja-nri, unu gude abya agwa Chipfu, unu e-yeje iphe, ekoje buredi. Mbụ-a; g'ọ tọ dukwa iphe, e yeru iphe, ekoje buredi; ọzoo manù-ẹnwu, unu e-ye lẹ ngweja, unu akpọ ọku anù Chipfu. ¹² Unu e-yekọbeje iya lẹ ngweja akpuru mbụ, iphe, unu kọru l'opfu unu mītaru abya anù Chipfu. Obenu lẹ-a; g'a ta kpọkwa iya ọku l'ọru-ngweja g'ọ bụru ngweja, mkpọ iya dū Chipfu ree. ¹³ G'onye gude ngweja-nri abya agwa Chipfu yejekwa iya únú. Ọphu i kwejekwa g'únú ọgbandzu Chileke ngu ono ta adù lẹ ngweja-nri ngu. Mbụ-a; yejekwa únú l'iphe, bụkpoo ngweja, iigwekpọo egwegwe.

¹⁴ “Ọ -bụru l'unu gude akpuru mbụ, iphe, unu kọru l'opfu unu mītaru gude abya egweru Chipfu ngweja-nri; unu gbutakwa ishi ereshi, dukwadu oyii; hụa ahùhù gude gwee ngweja-nri ọbu; unu tsukwaa ya etsutsu. ¹⁵ Unu gbashikwa iya manù; yekwa iya phọ ùnwù-isensu; kele ọ

bukwa ngweja-nri. ¹⁶ G'onye uke hata nwophu a-nò-chi enya ngweja ono kpoo oku; mbu iphe, shi l'ereshi ono, e tsuru etsutsu gbashì iya manu ono; mekpoo iphe, bu unwu-isensu, e yeru iya. O buakwaa ngweja, aakpo oku anu Chipfu."

3

Ngweja-ehu-guu

¹ "O -buru onye gude ngweja-ehu-guu abya agwa Chipfu; o -buru oke-eswi; ozoo ne iya be o gude abya agwa Chipfu obu; g'onye ono gudekwa ophu adudu aka iphe mebyiru iya. ² G'onye ono woru aka byabe iphe ngweja ono l'ishi. O -mechaa nno l'o woru iya gbua l'onu-abata ulo-ekwa-ndzukò. E -gbuchaa ya; unwu Eronu, bu ndu-uke egude mee-iphe ono je ephephee oru-ngweja mgburugburu. ³ L'o gbè l'iphe ngweja-ehu-guu ono bota anu, aa-kpo oku nu Chipfu. Iphe, aa-bota bu eba, kwechiru iphe-epho iya; waa ophu nokota l'iphe-epho iya l'ophu. ⁴ L'o botakwapho akpuru iya ephenebo yekobe iya; waa eba, du iya nu, bu ophu no l'uzo ose iya. G'o tuko anya iya ephe l'akpuru iya ono bofuchaa. ⁵ G'unwu Eronu woru iya kpoo oku l'oru-ngweja l'eli ngweja-akpo-oku ono, no l'eli nku, e doru l'oku ono; g'o buru ngweja, aakpo oku anu Chipfu, mkpo iya du Chipfu ree.

⁶ "O -buru onye bu aturu; ozoo egbu be o gude abya anu Chipfu ngweja-ehu-guu; o -bu okee ya-o; ozoo nyee ya-o; g'o nukwa ophu adudu aka iphe mebyiru iya. ⁷ O -buru nwaturu be onye ono kpu bya anu ke ngweja obu; g'o

kpukwaru iya bya l'iphu Chipfu. ⁸ G'onye ono woru ẹka byabẹ iphe ngweja ono l'ishi; woru iya gbua l'ọnu-abata ọlo-ẹkwa-ndzukọ. E -mechaa; ọnwu Eronu egude mee anụ ono je ephephee ọru-ngweja mgburugburu. ⁹ Onye ono abya agbẹ l'anụ ngweja-ẹhu-guu ono buta anụ, ee-gude gweeru Chipfu ngweja, aa-kpọ ọku nụ iya. Ẹba iya g'ọ ha bẹ ee-hetagbu; ẹme l'a gbẹ lẹ mgboru ọkpu okpurukpu iya gbujita upfumọdzu iya l'ophu, bụ ẹka ẹba aduje ono. Ẹba, kwechiru iphe-ẹpho iya; waa ọphu nọkota l'iphe-ẹpho iya bẹ ee-hetafua. ¹⁰ L'ọ bọtakwapho àkpùrù iya ẹphenebo yekọbe iya; waa ẹba, dụ iya nụ, bụ ọphu nọ l'uzo ose iya. G'ọ tuko anya iya; ẹphe lẹ àkpùrù iya ono bọfuchaa. ¹¹ Onye uke ewota iya je akpọoru Chipfu ọku l'ọru-ngweja; kele ọ bụ nri; mbụ ngweja, aakpọ ọku anụ Chipfu.

¹² “Ọ -buru onye bụ egbu bẹ ọ kpụ bya egwe ngweja ọbu; g'onye ono kpụtakwa iya phọ bya l'iphu Chipfu. ¹³ G'onye ono wokwarupho ẹka byabẹ egbu ono l'ishi; woru iya gbua l'atatiphu ọlo-ẹkwa-ndzukọ. Ọnwu Eronu eworu mee ya je ephephee l'ọru-ngweja mgburugburu. ¹⁴ Iphe, oo-wofuta l'anụ ono gude gweeru Chipfu ngweja, aakpọ ọku bụ ẹba, kwechiru iphe-ẹpho iya; mẹ ọphu nọkota l'iphe-ẹpho iya. ¹⁵ L'ọ bọtakwapho àkpùrù iya ẹphenebo yekọbe iya; waa ẹba, dụ iya nụ, bụ ọphu nọ l'uzo ose iya. G'ọ tuko anya iya ẹphe l'àkpùrù iya ono bọfuchaa. ¹⁶ Onye uke ewota iya je akpọ ọku l'ọru-ngweja; g'ọ buru nri, e gweru ngweja, aakpọ ọku, mkpọ iya dụ Chipfu ree. Ẹba anụ l'ophu bụkota ke Chipfu.

17 Ekemu-a bu ekemu, a-nọ; e -shi l'ogbo sweru ogbo l'eka bukpo eka unu bu: Unu ta atajekwa eba-iphe; ozoo mee ya."

4

Ngweja-iphe-eji

1 Tɔbudu iya bu; Chipfu su Mosisu: 2 "Waa iphe, ii-pfuru ndu Izurelu baa: Teke o duru onye meru iphe-eji l'amagama; mee iphe, Chipfu turu ekemu su g'e te emeshi.

3 "O -buru onye uke, a wuru manu l'ishi meru iphe-eji obu; shi nno meta ikpe-anmanma kpua oha l'ophu; g'onye ono kpatakwa oke-eswi, adudu eka iphe mebyiru iya; gude bya ewotaru Chipfu g'o buru ngweja-iphe-eji k'iphe-eji ono, o meru ono. 4 G'onye ono kpata oke-eswi ono gude bya l'iphu Chipfu l'onu-abata ulo-ekwa-ndzuko. L'o woru eka byabe oke-eswi ono l'ishi; gbua ya l'iphu Chipfu l'eka ono. 5 G'onye uke ono, a wuru manu l'ishi ono haru meta mee oke-eswi ono gude bahu l'ime ulo-ekwa-ndzuko. 6 L'o tsee mkpushi-eka le mee ono phee mgbo esaa l'ataphu Chipfu; mbu l'ataphu eka ono, du nsọ ono. 7 Onye uke ono abya emetakwapho mee anu ono wuru ye le mpu pho, e mobegbaaru l'oru-ngweja unwu-isensu; mbu oru-ngweja ono, no l'ataphu Chipfu l'ulo-ekwa-ndzuko. L'o pata mee ophu phoduru nu je awuru ye l'okpali oru-ngweja eka eegweje ngweja-akpo-oku, no l'onu-abata ulo-ekwa-ndzuko.

⁸ “L’o bya eheshikota iphe, bu eba, du l’oke-eswi ono, e gude egwe ngweja-iphe-aji ono; mbu eba, kwechiru iphe-epho iya; mekpoo eba, kweru iphe-epho iya ono l’ophu. ⁹ L’o bya abofu iya akpuru iya ephenebo; bya eheshikota iya eba, du iya nu, bu ophu no l’uzo ose iya. G’o tuko anya iya; ephe l’akpuru iya ono bofuchaa. ¹⁰ Oo egube ono, eeheshije eba l’oke-eswi, e gude egwe ngweja-ehu-guu ono bu g’ee-heshikwapho owa. E -mechaa ya nno; onye uke ono ewota iya je akpo oku l’oru-ngweja eka eegweje ngweja-akpo-oku. ¹¹ Akpo oke-eswi ono; me anu iya l’ophu; je akpaa l’ishi iya; me eka iya; me okpa iya; waa iphe-epho iya; me nshi iya; ¹² mbu anu eswi ono g’o hakota be oo-gude lufu l’eka ndu Izurelu kpobegbaaru ulo-ekwa phe. G’o gude iya je l’eka e te merwushiduru emerwushi; mbu l’eka aawushije ntụ ono; je akpo ya oku l’eli ntụ ono.

¹³ “Teke o bu l’oo ndu Izurelu l’ophu meru iphe-aji l’amagama; shi nno mee iphe, Chipfu turu ekemu su g’e te emeshi; obeta o buru l’ephe ta amadu iphe, meru nu; be ikpe nmakwaru phe. ¹⁴ Teke o bukwanu l’iphe, ephe meru be ephe byaru amaru; ge ndu Izurelu kputakwa nwa oke-eswi gude bya l’iphu ulo-ekwa-ndzuko bya egweeru Chileke ngweja-iphe-aji ono. ¹⁵ Ge ndu bu ogerenya ndu Izurelu byabe oke-eswi ono eka l’ishi l’ataphu Chipfu; l’e woru nwa oke-eswi ono gbua l’eka ono. ¹⁶ G’onye uke, a wuru manu l’ishi meta mee oke-eswi ono gude bahu l’ulo-ekwa-ndzuko; ¹⁷ tsee mkpushi-eka le mee

anụ ono; phee mgbo ẹsaa l'atatiḡhu Chipfu; mbụ l'iphu ẹkwa ono.

¹⁸ “L'o metakwaphọ mee ono wụru ye lẹ mpu, e moberu l'ọru-ngweja; mbụ ọru-ngweja ono, nọ l'atatiḡhu Chipfu l'ulo-ẹkwa-ndzukọ ono. L'ọ pata mee ono ọphu phoduru nụ je awuru ye l'okpali ọru-ngweja ẹka eegweje ngweja-akpo-oku, bu ọphu nọ l'onu-abata ulo-ẹkwa-ndzukọ.

¹⁹ Ẹba anụ ono l'ọphu bẹ oo-heshikọta kpọo oku l'ọru-ngweja ono. ²⁰ Ọo ẹpho g'o meru oke-eswi ono, e gude gwee ngweja-iphe-ẹji ono bu g'oo-mekọta oke-eswi ọwa-a. Ọo ẹgube ono bu g'onye uke ono e-shi pfiaru pḡe ugwo iphe-ẹji ọbu, ẹphe meru ọbu; k'ọphu aa-gukwanuru pḡe nvu. ²¹ L'ọ pata anụ oke-eswi ono gude lufu l'azu ẹka ndu Ịzurelu kpobegbaaru ulo-ẹkwa pḡe je akpo oku g'a kporu oke-eswi k'ivuzọ phọ. Ono aburu ngweja-iphe-ẹji oha l'ọphu.

²² “Ọ -buru onye-ishi meru iphe-ẹji l'amagama; mbụ mee iphe, Chipfu, bu Chileke iya turu ekemu sụ g'e te emeshi; bẹ ikpe nmaakwaru onye ọbu. ²³ Ọ -buru l'iphe-ẹji ono, o meru bẹ e meru; ọ maru; iphe, oo-wota bu mkpi, adudu ẹka iphe mebyiru iya g'ọ buru ngweja iya.

²⁴ L'ọ byabẹ mkpi ono ẹka l'ishi woru iya gbua l'ẹka eegbuje anụ, e gude egwe ngweja-akpo-oku l'atatiḡhu Chipfu. Ọ kwa ngweja-iphe-ẹji bẹ ọ bu. ²⁵ G'onye uke tḡe mkpushi-ẹka lẹ mee anụ ono tee lẹ mpu, e mobegbaaru l'ọru-ngweja ẹka eegweje ngweja-akpo-oku. L'ọ bya eworu mee ono, phoduru nụ ono wuru ye l'okpali ọru-ngweja ọbu. ²⁶ Ẹba anụ ono l'ọphu bẹ oo-

heshikọta kpọo ọku l'ọru-ngweja; g'a kpọru kẹ ngweja-ẹhu-guu phọ. Onye uke eshi nno pfula ụgwọ iphe-ẹji ọbu, onye ono meru ọbu; g'eeshi nno gụkwanaaru onye ono nvu l'iphe-ẹji iya ọbu.

²⁷ “Ọ -buru l'ọ duru onye Ízurelu mmanu ọzo, meru iphe-ẹji l'amagama; mbu mee iphe, Chipfu turu ekemu su g'e te emeshi; be ikpe nmaakwaru onye ọbu. ²⁸ Ọ -buru l'iphe-ẹji ono, o meru ono be e meru; ọ maru; iphe, oo-wota bu nyee egbu, adudu eka iphe mebyiru iya; g'ọ buru ngweja k'iphe-ẹji ono, o meru ono. ²⁹ G'ọ byabe eka l'ishi anu ono; woru iya gbua l'eka eegbuje anu, e gude egwe ngweja-akpo-oku. ³⁰ G'onye uke tsee mkpushi-eka le mee anu ono tee le mpu, e mobegbaaru l'oru-ngweja eka eegweje ngweja-akpo-oku. L'ọ bya eworu mee ono, phoduru nu ono wuru ye l'okpali ọru-ngweja ọbu. ³¹ L'ọ bya eheshikọta eba, no l'anu ono; mbu egube ono, eemeje kẹ ngweja-ẹhu-guu ono. Onye uke akpọo ya ọku l'oru-ngweja; g'ọ buru ngweja, mkpọ iya du Chipfu ree; g'o shi nno pfula ụgwọ iphe-ẹji, onye ọbu meru; k'ophu aa-gukwanuru iya nvu.

³² “Teke ọ bu aturu be onye ono gude bya anunu kẹ ngweja-iphe-ẹji ọbu; g'onye ono gudekwa ada aturu, adudu eka iphe mebyiru iya. ³³ G'o wokwarupho eka byabe l'ishi anu ono; woru iya gbua; g'ọ buru ngweja-iphe-ẹji. Eka ọo-nodu gbua ya bu eka eegbuje anu, e gude egwe ngweja-akpo-oku. ³⁴ G'onye uke tsee mkpushi-eka le mee anu ono tee le mpu ono, e mobegbaaru l'oru-ngweja eka eegweje ngweja-akpo-oku. L'ọ bya eworu mee ono, phoduru nu

ono wuru ye l'okpali oru-ngweja obu. ³⁵ L'ọ bya eheshikọta ẹba, nọ l'anụ ono; mbụ ẹgube ono, eemeje ke ngweja-ẹhu-guu ono. Onye uke akpọo ya ọku l'oru-ngweja; g'ọ buru ngweja, mkpọ iya dụ Chipfu ree; g'o shi nno pfula ugwo iphe-ẹji, onye obu meru; k'ophu aa-gukwanuru iya nvu."

5

Iphe, bu nemadzu -mee ya; l'o gwee ngweja-iphe-ẹji

¹ "Ọ -buru le nemadzu meru iphe-ẹji; kele ọ humaru iphe, nwuru nu; ọzoo l'e meru ọ maru iphe, nwuru nu; a raaru iya oha arara g'onye humaru nu bya agbaa ekebe; ophu o jeduru agba ekebe obu; be ejo-iphe ono, o meru ono tukowaru onye ono l'ishi.

² "Ọzoo l'ọ duru onye denyiru ẹka l'iphe, aaso nsọ; mbụ l'iphe, dụ g'odzu anu-egbudu, aaso nsọ; ọzoo l'oo odzu iphe-edobe, aaso nsọ; ọzoo l'odzu iphe, akpu wuruwuru l'ali, aaso nsọ; be onye obu buakwaa onye aaso nsọ; m'obeta ophu ọ to madu l'o denyiru iya ẹka; be ọ buakwaa onye ikpe nmaru.

³ "Ọzoo l'o denyiru ẹka l'iphe, aaso nsọ, shi nemadzu l'ẹhu; g'iphe, aaso nsọ obu aduhabe, bu iphe, emeje ge nemadzu buru onye aaso nsọ; m'obeta ophu ọ madu l'o denyiru iya ẹka; be ọo-bukwaru onye ikpe nmaru me ọ maerupho.

⁴ "Onye ariduru iphe oriri; ọ pfu-bilihuẹpho rja angu su le ya e-me iphe; m'ọ bu iphe, dụ ree; m'ọ bu ejo iya; ọ to dukpodaa m'obeta ọ buru ẹgube gunu be onye obu riru angu ememe; l'ẹbe

o vuadaru ụzo rịa ya ọriri; bẹ ikpe nmaakwaru iya; m'ọ maerupho.

⁵ “Ọ -buru l'ọ duru onye meru iphe-a, a gushiru-a; shi nno mee; ikpe nma iya; g'onye ono pfukwaa iphe, o meru. ⁶ G'onye ono, mesweru nụ ono shi l'ẹka egwu iya mę aturu iya dọru; kpụta ada aturu; ọzoo ada egwu bya anụ Chipfu g'ọ buru ngweja-iphe-ẹji. Onye uke eshi nno pfula ụgwọ iphe-ẹji ọbu, onye ono meru ọbu.

⁷ “Ọ -buru l'ẹka onye ọbu te erwuduru lę nwaturu; l'o wotaru Chipfu ndo labọ; ọzoo kparaka labọ k'iphe-ẹji ono, o meru ono. Gę nanụ buru kę ngweja-iphe-ẹji; ọphuu aburu kę ngweja-akpọ-ọku. ⁸ G'onye ono chiru unwu-enu ono je achie onye uke. Onye uke ono evuru ụzo gwee ọphu bu ngweja-iphe-ẹji. Ọo-swikwo iya olu; ọle g'o to bufukwa iya ishi. ⁹ L'o meta mee ngweja-iphe-ẹji ono phee lę mgbureku ọru-ngweja ono; haa mee ya ọphu phoduru nụ g'ọ lwashia l'okpali ọru-ngweja ono. Ọ kwa ngweja-iphe-ẹji bę ọ bu. ¹⁰ L'ọ bya eworu enu k'ẹbo gwee ngweja-akpọ-ọku; mee ya g'eemeje iya; shi nno gude iya pfula ụgwọ iphe-ẹji, onye ọbu meru; l'a gwaru iya nvu.

¹¹ “Ole ọ -bukwanuru l'onye ono bę ta adudu ike gbata ndo labọ; ọzoo kparaka labọ; g'onye ono wota nkeru-iri nkweka ukpokutu ereshi; g'ọ buru ngweja-iphe-ẹji k'iphe-ẹji ono, o meru. G'o to yekwa iya manụ; ọphu o yekwa iya unwu-isensu; kęle ọo ngweja-iphe-ẹji bę ọ bu. ¹² G'onye ono gude iya wojeru onye uke. G'onye uke hata iya ọphu jiru mkpoji-ẹka g'ọ nọchia

enya ngweja ono; l'ọ kpọo ya ọku l'eli ọru-ngweja; l'eli ngweja, aakpọ ọku anụ Chipfu; kele ọo ngweja-iphe-ẹji. ¹³ Ọ bụru; e -mee ya nno; l'ọ bụru iya bụ l'onye uke apfua ụgwo iphe-ẹji, onye ọbu meshiru; l'a gwaru iya nvu. Iphe-ngweja ono ọphu phoduru nụ aburu k'onye uke ono; egube eemeje ke ngweja-nri ono.”

Ngweja-apfu-ugwo

¹⁴ Chipfu bya epfuru yeru Mosisu sụ iya: ¹⁵ “Ọ -duru onye mesweru iphe; mbụ l'o meru iphe-ẹji l'amagama; ọphu ọ nudururu Chipfu iphe, gbaru iya nụ; g'onye ono shi l'eka egbu iya me aturu iya doru; kputa ebili, adudu eka iphe mebyiru iya; bya anụ Chipfu g'ọ bụru ngweja-apfu-ugwo. G'e gudekwa erwa shekelu k'eze-ulo Chileke maru aswa ebili ono. Ọo ngweja-apfu-ugwo be ọ bụ.

¹⁶ G'onye ono mezia iphe ono, o mesweru ono; kele ọ to nudururu Chipfu iphe, gbaru iya nụ; l'o yekwakwa iya pho oke lanu l'uzo ise l'iphe ono; tuko iya chiru nụ onye uke. Onye uke ono egude ebili pho gwee ngweja-apfu-ugwo; shi nno pfua ugwo iphe-ẹji, onye ono meru; l'a gwaru iya nvu.

¹⁷ “Ọ -duru onye meru iphe-ẹji; mbụ l'o meru iphe, Chipfu turu ekemu sụ g'e te mejeshi; m'obeta ọphu ọ madu; be ikpe nmaakwaru iya; teme ejo-iphe ono tukoru onye ono l'ishi.

¹⁸ G'onye ono shi l'eka egbu iya me aturu iya doru; kpatakwa ebili, adudu eka iphe mebyiru ya; g'ọ bụru ngweja-apfu-ugwo. G'e gudekwa mkpola-ochaa k'eze-ulo Chileke maru aswa ebili ono. G'ọ nụ iya onye uke g'o gude iya pfua ugwo amagama ono, bụ iphe ono, o meru; ọphu ọ

madu ono; l'a gvaru iya nvu. ¹⁹ O kwa ngweja-ikpe-anmanma be o bu; kele ikpe nmaru onye ono l'iphu Chipfu.”

6

¹ Tɔbudu iya bu; Chipfu bya epfuru yeru Mosisu su iya: ² “O -duru onye meru iphe-aji; shi nno meswee Chipfu; mbu l'o dzuru nemadzu ibiya aka l'iphe, a nuru iya su g'o dobe; ozoo g'o leta enya; ozoo l'o naru nwibe iya nfu; ozoo l'o riru nwibe iya urwu; ³ ozoo l'o turutaru iphe, tuphahuru etuphahu; ophu o kwedu le ya humaru iya; ozoo l'onye ono kpapyaberu iphe, o meru gua enwa; ozoo l'onye ono meru iphe, dugbaa egube ono; shi nno mee iphe-aji; ⁴ onye ono, meru iphe-aji ono; shi nno meta iphe, ikpe nmaru iya; bu iphe, oo-me bu g'o wolata iphe, o nataru le nfu; m'o bu ophu o ritaru l'urwu; m'o bu ophu a nuru iya g'o leta enya; o ria ya; m'o bu iphe onye ozo, tuphahuru nu; o turuta iya; ⁵ m'o bu iphe, dugbaa egube ono, o meru; o kpapyabe iya gua enwa. G'onye ono pfukwaa ugwo iphe ono g'o ha; teme l'o wotafua ophu ha g'e kee iphe ono uzo ise; tukobe iya woru nu onye nwe iphe ono. Mboku, oo-tuko iphemiphe ono nu bu mboku ono, oo-gude ngweja-apfu-ugwo gude bya anu ono. ⁶ Ngweja-apfu-ugwo, oo-gweru Chipfu be oo-wotaru onye uke. G'o shi l'eka eghu iya me aturu iya doru kpata ebili, adudu aka iphe mebyiru iya. G'e gudekwa mkpola-ochaa k'eze-ulo Chileke maru aswa ebili ono. ⁷ Onye uke ono eshi egube ono nodu l'ataphu Chipfu pfua ugwo iphe-aji, onye ono meru; l'a gukotaru

iya nvu l'iphemiphe ono, o meru; ikpe iya nmaru iya ono.”

Ngweja-akpo-oku

⁸ Noo ya; Chipfu bya epfuru yeru Mosisu su iya: ⁹ “Waa ekemu ii-turu Eronu yee unwu iya bu owa: Ekemu owa-a bu ke ngweja-akpo-oku be a tu-doru iya su: Ge ngweja-akpo-oku nokotajekwa l'oku, du l'oru-ngweja enyashi ophu; jasu ge nchi bohu. Oku, no l'oru-ngweja ono enwue ya pho l'eli. ¹⁰ Teke orwuru l'utsu; g'onye uke ono chita uwe iya ono yee; mbu uwe ono, e meru l'oghu ocha ono. Lo chitakwapho nwiba pho yeada l'ime ehu. Lo bya ekpota ntụ, shi le ngweja-akpo-oku ono, bu ophu oku kepyashiru l'oru-ngweja ono; je asube le mgbureku oru-ngweja ono. ¹¹ Lo bya eyefu uwe iya ono; bya achita uwe ozo yee; pata ntụ ono lufu l'azu eka ndu Izurelu kpobegbaaru ulo-ekwa phe; je asube l'eka e merwuduru emerwu. ¹² G'oku ono, no l'oru-ngweja ono nwuekwapho g'oonwu l'eli iya; g'e te menyikwa iya emenyi. G'onye uke yejekwa iya nkụ l'utsu mbokumboku. Lo bya eworu anu ngweja-akpo-oku doo giriri l'eli iya; lo kpokwapho eba, shi l'anu ngweja-ehu-guu oku l'eli iya. ¹³ G'oku ono nwujeepho l'eli oru-ngweja ono mkpurumkpuru; g'o to nyihujekwa anyihu.”

Ngweja-nri

¹⁴ “Waa ekemu le g'ee-gudeje egwe ngweja-nri baa: Oo unwu Eronu a-noduje l'iphu Chipfu gwee ngweja ono; l'iphu oru-ngweja ono.

15 G'onye uke hata ukpokutu ereshi ono, a gwọru lẹ manụ ono ọphu jiru mkpoji-ẹka; wotakwaphọ iphe, bụ ụnwù-isensu, e yeru lẹ ngweja-nri ono; je akpọo ọku l'ọru-ngweja ono g'ọ nọchia ọnya ngweja ono; buru ngweja, mkpọ iya dụ Chipfu ree. 16 E -mechaa; gẹ Erọnu yẹe ụnwu iya ria ọphu ghuduru nụ; ọle g'ẹphe te eyekwa iya iphe, ekoje buredi; tẹme g'ẹka ẹphe a-nọdu ria ya bukwaru ẹka dụ nsọ. G'ẹphe nọdukwa l'oma-unuphu ụlo-ẹkwa-ndzukọ ria ya. 17 G'e te eyekọbejekwa iya iphe, ekoje buredi; mẹ a -nọdu eghe iya. Ono bẹ mu nuru phẹ g'ọ buru oke iya nkephe lẹ ngweja, aakpọ ọku ono. Ọ kakọta nsọ gẹ kẹ ngweja-iphe-ẹji; waa kẹ ngweja-apfụ-ugwo. 18 Onyemonye, bụ nwoke l'oshilọkpa Erọnu bẹ e-rije iya nụ. Ọ buru g'ee-meje iya bụ ono jasụ l'ojejoje l'ogbo unu; mbụ g'ee-meje iphe, bukpo ngweja, aakpọ ọku anụ Chipfu. Onyemonye, denyiru ẹka lẹ ngweja ono a-dụkwa nsọ."

19 Tọbudu iya bụ; Chipfu bya epfuru yeru Mosisu sụ iya: 20 "Ọwa-a bụ ngweja, oshilọkpa Erọnu e-gudeje gweeru Chipfu mbọku, a wuru iya manụ l'ishi: Iphe, ẹphe e-gudeje bụ nkeru-iri nkweka ukpokutu ereshi; g'ọ buru ngweja-nri ono, eegweje mkpurumkpuru ono. Nkerẹbo iya bẹ ee-gwe l'utsu; nkeru-ẹbo iya ọphuu buru l'uzenyashi. 21 G'e ye iya lẹ mbeji; gwọo ya lẹ manụ ree; woru iya ghee egheghe pabata. L'ị bya eworu iya gwepnyashia egwepnyashi; gude bya egweeru Chipfu; g'ọ buru ngweja-nri, mkpọ iya dụ Chipfu ree. 22 Ọ buru onye ono, bụ oshilọkpa Erọnu ono, a wuru manụ g'ọ nọchia

enya iya buru onye uke ono be e-gwe ngweja ono l'onwiya. Iphe ono bu iphe, a toru okpa iya g'e meje iya jasu l'ojejoje. G'a kpokotajekwa iya oku g'o ha. ²³ Mbụ l'iphe, bukpo ngweja-nri, onye uke gweru be aa-kpo oku l'ophu; g'e te rikwa iya eriri."

Ngweja-iphe-eji

²⁴ Tɔbudu iya bu; Chipfu bya epfuru yeru Mosisu su iya: ²⁵ "Waa iphe, ii-pfuru yeru Erɔnu yee unwu iya baa: Owaa bu ekemu ke ngweja-iphe-eji. Oo l'eka ono, eegbuje anu e gude egwe ngweja-akpo-oku ono bukwapho eka ee-gbuje anu, e gude egwe ngweja-iphe-eji; mbu l'aanoduje l'atatiphu Chipfu gbua anu obu. O kwa ngweja, du nsɔ shii be o bu. ²⁶ G'onye uke, bu iya gweru ngweja-iphe-eji ono rikwaa ya. Oo l'eka du nsɔ be oo-nodu ria ya. Eka oo-nodu ria ya bu l'oma-unuphu ulo-ekwa-ndzuko. ²⁷ Onyemonye, denyiru eka l'anu ono a-dukwa nsɔ. O -buru le mee anu ono daru l'uwe; g'a nodukwa l'eka du nsɔ saa uwe obu. ²⁸ O -buru ite, a kpuru l'urwa be e gude shia anu ono; g'a tukpokwaa ite ono; teke o bu ite-igwe; g'e huchakwaa ya ehucha; teme l'a saa ya asasa. ²⁹ Ndu bu nwoke le ndibe onye uke g'ephe ha l'e-rikota iya. O kwa ngweja, du nsɔ shii be o bu. ³⁰ Ole-a; g'e te rikwa anu ngweja-iphe-eji, bu ophu e gude mee ya woba l'ulo-ekwa-ndzuko g'e gude pfua ugwo iphe-eji l'eka-du-nsɔ. G'a kpokotakwa iya oku."

7

Ngweja-apfu-ugwo

1 “Owaa bu ekemu ke ngweja-apfu-ugwo. O kwa iya bu ngweja, du nsọ shii. 2 Oo l’eka eegbuje anu, e gude egwe ngweja-akpo-oku be ee-gbuje anu, e gude egwe ngweja-apfu-ugwo. L’e pheaphee mee ya l’oru-ngweja mgburugburu. 3 Eba anu ono l’ophu be ee-gude gwekotaru Chileke; mbu eba, shi l’upfumodzu iya; me ophu kwechiru iphe-epho iya; 4 waa akpuru iya ephebebo; yee ebà, no l’uzo ose iya; waa anya iya be aa-tuko yee akpuru iya pho wota. 5 G’onye uke tukokwa iya kpoo oku l’oru-ngweja; g’o buru ngweja, aakpo oku anu Chipfu. O kwa ngweja-apfu-ugwo be o bu. 6 Iphe, bukpo onye bu nwoke le ndu bu uke l’e-rije iya. O buru l’eka du nsọ be aa-noduje ria ya; noo kele o bu ngweja, du nsọ shii.

7 “G’o bukwarupho egube ono, a turu onu g’e meje iphe ngweja-iphe-iji ono bu g’ee-meje ke ngweja-onye-ikpe-nmaru. O buru onye uke, gude iya apfu ugwo iphe-iji ono be e-nweru iya nu. 8 O buru onye uke, gweru nemadzu ngweja-akpo-oku be e-nworu akpo iya. 9 Iphe, bu ngweja-nri, e gheru le ntụ-oku; ozoo ophu e shiru l’ite; ozoo ophu e gheru le mbeji bukwa onye uke, gweru iya nu nwe iya. 10 Teme iphe, bukpo ngweja-nri ophu a gworu le manu; me k’okponku; tukokwarupho bukotaru k’unwu Eronu g’ephe ha. G’ephe kejekwa iya enya nhamunha.”

Ngweja-ehu-guu

11 “Owaa bu ekemu ke ngweja-ehu-guu, nemadzu gude bya anu Chipfu. 12 O -buru l’onye

ọbu anụ iya g'ọ gude iya kele Chipfu ekele; ọ́ iphe, onye ono e-gude tso ru iphe ngweja ono bu akara, a gwọ́ru ọ́ manụ; ọ́ phu e yeduru iya iphe, ekoje buredi; waa ẹcha-mbekee, e meru manụ; ọ́ phu e yeduru iya iphe, ekoje buredi; waa akara, e meru l'ukpokutu ereshi, a gwọ́ru ọ́ manụ rengurengu. ¹³ Iphe oo-gweru yekobe ọ́ ngweja-ẹhu-guu ono, o gude ekele Chipfu ono bu akara, e yekoberu iphe ekoje buredi. ¹⁴ L'ooshije ọ́ ngweja ono wota ngguru akara lanu l'iphe ngweja ono iche iche woru gwee g'ọ́ buru ngweja, e gweru nu Chipfu. Ọ́ buru onye e-ri iya nu bu onye uke ono, pheru mee ngweja-ẹhu-guu pho. ¹⁵ Anu ngweja-ẹhu-guu ono, o gude bya ekele Chipfu ekele ono be aa-takota ọ́ mboku, a nuru iya Chipfu. G'ọ́ to dukwa ọ́ phu aa-ha g'ọ́ kwaa akwakwa futu utsu.

¹⁶ “Ole ọ́ -bukwanuru ọ́ ngweja onye ọ́ bu bu ngweja, o gude eme iphe, o riburu angu ememe; ọ́ zoo ngweja, ọ́ turu obu iya onyo abya egwegwe; l'a taa anu ono mboku, a nuru iya. Ọ́ -buru l'a ta tagbuduru iya; g'a tafufua ya ọ́ nchitabohu iya. ¹⁷ Teke ọ́ bu l'ọ́ phodukwarupho ọ́ mboku k'eto; g'a kpoo ya oku. ¹⁸ Ọ́ -buru l'ọ́ duru anu ngweja-ẹhu-guu ono ọ́ phu a taru ọ́ mboku k'eto be aa-jikakwa ngweja ọ́ bu; ọ́ phu aaguduru iya eyeru onye gweru iya nu. Ọ́ -buru ẹbyi be o meru; teme onye rikwanuru iya nu be ejo-iphe, o meru a-tu-koru l'ishi.

¹⁹ “Anu ono ọ́ phu rwuru l'iphe, aaso nsọ; g'a ta takwa iya atata; g'e wokwaru iya kpoo oku. Ọ́ ọ́ -bukwanuru l'oo anu ọ́ zo; g'onye a ta sodu nsọ taa ya. ²⁰ Ọ́ -duru onye aaso nsọ, taru anu

ngweja-ẹhu-guu ke Chipfu; g'e bufukwa iya le ndu nkiya. ²¹ O -bukwarupho l'ọ duru onye denyiru ẹka l'iphe, aasọ nsọ; ọ du g'iphe, aasọ nsọ, shi nemadzu l'ẹhu; ọzoo anu, aasọ nsọ; ọzoo iphe ọzo, bugbaa iphe, aasọ nsọ; o -mechaa bya ataa anu ono, e gude gweeru Chipfu ngweja-ẹhu-guu ono; g'e bufukwa onye obu le ndu nkiya.”

²² Tọbudu iya bu; Chipfu bya epfuru yeru Mosisu su iya: ²³ “Pfuaru ndu Izurelu su phe-a: Unu ta adukwa ẹba iphe, unu a-taje, du g'ẹba eswi; ọzoo ẹba aturu; ọzoo ẹba eghe. ²⁴ Teke o bu ẹba-anu, nwuhuru l'onwiya; ọzoo ophu anu-egbudu gburu be o -du unu ree; unu gudejekwa iya mee iphe; ọle g'unu ba tsokwa iya onu. ²⁵ Iphe, bu onye taru ẹba-anu, e gude gwee ngweja, aakpo oku anu Chipfu; g'e bufukwa iya le ndu nkiya. ²⁶ Obetakpo unu laa awe je eburu; unu te erijekwa mee-iphe; mbu mee enu; ọzoo mee anu. ²⁷ Onye riru mee-iphe; unu bufukwa onye ono le ndu nkiya.”

²⁸ Tọbudu iya bu; Chipfu bya epfuru yeru Mosisu su iya: ²⁹ “Pfuaru ndu Izurelu su phe-a: Onye gude ngweja-ẹhu-guu abya egweru nu Chipfu; g'o wotakwa ẹka iya ophu rwuberu Chipfu gweeru iya; ³⁰ mbu g'o gude ẹka iya wota ngweja, aa-kpo oku nu Chipfu. L'o wota ẹba iya; waa ndu iya bya anu Chipfu; woru ndu iya ono maa amama l'iphu Chipfu g'o buru ngweja-amama. ³¹ Onye uke ewota ẹba iya ono kpo oku l'oru-ngweja. Ọle ndu iya bu ke Eronu yee unwu iya. ³² G'unu kwata utapfu okpa ẹkutara anu ngweja-ẹhu-guu unu ono woru nu

onye uke ono g'ò buru utu, a turu iya. ³³ Ụnwu Erọnu onye ọp̄hu gude mee anụ ono; yee ẹba iya je egwee ngweja-ẹhu-guu ọbu bẹ aa-nụ ụtapfu ọkpa ẹkutara iya ono g'ò buru oke iya nkiya; ³⁴ kele mu shiwaa lẹ ngweja-ẹhu-guu ono, ndu Ízurelu egwejeru nụ mu ono wota òdú iya ono, aamajẹ amama ono; yee ụtapfu iya ono, a turu l'utu ono; woru nụ Erọnu yee ụnwu iya; g'ò buru okiphe, ẹphe e-ketajẹ l'ẹka ndu Ízurelu jasụ l'ojejoje. ³⁵ Ọwaa bụ okiphe, shi lẹ ngweja, aakpoje ọku anụ Chipfu, bụ ọp̄hu e doberu g'a nujẹ Erọnu yee ụnwu iya; eshi mbọku, a hofutaru phẹ iche; g'ẹphe buru ndu-uke jejeru Chipfu ozi. ³⁶ Mbọku ono, a wuru phẹ manụ l'ishi ono bẹ Chipfu turu ekemu sụ gẹ ndu Ízurelu nujẹ phẹ ẹka ono g'ò buru okiphe phẹ; teme ọ bukwarupho g'aa-nujẹ iya ụnwu phẹ bụ ono; e-shi l'ogbo sweru ogbo jasụ l'ojejoje.”

³⁷ Ọo ekemu-a bẹ ee-tsoje mẹ a -nọdu egwe ngweja-akpo-ọku; waa ngweja-nri; waa ngweja-iphẹ-ẹji; waa ngweja-apfu-ugwo; waa ngweja, e gude eme nemadzụ g'ò buru onye uke; waa ngweja-ẹhu-guu; ³⁸ bụ iya bụ ekemu ono, Chipfu turu nụ Mósisu l'úbvú Sayinayi lẹ mbọku ono, ọ suru gẹ ndu Ízurelu wotaru yẹbe Chipfu ngweja l'echięgu Sayinayi ono.

8

Edobe ndu-uke nsọ (Awụ 29:1-37)

¹ Tọbudu iya bụ; Chipfu bya epfuru yeru Mósisu; sụ iya: ² “Duta Erọnu yee ụnwu iya; l'ì

chịta uwe ndu-uke ono; bya ewota manụ awụ l'ishi ono; l'ị kpụta oke-eswi ono, ee-gude gwee ngweja-iphe-iji ono; waa ebili labo ono; bya apata nkata buredi ono, e yeduru iphe, ekoje buredi ono. ³ L'ị bya ekuko ndu Ízurelu g'ephe ha g'ephe dzukobe l'onu-abata ụlo-ekwa-ndzuko."

⁴ Tọbudu iya bụ; Mosisu bya emekota gẹ Chipfu ziru iya g'o mee; ndu Ízurelu bya edzukobe l'onu-abata ụlo-ekwa-ndzuko.

⁵ Mosisu bya asụ ndu Ízurelu ono: "Wakwa iphe, Chipfu sụru g'e mee baa."

⁶ Mosisu bya eduta Eronu; yee unwu iya lufuta; bya egude mini wua phẹ ehu. ⁷ O wota uwe ime-ehu ono yee Eronu; bya egude ekwa-atu-buta-l'upfu ono kebuta iya. O bya ewota uwe mgbalanụ ono yepyabẹ iya; bya ewota uwe-ukuvu ono yechite l'uwe mgbalanụ ono; gude werere ekwa ono, ee-gude tu-buta uwe-ukuvu ono l'upfu ono; gude tu-buta iya. ⁸ O wota uwe-okpoma ono yekwaa ya pho; bya ewota ido Urimu; waa Tumimu ye l'uwe-okpoma ono.

⁹ O bya eworu okpulishi-ekwa ono kpube iya; bya eworu iphe ono, du g'okwekpu, e meru le mkpola-ododo ono; mbu okpu ono, du nsọ ono; libe l'okpulishi-ekwa ono l'uzo atatiphu, bu iya bu gẹ Chipfu turu Mosisu ekemu su g'o mee ya.

¹⁰ Noo ya; Mosisu bya ewota manụ awụ l'ishi obu; bya awukota l'ulo-ekwa ono; me iphemiphe, nokota iya nu; shi nno mee ya; o dukota nsọ. ¹¹ O meta manụ ono phee mgbo esaa l'oru-ngweja ono; mekpoo ngwa iya g'o ha; mekpoo eze gbamugbamu ono; yee okpa iya; shi

nno mee ya; ọ dukota nsọ. ¹² Ọ bya ewota manu awu l'ishi ono wua Eronu l'ishi gude mee ya; ọ du nsọ. ¹³ No iya; Mosisu byakwapho bya eduta unwu Eronu futa; bya eworu uwe mgbalanu yee phe; bya egude ekwa-atu-buta-l'upfu webegbaa phe; bya ewota okpu ndu-uke kpubegbaa phe l'ishi, bu iya bu ge Chipfu turu Mosisu onu g'o mee ya.

¹⁴ Ọ bya akputa oke-eswi ono, ee-gude gwee ngweja-iphe-eji ono bya; Eronu yee unwu iya woru eka byabe oke-eswi ono l'ishi. ¹⁵ Mosisu woru oke-eswi ono gbua; bya emeta mee ya gude mkpushi-eka iya tee ya le mpu, nogbaa l'oru-ngweja ono; shi nno swafu nturu, du iya nu. O woru ophu ghuduru nu wua l'okpali oru-ngweja ono; gude mee ya; ọ du nsọ; pfa ugwo iphe-eji; shi nno swafu nturu, du iya nu. ¹⁶ Mosisu bya eheshikota eba, no l'iphe-epho iya g'o ha; botakwapho anya iya; waa akpuru iya ephenebo; yee eba, nokota iya nu; woru kpo oku l'oru-ngweja ono. ¹⁷ Ọ buru anu oke-eswi ono; waa akpo iya; yee nshi iya be o gude je akpo oku l'azu eka ndu Izurelu koberu ulo-ekwa phe, bu iya bu ge Chipfu suru Mosisu g'o mee ya.

¹⁸ Ọ bya akputa ebili ono, ee-gude gwee ngweja-akpo-oku ono; Eronu yee unwu iya bya eworu eka byabe ebili ono l'ishi. ¹⁹ Mosisu gbua ebili ono; nakobe mee ya; pata mee ya ono phedzuru le mgburuku oru-ngweja ono mgburugburu. ²⁰ O gbubushia anu ebili ono mkpirikpu mkpirikpu; mbu Mosisu; bya eworu ishi iya yee mkpirikpu mkpirikpu iya ono; me

ẹba iya kpọkota ọku. ²¹ O gude mini saa iphe-ẹpho iya; waa ẹka iya; yee ọkpa iya asasa; bya atuko anu ebili ono kpoo ọku l'oru-ngweja ono; o buru ngweja-akpo-ọku, a nuru Chipfu; mbu ngweja, aakpo ọku anu Chipfu, mkpo iya du iya ree, bu iya bu ge Chipfu turu Mosisu ekemu g'o mee ya.

²² O bya akputa ebili ophuu. Ebili k'ono bu ophu ee-gude mee Eronu; yee unwu iya g'ephe buru ndu-uke. Eronu yee unwu iya je eworu ẹka byabe iya l'ishi. ²³ Mosisu gbua ebili k'ono; haru mee ya meta; tee Eronu l'atakpa-nchi ekutara; me le mkpushi-eka ezeke-eka ekutara; waa le mkpushi-okpa ezeke-okpa ekutara. ²⁴ Mosisu dufutakwapho unwu Eronu; bya etekwa phe pho mee ono l'atakpa-nchi ekutara; waa le mkpushi-eka ezeke-eka ekutara; waa le mkpushi-okpa ezeke-okpa ekutara. Mosisu bya eworu mee ono phedzuru le mgbureku oru-ngweja ono mgburugburu. ²⁵ O bya eheta ẹba iya; hetachaa ẹba, du l'upfumodzu iya; waa ophu nokota l'iphe-epho iya g'o ha; botakwapho anya iya; waa akpuru iya ephenebo; yee ẹba, nokota iya nu; wota utapfu okpa ekutara iya tukwase iya. ²⁶ O je le nkata ono, e yeru buredi ono, e gudedu iphe, ekoje buredi ghee ono, no l'ataphu Chipfu ono; bya ahata ishi buredi lanu; hatakwapho ishi akara lanu l'akara ono, a gworu le manu ghee ono; waa ẹcha-mbekee lanu. O wota iya yekobe l'ẹba iya pho; yee utapfu okpa ekutara iya pho. ²⁷ O tuko iphemiphe ono g'o ha dee Eronu yee unwu iya l'eka; ephe bya eworu iya maa amama l'iphu Chipfu g'o buru ngweja-amama. ²⁸ Mosisu

bya anata phẹ iphemiphe ono; tuko yẹle ngweja-akpo-oku pho kpo oku l'oru-ngweja ono; o buru ngweja, e gude mee nemadzu g'ọ buru onye uke; mbu ngweja, aakpo oku anu Chipfu, mkpo iya du iya ree. ²⁹ O wotakwapho ndu iya, bu iya bu oke, a heru Mosisu l'ebili ono, e gude mee Eronu phe g'ephe buru ndu-uke ono; makwapho amama l'iphu Chipfu; g'ọ buru ngweja-amama, bu iya bu ge Chipfu turu Mosisu l'ekemu g'o mee ya.

³⁰ Noo ya; Mosisu bya emeta manu awu l'ishi ono; bya emetakwapho mee ono, no l'oru-ngweja ono; bya eworu phee Eronu yee unwu iya l'ehu; waa l'uwe phe. Oo ya bu; o mee Eronu yele uwe iya; waa unwu iya yele uwe nkephe; ephe tuko dukota nsọ.

³¹ Mosisu su Eronu yee unwu iya: "Unu je eshia anu ono l'onu-abata ulo-ekwa-ndzuko. Unu anodu l'eka ono taa ya; yele buredi ono, no le nkata ono, e yeru ngweja, e gude mee unu g'unu buru ndu-uke ono, bu iya bu iphe, mu turu ekemu su ge Eronu yee unwu iya riye.

³² Anu ono yee buredi ono ophu phoduru nu be unu e-woru je akpo oku. ³³ Unu ta tugbukwa l'onu-abata ulo-ekwa-ndzuko ono jasu unu anorwua ya ujiku esaa; mbu jasu l'e meghee k'eme unu g'unu buru ndu-uke ono; noo kele oo ujiku esaa ono be ee-gude mekota k'eme unu g'unu buru ndu-uke ono. ³⁴ Iphe, e meru ntanu-a bu iphe, Chipfu turu ekemu su g'e mee; gude pfua ugwo iphe-eji, unu meru. ³⁵ Noo g'o gude unu je l'anodu l'onu-abata ulo-ekwa-ndzuko eswe l'enyashi noo ya ujiku esaa; shi nno mee iphe,

Chipfu sūru g'e meje; g'ònwu te egbu unu; keḷe ọ kwa g'a tūru mu ekemu iya bu ono."

³⁶ Noo ya; Erọnu yẹe unwu iya mekọta iphe, Chipfu shi l'ọnu Mósisi sū g'ẹphe mee.

9

Ndu uke awata eje ozi phe

¹ O be lẹ mbọku k'ẹsato; Mósisi kua Erọnu; yẹe unwu iya; waa ndu bu ọgerenya Ízureḷu. ² Ọ sū Erọnu-a: "Kpṭa nwa oke-eswi, ii-gude gwee ngweja-iphe-ẹji; yẹe ebili, ii-gude gwee ngweja-akpọ-ọku; mbụ ọphu adudu ẹka iphe mebyiru iya; kpuru iya bya l'iphu Chipfu. ³ Pfuaru unwu Ízureḷu sū phe: Unu kpṭa mkpi g'e gude gwee ngweja-iphe-ẹji; unu akpṭa nweswi yẹe nwaturu; ẹphenebo a-bucharu ọphu nọwaru mgbarapha; ọphu ọ dudu ẹka iphe mebyiru iya; gude je g'e gwee ngweja-akpọ-ọku. ⁴ Unu akpṭakwapho oke-eswi; waa ebili, ee-gude gwee ngweja-ẹhu-guu; g'e gude gwee ngweja l'iphu Chipfu; mekwapho ngweja-nri, a gwọru lẹ manụ; keḷe ntanụ-a bẹ Chipfu e-goshikwa unu onwiya."

⁵ Ẹphe gweta iphe ono, Mósisi gushiru ono; bya l'iphu ọlo-ẹkwa-ndzukọ. Iphe, bukpo ndu Ízureḷu l'ọphu wuritaru bya akuru l'iphu Chipfu.

⁶ Noo ya; Mósisi sū: "Wakwa iphe, Chipfu sūru g'unu mee baa; gẹ ya egoshikwanụ unu ọdu-biribiri iya." ⁷ Tọbudu iya bu; Mósisi sū Erọnu: "Tugbua je l'ọru-ngweja je egwee ngweja-iphe-ẹji ngu ọbu; yẹe ngweja-akpọ-ọku ngu ọbu; gude

pfuaru onwongu ugwo iphe-eji; yee ugwo iphe-eji ndu Ízurelu. Gwee ngweja ono gude pfua ugwo iphe-eji phe, bu iya bu ge Chipfu pfuru su g'e mee ya."

⁸ Noo ya bu; Eronu bya eje l'oru-ngweja ono; je egbua nwa oke-eswi ono, oo-gude gwee ngweja-iphe-eji nkiya ono. ⁹ Unwu iya bya apataru iya mee nwa oke-eswi ono. O gude mkpushi-eka meta mee ono tee le mpu, e mobegbaaru l'oru-ngweja ono; bya eworu mee ono ophu phoduru nu; wuru ye l'okpali oru-ngweja ono. ¹⁰ O bya eworu eba-anu ono, o gude gwee ngweja-iphe-eji ono; waa akpuru iya ephenebo; waa anya iya; kpoo oku l'oru-ngweja ono, bu iya bu ge Chipfu turu Mosisu onu g'e mee ya ono. ¹¹ Anu iya; waa akpo iya be o kpuru oku l'azu eka ndu Ízurelu kpoberu ulo-ekwa phe ono.

¹² Eronu bya akputa anu ono, oo-gude gwee ngweja-akpo-oku ono gbua. Unwu iya bya apataru iya mee anu ono; o bya ephephe ya l'oru-ngweja ono mgburugburu. ¹³ Ephe haa anu ngweja-akpo-oku ono nanu nanu nu iya; ephe nuchaa ya; nu iya me ishi iya; o tuko iya go ha kpoo oku l'oru-ngweja ono. ¹⁴ O gude mini saa iphe-epho iya; waa eka iya; waa okpa iya asasa; bya akpokwaa ya pho oku l'eli ngweja-akpo-oku ono, nohawa l'oru-ngweja ono.

¹⁵ Eronu gwefuta iphe ngweja ndu Ízurelu; kputa egbu ono, oo-gude gwee ngweja-iphe-eji nkephe ono gbua; gude iya gwee ngweja-iphe-eji; egube ono, o gweru ke mbulembu pho. ¹⁶ O

bya akp̄ta an̄u ono, oo-gude gwee ngweja-akp̄o-
 ọku ono; bya egude iya gwee ngweja ọbu g'a
 t̄uru ọnu s̄u g'e meje iya. ¹⁷ O wotakwapho
 ngweja-nri ono; bya ahata iya ọphu jiru mkpoji-
 ẹka; kp̄o ya ọku l'ọru-ngweja; a -gufukwaro
 ngweja-akp̄o-ọku, eegweje l'utsu. ¹⁸ Ọ bya egbua
 oke-eswi pho; yee ebili pho; gude gweeru ndu
 Ízurelu ngweja-ẹhu-guu. Ụnwu iya pataru iya
 mee an̄u ono; ọ nata iya phephee ọru-ngweja
 ono mgburugburu. ¹⁹ Ẹphe wotakwaru iya pho
 ẹba oke-eswi ono; yee k'ebili ono; mbu ẹba,
 shi l'upfumodu iya; waa ẹba, kwechiru iphe-
 ẹpho iya; waa àkp̄r̄u iya ẹphenebo; waa anya
 iya. ²⁰ Ẹphe woru ẹba-an̄u ono tukobe le ñd̄u
 iya. Er̄onu bya eworu ẹba ono kp̄o ọku l'ọru-
 ngweja ono; ²¹ ọle ñd̄u iya ono; waa utapfu ọkpa
 ẹkutara iya; be o woru maa amama l'iphu Chipfu
 g'ọ buru ngweja-amama, bu iya bu ge Mosisu
 s̄uru g'e mee ya.

²² T̄obudu iya bu; Er̄onu chilia ẹka imeli l'uzo
 ẹka ndu Ízurelu no; bya agoru ọnu-oma nu
 phe; bya eshi l'ẹka o shi egwe ngweja-iphe-
 eji pho; yee ngweja-akp̄o-ọku pho; me ngweja-
 ẹhu-guu pho; nyizeta. ²³ Mosisu yee Er̄onu
 t̄uko bahu l'ime ọlo-ẹkwa-ndzukọ ono. Ẹphe
 futaepho; ẹphe goru ọnu-oma nu ndu Ízurelu;
 Chipfu goshi ndu ono l'ophu ogbunw̄inwii ya.
²⁴ Ọku shi l'iphu Chipfu daa bya ekee ngweja-
 akp̄o-ọku ono; yee ẹba ono, no l'eli ọru-ngweja
 ono. Ndu Ízurelu h̄umaepho iphe ono, nwuru
 nu ono; ẹphe t̄ushia uzu ẹhu-utso; bya adakota
 kp̄urumu woru iphu bubechaa l'ali.

10

Anwuhu Nadabu yee Abihu

¹ Unwu Erõnu, bu Nadabu; yee Abihu wotachaa iphe, aaguje oku phe l'ehu l'ehu; bya anwuru oku ye iya; bya eye iya unwù-isensu. O buru oku adudu nsò be ephe gude bya l'iphu Chipfu; bu iphe o sùru g'ephe te emejeshi.

² Tòbudu iya bu; oku shi l'iphu Chipfu bya eworu phe tsua; ephe nõdu l'iphu Chipfu l'eka ono nwushihu. ³ Mòsisu sù Erõnu: "O kwa iphe-a be Chipfu pfuru teke ono sù: 'Ndu abya mu ntse be mu e-goshije onwomu g'ephe maru le mu du nsò; mu emee ge ndu Ízurelu l'ophu huma odu-biribiri mu.' " Erõnu nõduepho nggujunguji.

⁴ Mòsisu kua Mishelu; waa Eluzafanu, bu unwu Uzelu. Uzelu ono bu nwunè nna Erõnu. O sù phe: "Unu kpìritaru ntse bya apata unwunna unu pafu l'ulo-ekwa Chileke; paru je l'azu eka ndu Ízurelu kpoberu ulo-ekwa phe." ⁵ No iya; ephe jekube iya; je apata phe; ephe l'uwe mgbalanu phe ono pafu l'azu eka ndu Ízurelu kpoberu ulo-ekwa phe ono, bu iya bu ge Mòsisu sùru g'ephe mee ya.

⁶ Noo ya; Mòsisu sù Erõnu; yee unwu iya, bu Eleyaza; waa Itama: "Unu te emekwa ishi unu njò ememe; ophu o dukwa onye a-laka uwe iya; kele o -buru l'unu meru nno be unu anwuhukwa; mbu Chipfu atukoshi ndu Ízurelu l'ophu oke ehueghu iya. Oo unwunna unu, bu ndu Ízurelu l'ophu a-ra ekwa ndu Chipfu gude oku kegbushia. ⁷ Unu ta lufukwa alufu

l'onu-abata ụlo-ekwa-ndzuko; anonyakwa unu nwushihu; noo kele Chipfu wuru unu manu l'ishi." Epe mekotaepho iphemiphe, Mosisu suru g'ephe mee.

Ekemu ke ndu-uke

⁸ Tɔbudu iya bu; Chipfu bya epfuru yeru Erɔnu sɔ iya: ⁹ "Ta ngujekwa mee; ophu i ngujekwa iphemiphe, atsɔ atsɔtsu; gɔbedua l'onwongu; mekpoo unwu ngu; teke unu abahu l'ulo-ekwa-ndzuko; odumeka be unu a-nwushihukwa. O buru g'oo-du bu ono ojejeje l'ogbo unu; eshi l'ogbo swewaruro ogbo. ¹⁰ Oo ya bu; g'unu edokahaje iphe, du nsɔ; yee iphe, adudu nsɔ; dokaha iphe, aasɔ nsɔ; yee iphe, a ta sɔdu nsɔ.

¹¹ Unu ezije unwu Izurelu iphe, bu ekemu ono g'oha, bu ophu Chipfu shi l'eka Mosisu tɔaru phe."

¹² Tɔbudu iya bu; Mosisu bya epfuru yeru Erɔnu; yee unwu iya ndu ophu phoduru nu, bu iya bu Eleyaza yee Itama; sɔ phe: "Unu wota ngweja-nri ophu phoduru nu le ngweja ono, a kpɔru oku nu Chipfu. Unu woru iya ria le mgboru oru-ngweja ono. O le g'unu te eyekwa iya iphe, ekoje buredi. Noo kele o bu ngweja, du nsɔ shii. ¹³ Unu nodukwa l'eka du nsɔ ria ya; noo kele o iphe, rwuberu ngu nu; bya aburu iphe, rwuberu unwu ngu; mbu ngweja ono, aakpo oku anu Chipfu ono; kele o g'a turu mu ekemu iya bu ono. ¹⁴ Obenu le-a; gɔbedua gu l'unwu ngu unwoke; yee unwu ngu unwanyi be a-taje ndu anu ono, e gude gwee ngweja-amama ono; yee utapfu iya ono, a nuru ono. Unu nodujekwa l'eka du nsɔ taa ya; kele o iphe, rwuberu ngu

nụ; bya aburu iphe, rwuberu unwu ngu, shi l'iphe, unwu Ízurelu gude bya egwe ngweja-ehuguu. ¹⁵ Utapfu iya ono, a nuru ono; waa ndú iya ono, a maru amama ono be ephe e-yekobeje eba-anu ngweja ono, aakpo oku ono wota; g'a maa amama l'iphu Chipfu g'o buru ngweja-amama. Ono aburu nkengu; yee k'unwu ngu; l'o buru iphe, rwuberu unu jasú l'ojejoje, bu iya bu ge Chipfu turu ekemu su g'e meje iya ono."

¹⁶ Mosisu kpaa ishi g'e meru eghu pho, e gude gwee ngweja-iphe-eji pho; bya amaru l'a kporu iya oku. Ehu ghuahaa ya eghu l'iphe, unwu Eronu ndu ophu nokwadu ndzu ono meru, bu iya bu Eleyaza; yee Itama. O bya asu phe: ¹⁷ "¿ Bu gunu kparu iphe, unu ta nodu l'ime ulo-ekwa Chileke taa anu ono, e gude gwee ngweja-iphe-eji ono; eshinu o bu iphe, du nsó shii; bya aburu iphe, a nuru unu g'unu gude safu ejo-iphe, oha l'ophu meru; unu apfua ugwo iphe-eji phe l'iphu Chipfu? ¹⁸ Eshinu e te egudedu mee anu ono bahu l'eka-du-nsó be unu gege anodu l'ulo-ekwa Chileke taa anu ono, bu iya bu ge mu suru g'e meje iya."

¹⁹ Eronu su Mosisu: "O kwa ntanu-a be ephe no l'iphu Chipfu gwee ngweja-iphe-eji phe; yee ngweja-akpo-oku phe; teme iphe, du egube-a bya anwujehawaru mu! Ome mu jeru je ataa anu ngweja-iphe-eji ono ntanu-a; Chipfu ?o gogo nata iya-a?" ²⁰ Mosisu numaepho iphe ono, o pfuru ono; o jie ya pho epho.

*Nri, aasọ nsọ; yẹe nri, a ta sọdu nsọ
(Dit 14:3-21)*

¹ Tọbodu iya bu; Chipfu bya epfuru yeru Mosisu yee Eronu; su phe: ² “Unu pfuru yeru ndu Ízurelu; su phe-a: Wakwa uduru anu, unu a-taje l'iphe, bu anu, nokota le mgboko-a baa: ³ Unu taje iphe, bu anu, nweru ujarabvu-okpa; teme o nodu anwafutaje nri taphu azu l'iphe, bukpo unwu anu. ⁴ O dukwaru ndu ophu anwafutaje nri taphu azu; ophu ephe enwedu ujarabvu-okpa; bya enwekwarupho ndu ophu nweru ujarabvu-okpa; ophu ephe anwafutajedu nri taphu azu. Unu ta tajakwa ndu k'ono. Inya-kamelu be anwafutaje nri taphu azu; obenu l'o to nwedu ujarabvu-okpa. Oo ya bu l'ehu unu be o bu anu, aasọ nsọ. ⁵ Unu ta tajakwa nchi-ogba; kele onwafutaje nri taphu azu; obenu l'o to nwedu ujarabvu-okpa. O bukwaru unu anu, aasọ nsọ. ⁶ Nngamachi bukwarupho unu anu, aasọ nsọ; kele onwafutaje nri taphu azu; obenu l'o to nwedu ujarabvu-okpa. ⁷ Teme g'ezi bukwarupho unu anu, aasọ nsọ; noo kele o nweru ujarabvu-okpa; obenu l'o too nwafutaje nri taphu azu. ⁸ Unu ta tajakwa egube anu ono; ophu unu edenyijekwa odzu phe eka; noo kele ephe bukota unu anu, aasọ nsọ.

⁹ “Wakwanu ophu unu a-taje baa l'anu, bu ndu ophu bu le mini; anu nweru mkpo; yee ophu nweru ekiri; buru l'eze-enyimu; me le nggele; unu taje ndu k'ono. ¹⁰ O -be le ndu ophu g'ephe ha; mbu ndu ophu bu l'eze-enyimu; me

lẹ nggele; ọphu o to nwedu m̀kpó; ọphu o to nwedu ẹkiri; m̀kpoo iphemiphe, bu iphe, bu lẹ mini; m̀kpoo iphe, bu iphe, dzu ndzu; buru lẹ mini g'ọ ha bukotakwa unu ẹbyi. ¹¹ Eshinu ọ bu unu ẹbyi; unu ta tajekwa anu iya; g'odzu iya bukwarupho unu ẹbyi. ¹² Mbụ l'iphemiphe, bu lẹ mini, enwedu m̀kpó; ọphu o nwedu ẹkiri a-bukotajekwaru unu ẹbyi.

¹³ “Waa ẹnu ndu ọphu a-buru unu ẹbyi baa; ndu k'ono bẹ unu ta atajedu anu iya; kele ọ bu ẹbyi. Ndu k'ono bu ugo; waa udele; waa udele-ojii; ¹⁴ waa égbé; waa ivu l'udu iya l'udu iya; ¹⁵ m̀kpoo okpoko-ohà l'udu iya l'udu iya; ¹⁶⁻¹⁸ waa mgbashi-ujiku l'udu iya l'udu iya; waa ẹnu golu; waa okpo-ngwere l'udu iya l'udu iya; waa ọgu-ikporo; waa ugo-mini; ¹⁹ wakwapho eze-oku-eswi-uda; waa apyari-nhoko l'udu iya l'udu iya; waa ovu; waa utsu-nwankuta.

²⁰ “Iphe, bukpoogo, furu ẹba, bu iphe, gude okpa ẹno eje ije a-bukotajeru unu ẹbyi. ²¹ Ole ọ dukwaru-a ogu, furu ẹba, egudeje okpa ẹno eje ije, unu a-taje. Ọphu unu a-taje bu ọphu nweru ọgba-kpii, oogudeje apfu mpfu. ²² Ọphu unu a-taje bu igube l'udu iya l'udu iya; waa okaka l'udu iya l'udu iya; waa atsu-egu l'udu iya l'udu iya; waa mgbagbaramatsu l'udu iya l'udu iya. ²³ O be l'iphe, bukpoogo ọzo, furu ẹba bya egude okpa ẹno eje ije l'a-tuko buru unu ẹbyi.

²⁴ “Unwu iphe ono g'ephe ha l'e-me; unu aburu ndu aaso nsọ. Onye denyikwanuru odzu iya ẹka bẹ aa-nodu aso nsọ jasọ nchi ejihu.

²⁵ Iphe, bu onye pataru odzu iya l'a-sa uwe iya

asasa; teme l'ọ buru onye aasọ nsọ jasụ nchi ejihu. ²⁶ Iphe, bukpo anụ, nweru ụpyi-ọkpa; ọphu o nwedu ụjarabvu-ọkpa; waa ọphu ta anwafutajedu nri taphu azụ; bukwaru unu anụ, aasọ nsọ. Iphe, bukpo onye denyiru odzu iya ẹka l'a-bukwarupho onye aasọ nsọ. ²⁷ G'iphe, bukpo anụ, nweru ọkpa ẹno, bu ndu ọphu akọbeje nvọ eje ije bukwaru unu anụ, aasọ nsọ. Onye denyiru odzu iya ẹka a-bukwaru onye aasọ nsọ jasụ nchi ejihu. ²⁸ Onye pataru odzu iya a-sa uwe iya asasa; teme l'ọ buru onye aasọ nsọ jasụ nchi ejihu. Ụnwu anụ ono bukotaruru unu anụ, aasọ nsọ.

²⁹ “A -bya l'anụ, awụ l'ẹpho; ndu ọwa-a bu ndu ọphu unu a-nọdu asọ nsọ: uphẹga; waa okerepfu; waa ngwere l'udu iya l'udu iya; ³⁰ waa agulo; waa awala; waa okporoko; waa orinvuru; waa oguba. ³¹ Ono bukota anụ, unu a-soje nsọ l'anụ, awụ l'ẹpho. Onye duru ọphu o denyiru ẹka l'ẹka ọ nwuhuru anwuhu l'a-buru onye aasọ nsọ jasụ nchi ejihu. ³² Iphe, bu iphe, odzu iya ọphu nwuhuru anwuhu dapyaberu buakwaa iphe, aasọ nsọ; m'ọ bu iphe, e gude oshi pyia; ọzoo uwe; ọzoo akpo-anụ; mę uwe-aphu; mbukpo iphe, bu ngwa, e gude emekpo iphemiphe; g'e dekwaa ya lę mini; l'ọ nọ buru iphe, aasọ nsọ jasụ nchi ejihu; l'a turwua ya. ³³ Teke ọ duru g'ẹphe ha ọphu daru l'ite urwa; iphe, bukpo iphe, du l'ite ono bukotaakwa iphe, aasọ nsọ; unu tukpokwaa ite obu atukpo. ³⁴ Nri, e gude ite, du nno kuta mini shibe buakwaa nri, aasọ nsọ; teme iphe, aangụ angungu shi l'ite, du nno buakwaa iphe-angungu, aasokwapho

nsọ. ³⁵ Iphe, odzu anụ ono, a gụshiru ono daru bukwaa iphe, aasọ nsọ. Ọ -buru l'ọ daru l'ite-ọku; ọzoo l'epfu, eeshi ite g'a phọtakwa iya je atukposhia. Ephe buwaa iphe, aasọ nsọ; ọo ya bu; unu mekwaa ya phọ iphe, aasọ nsọ. ³⁶ Ọ -buru l'ọ daru l'enya ẹka mini eshije anwushi; ọzoo l'obvu, mini dụ shii bẹ duebekwa ree; ọle onye denyiru odzu iya ono ẹka bẹ bukwaa onye aasọ nsọ. ³⁷ Ọ -buru l'ọ duru odzu anụ ono ọphu daru lẹ mebyi iphe, eemebe l'alị bẹ mebyi iphe ono ta abukwa iphe, aasọ nsọ. ³⁸ Obenu; ọ -buru l'e yewaru mini lẹ mebyi iphe ọbu; odzu anụ ono dalahụ iya bẹ ọ bukwaa unu iphe, aasọ nsọ.

³⁹ “Ọ -buru l'ọo anụ ọphu a haru g'unu taje anụ iya nwuhuru bẹ onye denyiru iya ẹka a-bukwaru onye aasọ nsọ jasụ nchi ejihu. ⁴⁰ Onye takwanuru odzu iya l'a-sa uwe iya asasa; buru onye aasọ nsọ jasụ nchi ejihu. Onye patakporunu odzu iya apata l'a-sakwaphọ uwe iya; buru onye aasọ nsọ jasụ nchi ejihu.

⁴¹ “Iphe, bukpoo iphe, awu awuwu, bu ọphu akpu wuruwuru l'alị l'a-bukotakwaru ẹbyi; ọphu e rijekwa iya eriri. ⁴² Unu ta tajeakwa iphemiphe, awu awuwu lẹ mgboko-a; m'ọ bu ọphu gude ẹpho awu; ọzoo ọphu gude ọkpa ẹno eje; ọzoo ọphu gude igwe ọkpa eje; kele ẹphe tukoru buru ẹbyi. ⁴³ G'ọ tọ dukwa iphe, awu l'ẹpho, unu e-gude mee onwunu ẹbyi. Ọphu unu egudekwa pẹ mee onwunu ndu aasọ nsọ; g'unu te shi l'ẹphe buru ndu e merwuru emerwu; ⁴⁴ kele ọ kwa mbedua bu Chipfu; bya aburu Chileke unu. Ọo ya bu; unu sachaa onwunu; unu adu nsọ; kele mbedua dụ nsọ; ọphu unu

aturwukwa onwunu l'iphe, awu awuwu, bu ophu akpu wuruwuru l'ali g'ọ dūhabe; ⁴⁵ kele o kwa mbedua bu Chipfu, onye shi l'ali Ijiputu dufuta unu ge mu buru Chileke unu. Oo ya bu le-a; unu dukwa nsọ; kele mbedua dukwa nsọ.”

⁴⁶ “Ono bu ekemu, a turu swibe anu; waa enu; waa iphe, bu iphe, dzu ndzu, bu l'ime mini; mekpoo iphe ozo, bu iphe, awu awuwu, bu ophu akpu wuruwuru l'eliphe; ⁴⁷ g'e gude dokaha iphe, aaso nsọ; yee iphe, a ta sodu nsọ; dokaha anu, bu ophu ee-rije eriri; yee ophu e te ridu eriri.”

12

Aswafu nturuw nwanji me o -zedacha

¹ Chipfu bya epfuru yeru Mosisu su iya:

² “Pfururu yeru unwu Izurelu; su phe-a: Nwanji -tsuta ime bya anwua nwa nwoke; g'ọ bukwaru onye aaso nsọ noo abali esaa; mbu l'oo epho g'aaso-bejeru iya nsọ me o -nodu anọ nsọ nwanji-a bu g'aa-so-beru iya nsọ. ³ O -be le mboku k'esato l'e bua nwata obu ubvu. ⁴ E -mechaa; nwanji ono anọ ukporo abali l'abali iri l'eto g'e gude swafu iya nturuw mee, laru iya nu. G'ọ to dukwa iphe, e doberu nsọ, oo-denyi eka; teme ophu o bahukwa le Ulo-du-nsọ jasu mboku, nsọ aswafu nturuw iya a-bvu.

⁵ “O -buru l'oo nwa nwanji be o nwuru be nwanji obu a-buru onye aaso nsọ ujiku iri l'eno; egube ono, aanoduje aso iya nsọ me o -nodu anọ nsọ nwanji ono. Iphe, oo-no g'e gude swafu iya nturuw mee alala bu ujiku ukporo eto l'ishii.

6 “Teke eswe mbọku aswafu nturwu iya ono bvuerupho; l'onye nwuru nwoke ozoo nwanyi; ge nwanyi ono kpata nwaturu mgbapha g'e gude gwee ngweja-akpo-oku. L'o nwekwapho nwa ndo; ozoo kparaka; g'e gude gwee ngweja-iphe-aji. G'o gude iya bya l'onu-abata ulo-ekwandzuko bya anu onye uke. 7 Onye uke ono egude iphe ono je egwee ngweja nu Chipfu gude pfa ugwo iphe-aji iya; l'o bya adubebe ree le mee, laru iya nu. Noo ekemu, duru nwanyi, nwuru nwa nwoke; ozoo nwa nwanyi.

8 “Teke o bu l'onye obu ta adudu ike agbata nwaturu; g'o nwutaru iya kparaka labo; ozoo nwa ndo labo. L'a nwuta nanu gude gwee ngweja-akpo-oku; gude ophuu gwee ngweja-iphe-aji. Onye uke egude iya pfa ugwo iphe-aji iya; l'o bya adubebe ree.”

13

Onye ekpenta eme

1 Tobudu iya bu; Chipfu bya epfuru yeru Mosisu yee Eronu; su phe: 2 “O -buru l'o nweru onya, no nemadzu l'ehu; ozoo l'oo iphe, du g'ekpa; ozoo l'iphe, tukashiru iya poopoo l'ehu, bugbaa iphe, nweru g'oo-du; l'o ghoo ekpenta; nodu onye ono l'akpo-ehu; g'e dutakwa onye obu duru jepfu Eronu, bu onye uke; ozoo l'e duru iya jepfu onye bu nwa iya, bukwapho uke. 3 G'onye uke ono lee enya l'onya ono, no onye obu l'akpo-ehu ono. Teke o bu l'aji, futaru l'eka ono ghohuru aghohu acha ucha; teme eka ono dalahu adalahu; be eka-iphe-no obu buakwaa

ekpenta; nọdu onye ono l'akpo-ẹhu. G'onye uke lee ya ẹnya gụa ya l'onye aasọ nsọ. ⁴ Teke ọ bu l'ẹka ọbu acha iya ụcha l'akpo-ẹhu; e lee ya ẹnya ọphu ọ dalahuduru adalahu; ọphu ẹji, nọ iya nụ aghohuduru aghohu acha ụcha; g'onye uke gụ-chia onye ono l'ulo nọo ujiku ẹsaa. ⁵ O -be lẹ mbọku k'ẹsaa; g'onye uke je elebaa onye ọbu ẹnya l'ẹhu; teke ekpenta ono dụ g'ọ dụ; ọphu ọ kadu asa ọsa; g'onye uke ono gụ-chifua ya l'ulo ujiku ẹsaa ọzo. ⁶ O -bekwa lẹ mbọku k'ẹsaa; g'onye uke jekwaphọ elebaa onye ọbu ẹnya l'ẹhu. Ọ -buru l'ẹka-iphe-nọ iya ọbu dūwaa inchi inchi; ọphu ọ kadu asa ọsa; g'onye uke gụa ya onye a ta sọdu nsọ. Iphe, ọ bu bẹ bu ẹkpá mmanu. G'ọ saa uwe iya asasa; buru onye a ta sọdu nsọ. ⁷ Obenu lẹ-a; teke iphe ono bakahuru ka iya ọsa l'ẹhu; g'onye uke humachaa iya sụ l'a taa sọdu iya nsọ phọ; g'o jekwa egoshibaa onwiya onye uke ono ọzo. ⁸ Teke onye uke ono leri iya ẹnya bya ahuma l'ọosa iya ọsa l'ẹhu; mbu iphe ono; g'onye uke ono gukwaa ya l'onye aasọ nsọ; ọ kwa ekpenta eme onye ono.

⁹ “Ọ -buru lẹ nemadzu bẹ iphe eme l'akpo-ẹhu, bu iphe, eswe nswe; g'e dukwaru onye ọbu jepfu onye uke. ¹⁰ G'onye uke ono lee ya ẹnya; teke o nweru ọnyá, nọ onye ono l'ẹhu, acha nmalanmala; o mewaa; ẹji, nọ iya nụ ghohuwaa aghohu; teme o nweru iphe, dụ g'ájí, dụ iya nụ; ¹¹ bẹ ọ kwa alagala ekpenta nọ onye ono l'akpo-ẹhu. G'onye uke gukwaa ya l'onye aasọ nsọ. G'o to jekwa iya agu-chi l'ulo; kele ọ buakwaa onye aasọ nsọ. ¹² Teke ọ bu l'ekpenta ono

voshiru nemadzu l'akpo-ehu; o tuko onye obu ehu sweta; mbu shi iya l'ishi vua ya kpatakpata jasu l'okpa; mbu iphe, bukpo eka onye uke ono lekporu iya enya bukotaru iya; ¹³ g'onye uke ono lebakwaa ya enya. O -buru l'ekpenta ono mewaru iya; kpohu; eka ono nodu achawa ucha; g'o gukwaa onye ono l'onye a ta sodu nsọ; kele o buwaa ichii-iphe; o to buedu ekpenta. ¹⁴ Ole o -nonyakwanaa; aji futa l'eka-iphe-no iya ono; l'o buru onye aaso nsọ. ¹⁵ Onye uke ono -humaepfo aji ono; g'o gua onye ono l'onye aaso nsọ; kele aji bu iphe, aaso nsọ. O kwa ekpenta eme onye ono. ¹⁶ O -buru l'aji ono nonyaaru gbanwee; bya aghohu chaahaa ucha; g'onye obu jepfukwa onye uke ozobaa. ¹⁷ G'onye uke ono lee ya enya; o -buru l'eka ono iphe shi eme iya ono kpohuwaru; achawa ucha; g'onye uke ono pfukwaa l'onye ono, iphe shi eme ono be a taa sodu nsọ. Teke ono; onye ono abya aburu onye a ta sodu nsọ.

¹⁸ "A bya l'ehu onye bu ejo-onwo shi pho ya; o kawaa mma; ¹⁹ a bya l'eka ono, ejo-onwo shi pho ya ono; o -buru l'o byaru ahuta ahuta acha ucha; ozoo l'o nweru eka acha ucha bya adu nwa uswe-uswe; g'e jekwa egoshi iya onye uke. ²⁰ G'onye uke ono lekwaa ya enya; o -buru l'eka ono dalahuru adalahu; teme eji, futaru l'eka ono ghohuwaa aghohu acha ucha; g'onye uke ono gua ya l'onye aaso nsọ; kele o kwa ekpenta laru onye ono l'eka ono, ejo-onwo shi pho ya ono. ²¹ Ole o -buru l'onye uke ono leri eka obu enya; ophu eji, furu l'eka ono aghohuduru aghohu; ophu o dalahuduru

adalahu; ọ rwakputewa arwakpute; g'onye uke ono gu-chia onye ono l'ulo g'ọ nọo ujiku ẹsaa. ²² Teke ọ bu l'ẹka-iphe-nọ iya ọbu kabaa asa ọsa eviya; g'onye uke ono pfukwaa l'ọ bu onye aasọ nsọ; kele ọ bu ekpenta eme iya. ²³ Teke ọ bu l'ẹka-iphe-nọ iya ono dọepho g'ọ du; ọphu ọ sadu ọsa; l'a maru l'ọo ichii ẹjo-onwo phọ be ọ bu; g'onye uke ono guya ya l'onye a ta sọdu nsọ.

²⁴ “Teke ọ bu l'ọku huru nemadzọ l'ẹhu; ẹka ono, ọku huru iya ono chaahaa ọcha; bya adukwapho nwa uswe-uswe; ọzoo l'ọocha ọcha; ²⁵ g'onye uke ono lekwa ya ẹnya; ọ -buru l'ẹji, futaru l'ẹka ono ghọhuwaru aghọhu acha ọcha; teme ẹka ono dalahu adalahu; be ọ bukwa ekpenta laru onye ọbu l'ẹka ono, ọku huru iya ono. Ọo ya bu g'onye uke gukwaa ya l'onye aasọ nsọ; kele ọ kwa ekpenta eme onye ono. ²⁶ Obenu le-a; ọ -buru l'onye uke ono leri iya ẹnya; ọphu ẹji, nọ iya l'ẹka ono aghọhuduru aghọhu acha ọcha; teme ọphu ẹka ono adalahunuru adalahu; teme ẹka ono rwakputewa arwakpute; g'onye uke ono gu-chia ya l'ulo g'ọ nọo ujiku ẹsaa. ²⁷ O-be le mbọku k'ẹsaa g'onye uke ono lebaa ya ẹnya l'ẹhu. Teke ọ kabaa ya asa ọsa l'ẹhu eviya; g'onye uke ono pfukwaa l'ọ bu onye aasọ nsọ; kele ọ kwa ekpenta eme iya. ²⁸ Ole ọ -bukwanuru l'ẹka-iphe-nọ iya ono dọepho g'ọ du; ọphu ọ kadu iya asa ọsa l'ẹhu; ọ gbẹchianu arwakpute arwakpute be ọ bukwa ọku ono, huru iya nu ono switaru iya eswita; g'onye uke ono gukwaa ya l'onye a ta sọdu nsọ; kele ọo ichii ọku phọ be ọ bu.

²⁹ “Ọ -buru le nwoke; ọzoo nwanyi be ọnyá

dụ l'ishi; ọzoo l'agba; ³⁰ g'onye uke lekwaá ẹńya l'ónyá ọ́bu. Ọ -bụru l'ọ́ dalahuru adalahu; mbu ónyá ọ́bu; tẹ́me éj́í, furu iya nụ́ dụ́ manụ́-manụ́; bya adu kẹ́ zítazita; g'onye uke ono gụkwaa ya l'onye aasọ́ nsọ́; kẹ́le ọ́ọ́ ejo akuruba; mbu l'ọ́ọ́ ekpenta turu onye ono l'ishi; ọzoo l'agba. ³¹ Ọ́le ọ́ -bụru l'onye uke ono lechaaru ẹńya l'ejo akuruba ọ́bu; ọ́phu ọ́ dudu l'ẹńya g'ọ́ dalahuru adalahu; tẹ́me ọ́phu éj́í, dụ́ iya nụ́ ejidu uji; g'onye uke ono gụ-chia onye ono l'ụ́lo g'ọ́ nọ́ ujiku ẹ́saa. ³² Ọ́ -be lẹ́ mbọ́ku k'ẹ́saa g'onye uke ono lebaa ẹńya l'iphe-ememe ono; ọ́ -bụru l'ejo akuruba ono ta abakahuduru abakahu; ọ́phu éj́í, dụ́ iya nụ́ adudu manụ́-manụ́; ọ́phu akuruba ono adudu l'ẹńya g'ọ́ dalahuru adalahu; ³³ g'a kpushia onye ono ishi; kpụ-buru ẹ́ka akuruba ono dụ́ haa; g'onye uke ono gụ-chifua ya l'ụ́lo g'ọ́ nọ́ ujiku ẹ́saa ọ́zo. ³⁴ Teke o rwuru mbọ́ku k'ẹ́saa; g'onye uke ono lee ẹńya l'akuruba ono; ọ́ -bụru l'ọ́ tọ́ bakahuduru abakahu; e lee ya ẹńya; ọ́phu ọ́ dalahuduru adalahu; g'onye uke ono gụ́a ya l'onye a ta sọ́du nsọ́. G'onye ono saa uwe iya; bụru onye a ta sọ́du nsọ́. ³⁵ Obenu lẹ́-a; ọ́ -bụru l'akuruba ono bakahuru iya l'akpọ́-ẹ́hu evíya g'a gụ́waru iya l'onye a ta sọ́du nsọ́-a; ³⁶ g'onye uke ono lebaa ya ẹńya. Ọ́ -bụru l'akuruba ono bakahuru iya l'ẹ́hu; g'onye uke te jeekwa ele ẹńya g'a maru éj́í iya; ?ọ́ dụ́ manụ́-manụ́. Onye ono buakwaa onye aasọ́ nsọ́. ³⁷ Ọ́ -bụru l'akuruba ọ́bu bẹ́ dọ́epfo g'ọ́ dụ́ l'ẹńya; tẹ́me éj́í ojii rwutawaa l'ẹ́ka ono bẹ́ akuruba ọ́bu kpọ́huakwaru; ọ́ buakwaru onye a ta sọ́du nsọ́;

g'onnye uke g̃a ya l'onnye a ta s̃odu ns̃o.

³⁸ “O -b̃uru l̃e nwoke; ọzoo nwañỹi b̃e iphe-
õchaa t̃ukashiru poopoo l'̃ẽhu; achagbaa ũcha;
³⁹ g'onnye uke lekwa onye ọbu ̃ẽnya l'̃ẽhu. O -buru
l'̃ẽka ọbu ta achadu ọkpobe ũcha; l'a maru l'̃õo
ũgwò b̃e t̃ukashiru onye ọbu l'̃ẽhu; l'onnye ọbu b̃e
a ta s̃odu ns̃o.

⁴⁰ “Ẽgbushi -rishihu onye nwoke l'ishi; b̃ukwa
ishi-ọnm̃o b̃e ọ b̃u; obenu l'a taa s̃odu iya ns̃o.
⁴¹ Teke ọ b̃u l'̃õo l'̃onu-iphu b̃e ẽgbushi rishihuru
iya; b̃e onye ọbu b̃ukwa ishi ọnm̃o ọnu-iphu;
obenu l'a taa s̃odu iya ns̃o. ⁴² Ọle ọ -b̃uru l'̃õo d̃uru
ọnyá, acha ũcha; bya ad̃ukwapho nwa uswe-
uswe, ño iya l'ishi-ọnm̃o ọbu; ọzoo l'ishi-ọnm̃o
ọnu-iphu ọbu; b̃e ọ buakwaa ekpenta b̃e t̃uru iya
l'ishi-ọnm̃o ọbu; ọzoo l'ishi-ọnm̃o ọnu-iphu ọbu.
⁴³ Ọo ya b̃u; g'onnye uke lee ya ̃ẽnya. Teke ọ b̃u
l'̃onyá, d̃u onye ono l'ishi; ọzoo l'̃onu-iphu acha
ũcha; bya ad̃ukwapho nwa uswe-uswe; mb̃u
d̃u g'ekpenta ono, eswe nswe, emeje nemadz̃u
l'akp̃o-̃ẽhu ono; ⁴⁴ ọo ya b̃u l'onnye ọbu b̃u onye
ekpenta; ọ b̃uru onye aas̃o ns̃o eviya. G'onnye uke
ono g̃a ya l'onnye aas̃o ns̃o; k̃ele ekpenta nkiya
t̃uru iya l'ishi.

⁴⁵ “G'onnye ekpenta ono lakakwaa uwe iya; haa
ẽgbushi iya g'̃o yagash̃ihu ayagash̃ihu; woru
ẽkwa gbobuta ũgbo-ọnu; chia mkpu s̃u l̃e ya
b̃ukwa onye aas̃o ns̃o; ya b̃ukwa onye aas̃o ns̃o.
⁴⁶ Ọo-b̃uru onye aas̃o ns̃o jas̃u teke ọo-ka mma.
G'̃o b̃uru onye aas̃o ns̃o je eburu nk̃inyi iya l'azu
ẽka ndu Ízurẽlu kp̃oberu ũlo-ẽkwa p̃ẽ.

Ekemu k'iphe, tsuru evu

⁴⁷ “Ọ -buru l'o nweru uwe, tsuru evu; ọzoo uwe ẹji anụ; ọzoo uwe ọchaa; ⁴⁸ ọzoo ẹkwa, e kweru l'oghu ọchaa; ọzoo ọphu e gude ẹji anụ kwee; ọzoo l'akpọ; ọzoo l'iphe, e meru l'akpọ; ⁴⁹ teke ọ bu l'ẹka ono, tsuru evu ono du oyingo-oyingo; ọzoo l'ọ du uswe-uswe; be ọ bukwa ekpenta. G'e jekwa egoshi iya onye uke. ⁵⁰ G'onye uke ono lekwa ẹnya l'ẹka ono, tsuru evu ono; woru iphe ọbu, tsuru evu ọbu gu-chia l'ulo g'ọ nọ ujiku ẹsaa. ⁵¹ O -be le mbọku k'ẹsaa; g'onye uke ono je elebaa ya ẹnya ọzo. Ọ -buru l'evu ọbu kabaa asakahu l'uwe ọbu; g'a makwaru l'ọ bu ekpenta. Iphe ono, tsuru evu ono buakwaa iphe, aasọ nsọ. ⁵² G'onye ono kpọkwaa uwe ono ọku; m'ọ bu uwe ẹji anụ; ọzoo uwe ọchaa; m'ọ bu ẹkwa, e kweru l'oghu ọchaa; ọzoo ọphu e gude ẹji anụ kwee; ọzoo l'iphe, e meru l'akpọ, bu ọphu evu ono du; g'a kpọkwaa ya ọku; kele ọ bu ekpenta. ⁵³ “Ole ọ -buru l'onye uke ono leri iya ẹnya; ọphu evu ọbu asakahuduru asakahu l'iphe ono; ⁵⁴ g'onye uke ono zia g'a saa iphe ono, tsuru evu ono asasa; l'ọ bya agu-chia ya l'ulo g'ọ nọ ujiku ẹsaa ọzo. ⁵⁵ G'onye uke ono lee ẹnya l'iphe ono; me a sachaa ya ono; ọ -buru l'iphe ọbu ta agbanweduru ududu iya; obetakporu ọphu ọ sakahuduru asakahu; be ọ bukwa iphe, aasọ nsọ; g'a kpọkwaa ya ọku; me evu ọbu; ?ọ nọ iya l'iphe; m'ọ nọ iya l'azu. ⁵⁶ Ọ -buru l'onye uke ono jeshiaru iya ele ẹnya; ẹka ono, tsuru evu ono rwakputewa arwakpute g'a sacharu iya ono; g'ọ lakafukwa ẹka ono, tsuru evu ono; mbu l'uwe ono; ọzoo l'akpọ ono; ọzoo l'ẹkwa ono, e kweru ekwekwe ono; ọzoo l'ọphu a kparu

akpakpa. ⁵⁷ Ọle ọ -buru l'ọ watawaru atsu evu ono ọzo l'uwe ono; ọzoo l'iphe ono, e kweru ekwekwe; ọzoo l'ọphu a kparu akpakpa; m'ọ bu l'iphe ono, e meru l'akpo-anu ono; l'a maru l'ọ bu iphe, asakahu asakahu. G'a kpokwaa iphe, bu iphe, tsuru evu ono oku. ⁵⁸ Iphe, bu iphe, tsuru evu, a sawaru asasa; ọphu evu ono aduedu iya; g'a saa ya k'ugbo ebo g'ọ buru iphe, a taa sohedu nsọ."

⁵⁹ Ono bu ekemu, duru iphe, bu evu, tsuru l'uwe eji anu; ọzoo l'uwe ọchaa; ọzoo l'ekwa, e kweru ekwekwe; ọzoo l'ọphu a kparu akpakpa; ọzoo l'ọphu e gude akpo-anu mee; g'a gwa ya iphe, a ta sọdu nsọ; ọzoo l'a gururu iya l'iphe, aaso nsọ.

14

Egoshi l'onye iphe eme l'akpo-ẹhu duwaa iche

¹ Tọbudu iya bu; Chipfu bya epfuru yeru Mosisu su iya: ² "Ọwaa bu ekemu, ee-tsoje mboku, ee-me onye ekpenta shi eme g'a ta sohe iya nsọ: G'e duru iya dutaru onye uke. ³ G'onye uke ono shikwa l'eka ndu Izurelu kpoberu ulo-ekwa phe lufu je elerwee ya enya ree. Ọ -buru l'onye ono wekorohuwaru l'ekpenta ono, shi eme iya l'akpo-ẹhu ono; ⁴ g'onye uke ono zia ozi g'e wotaru onye obu, eeme g'a ta sohe nsọ obu enu labo, no ndzu, a ta sọdu nsọ; waa oshi sida; waa ekwa uswe-uswe; waa eswa isopu. ⁵ Onye uke ono asu g'e gbua enu ono nanu l'eli ite, a kpuru l'urwa, e yeru mini, doru risaa. ⁶ Enu ọphu no ndzu pho be ọo-nwuta; wota oshi sida pho; waa

ẹkwa uswe-uswe pho; waa ẹsua isopu pho; tuko tsee le mee ẹnu ono, e gburu l'eli mini ono, du ree ono. ⁷ L'ọ bya epee ya onye ono ugbo ẹsaa; mbu onye ono, eeme g'a ta sọhe nsọ l'ekpenta ono, shi eme iya nu ono. L'ọ bya agua ya l'onye a ta sọdu nsọ; woru ẹnu k'ono, dzu ndzu ono haa g'o pheba l'egu. ⁸ Onye ono, byaru g'e mee ya g'a ta sọhe iya nsọ ono eje eworu uwe iya saa; kpushikota eji, du iya l'ehu g'o ha; me ẹgbushi iya; woru ẹhu wua le mini; shi nno buru onye a ta sọdu nsọ. E -mechaa nno; l'ọ batawaro l'ime ẹka ndu Ịzurelu kpoberu ulo-ẹkwa phe; ole g'o nokwaa l'azu ulo-ẹkwa iya ujiku ẹsaa. ⁹ O -nochaa ujiku ẹsaa g'o kpushikwaa eji, du iya l'ehu g'o ha ozo. G'o kpushia ishi; yee ẹj-agba; waa njibu-ẹnya; mewaro eji ozo, dugbaa ya l'ehu. L'ọ saa uwe iya; woru ẹhu wua le mini; oo ya bu; l'ọ buru onye a ta sọdu nsọ.

¹⁰ “Teke o rwuru le mboku k'esato; g'onye obu kputa unwu ebili labo, adudu ẹka iphe mebyiru iya; waa ada aturu, gbaru apha, adudu ẹka iphe mebyiru iya. Teme l'o gude uzo ẹto l'ime nkweka ukpokutu ereshi, e keru uzo ẹto; gwọo le manu; g'e gude iya gwee ngweja-nri. L'o wotakwapho manu, jiru konggo ejiji tukobe iya. ¹¹ Onye uke ono, eme iya g'a ta sọhe iya nsọ ono; abya eduta onye obu, eeme g'a ta sọhe nsọ obu; yee iphemiphe ono, o gude bya ono; bya eworu dobe l'iphu Chipfu l'onu-abata ulo-ẹkwa-ndzuko. ¹² L'ọ bya akputa nwa ebili ono nanu; yee konggo, manu jiru ejiji pho; gude gwee ngweja-apfu-ugwo. G'o maa ngweja ono

l'iphu Chipfu g'ọ bụru ngweja-amama.

¹³ “L'ọ bya eworu nwa ebili ono gbua l'ulo-du-nsọ; mbụ l'ẹka ono, eegbuje anụ, e gude egwe ngweja-iphe-ẹji; yẹ ngweja-akpọ-ọku. Oo ẹgube ono, ngweja-iphe-ẹji bụ k'onye uke bụkwapho gẹ ngweja-apfụ-ugwo bụkwapho nkiya; tẹme ọ bụru ngweja, du nsọ shii. ¹⁴ Onye uke ono emeta mee anụ ono, e gude gwee ngweja-apfụ-ugwo ono; ye onye ono, eeme g'a ta sọhe nsọ ono l'atakpa-nchị ẹkutara; waa lẹ mkpūshi-ẹka ezeke-ẹka ẹkutara; yẹ mkpūshi-ọkpa ezeke-ọkpa ẹkutara iya. ¹⁵ Onye uke ono abya emeta konggo manụ ono; bya emeru iya ye onwiya l'ọbochi-ẹka ẹkicha; ¹⁶ l'ọ bya eworu mkpūshi-ẹka ẹkutara tsee lẹ manụ ono; meta iya phee ugbo ẹsaa l'iphu Chipfu. ¹⁷ Manụ ọphu ghuduru iya l'ọbochi-ẹka bẹ ọ-tada onye ono, eeme g'a ta sọhe nsọ ono l'atakpa-nchị ẹkutara; waa lẹ mkpūshi-ẹka ezeke-ẹka ẹkutara; waa mkpūshi-ọkpa ezeke-ọkpa ẹkutara; waa l'eli mee anụ ono, e gude gwee ngweja-apfụ-ugwo ono. ¹⁸ Manụ ọphu ghuduru nụ bẹ oo-hu onye ono, byaru g'e mee ya g'a ta sọhe iya nsọ ono l'ishi; gude pfua ugwo iphe-ẹji onye ono l'iphu Chipfu.

¹⁹ “Onye uke ono abya egwee ngweja-iphe-ẹji ono; gude pfua ugwo iphe-ẹji, onye ono meru; mbụ onye ono byaru g'e mee ya g'a ta sọhe iya nsọ ono. E -mechaa; l'o woru anụ ono, ee-gude gwee ngweja-akpọ-ọku ono gbua; ²⁰ woru ngweja-akpọ-ọku ono; yẹ ngweja-nri, tso iya nụ l'ọru-ngweja; gude pfua ugwo iphe-ẹji onye ono

l'ò bya aburu onye a ta sòdu nsò.

²¹ “Òle ò -bùru l'onye òbu akpa nri; òphu ò dùdu ike anù iphemiphe ono, a gùshiru ono; g'onye òbu kpùta nwa ebili lanù nù g'ò bùru kẹ ngweja-apfù-ùgwò; l'e woru iya maa g'ò bùru ngweja-amama, e gude apfù ùgwò iphe-èji. Teme l'o wota nkeru-iri nkweka ukpokutu ereshi, a gwòru lẹ manù; g'ò bùru ngweja-nri; waa manù, jiru konggo; ²² mẹ ndo labò; òzoo kparaka labò; òphu rwukpòeru iya phò ẹka. Nanù bẹ ee-gude gwee ngweja-iphe-èji; l'e gude òphuu gwee ngweja-akpò-òku. ²³ O -be lẹ mbòku k'èsato l'ò chìru iphemiphe ono byapfuta onye uke g'e gude mee ya g'a ta sòhe iya nsò; gude iya bya l'ònu-abata ùlo-ẹkwa-ndzukò l'iphu Chipfu. ²⁴ G'onye uke ono kpùta nwaturu ono; yee konggo, manù jiru ejiji ono je amaa l'iphu Chipfu g'ò bùru ngweja-amama. ²⁵ L'o woru nwaturu ono gbua; meta mee ya tada onye òbu, eeme g'a ta sòhe nsò òbu l'atakpa-nchì ẹkutara; waa lẹ mkpùshi-ẹka ezeke-ẹka ẹkutara; wakwaphò lẹ mkpùshi-òkpa ezeke-òkpa ẹkutara. ²⁶ Onye uke ono abya emeta manù ono bya emeru ye onwiya l'òbochi-ẹka ẹkicha; ²⁷ l'o woru mkpùshi-ẹka ẹkutara iya phee manù ono ugbo ẹsaa l'iphu Chipfu. ²⁸ Onye uke ono abya emeta manù ono, dù iya l'òbochi-ẹka ono tada l'ẹka ono, ò tadaru mee anù ono, e gude gwee ngweja-apfù-ùgwò ono, bù iya bù l'atakpa-nchì ẹkutara onye ono, eeme g'a ta sòhe iya nsò ono; waa lẹ mkpùshi-ẹka ezeke-ẹka ẹkutara; waa lẹ mkpùshi-òkpa ezeke-òkpa ẹkutara iya. ²⁹ Manù òphu ghuduru

iya l'òbochi-ẹka bẹ oo-hu onye ono, byaru g'e mee ya g'a ta sòhe iya nsò ono l'ishi; gude pfa ụgwò iphe-ẹji iya l'iphu Chipfu. ³⁰ L'ò nwuta ndo ono; ọzoo kparaka ono, bu ọphu onye ono duru ike gbata; gude gwee ngweja. ³¹ Nanu bẹ oo-gude gwee ngweja-iphe-ẹji; l'ò gude ọphuu gwee ngweja-akpo-oku; yee ngweja-nri. Oo egube ono bu g'onye uke a-nodu l'iphu Chipfu pfa ụgwò iphe-ẹji onye ono, eeme g'a ta sòhe nsò ono. ³² Ono bu ekemu, duru onye oome; mbu ekpenta ono; ọphu ọ dudu ike gbata iphe, eegude mee g'a ta sòhe iya nsò."

Ẹka igbulọ tsuru evu

³³ Tòbudu iya bu; Chipfu bya epfuru yeru Mòsisu yee Eronu; su phe: ³⁴ "Unu -laepho ali Kènanu ono, bu ẹka mu abya anu unu g'ò buru okiphe unu ono; ọ -buru l'ò duru ọlo, nò l'ali ono, mu meru; o nweru ẹka tsuru evu; ³⁵ g'onye nwe ọlo ono jekwa akọoru onye uke l'ọlo iya gbekwa du iya g'ò tsuru evu. ³⁶ Onye uke ono a-su g'e gweshigbua iphe l'ọlo ono; teme l'ò bahu jeshia ahuma ẹka tsuru evu obu; ọo ya bu g'ò tọ tuko ọlo ono; yee iphe, nò iya nu gua l'iphe, aaso nsò. E -gweshikotachaa iphe l'ọlo ono; g'onye uke ono bahu l'ọlo obu je elee ya enya. ³⁷ G'ò lee enya l'igbulọ ẹka tsuru evu obu; teke ọ bu l'ò du oyingo-oyingo; ọzoo l'ò du uswe-uswe; teme ẹka obu dalahu adalahu; ³⁸ g'onye uke ono lufuta l'ọlo ono; woru onu iya gu-chia g'ò nọ ujiku esaa. ³⁹ O -be le mboku k'esaa; g'onye uke laphu azu je elee enya l'ọlo obu ozo. O -buru l'evu obu sakahuru l'oma igbulọ ono; ⁴⁰ l'ò su g'e

bvufu mkpuma ono, tsuru evu ono je etuphaa l'eka aaso nsọ l'azu mkpukpu. ⁴¹ L'e kwoshia igbulọ ime ọlo ono ekwoshi mgburugburu; kpota iphe, e kwoshiru iya je awushia l'azu mkpukpu l'eka aaso nsọ. ⁴² L'e wota mkpuma ozo gude tuchishia enya iya ophu e bvukpofugbaaru pho; teme l'a kutakwapho epuchi ozo gude rwaa ọlo obu ozo.

⁴³ “Teke o bu l'evu obu chafutaru l'ulo obu ozo g'e bvukpofuchaaru mkpuma mkpuma pho; e kwoshichaa ya; bya arwaphu iya azu obu; ⁴⁴ g'onye uke laphu azu jee elee ya enya ozo; teke o bu l'evu obu bakahuru l'ulo obu be o bukwa evu, asakahu asakahu du l'ulo ono; oo ya bu; l'a maru l'ulo obu buwaa ọlo, aaso nsọ. ⁴⁵ G'e woru ọlo obu gbukaa; vuta mkpuma ọlo obu; me oshi iya; waa eja, e gude rwaa ya je awushia l'azu mkpukpu l'eka aaso nsọ. ⁴⁶ Onye bahuru l'ulo ono teke ono, a gu-chikwaduru iya agu-chi ono; be a-buru onye aaso nsọ jasụ nchi ejihu. ⁴⁷ Onye zeru l'ulo ono kua mgbenya; ozoo ria nri; g'onye ono sakwaa uwe iya asasa.

⁴⁸ “Ole o -buru l'onye uke byaru g'o lee ọlo ono enya; o huma l'evu ono ta aduedu eka o noba l'ulo ono g'a rwaphuchaaru iya azu; g'o gua ọlo ono l'ulo, a ta sodu nsọ; noo kele evu obu ta aduedu. ⁴⁹ Iphe, oo-gude mee ọlo ono g'o to buhe ọlo, aaso nsọ; bukwa g'o nwuta enu labo; wotakwapho oshi sida; waa ekwa uswe-uswe; waa eswa isopu. ⁵⁰ L'o woru enu lanu gbua l'eli ite, a kpuru l'urwa, e yeru mini, doru riasa. ⁵¹ L'o wota oshi sida pho; waa eswa isopu pho; waa ekwa uswe-uswe pho; yee enu pho,

dzụ ndzụ phọ; tũko tsee ọ mee ọnu ọphụ e gburu egbugbu phọ; yele mini phọ, dị ree phọ; woru iya phee l'ulo ono akpọ ọsaa. ⁵² Oo-gude mee ọnu phọ; waa mini phọ, dị ree phọ; waa ọnu ọphụ nọ ndzụ phọ; waa oshi sida phọ; waa ọsua isopu phọ; waa ọkwa uswe-uswe phọ mee ọlo ono g'a ta sọhe iya nsọ. ⁵³ L'o gude ọnu k'ọphụ nọ ndzụ phọ lufu azụ mkpukpu je ahaa ya g'ọ pheba l'oma ọgu. Ọ kwa ọgube ono bẹ oo-shi pfula ugwo iphe-aji; shi nno safu nturuwu, dị l'ulo ono. Ọo ya bụ l'ulo ọbu aburu ọlo, a ta sọdu nsọ."

⁵⁴ Ono bụ ekemu, g'ee-meje k'ekpenta, dukpoo l'udu iya l'udu iya; yee ọjọ akuruba; ⁵⁵ waa k'evu, turu l'uwe; yee ọphụ turu l'ulo; ⁵⁶ waa k'onnye ọnyá dị l'ẹhu; ọzoo iphe dị g'ekpá; ọzoo onye iphe tukashiru poopoo l'ẹhu; ⁵⁷ g'e shi ọgube ono goshi teke iphe, bụ iphe, aasọ nsọ; waa teke ọ bụ iphe, a ta sọdu nsọ. Ono bụ ekemu, g'ee-meje k'ekpenta; waa k'iphe, tsuru evu.

15

Onye iphe asoshi l'ẹhu

¹ Tọbudu iya bụ; Chipfu bya epfuru yeru Mosisu yee Erọnu: ² "Unu pfuru yeru ndu Ízurelu; sụ phe-a: Ọ -duru onye nweru iphe, asoshi iya asoshi l'ẹhu; bẹ iphe ono, asoshi iya l'ẹhu ono bụkwa iphe, aasọ nsọ. ³ Iphe ono meakwaru onye ọbu; ọ bụru onye aasọ nsọ; mę iphe ọbu nọdu asoshi g'ọsososhi; ọzoo l'ọ duru iphe, e gude gbobuta iya bẹ ọ bụekwapho iphe,

meru; a nọdu asọ iya nsọ. ⁴ Iphe, bukpo iphe-azẹe, onye ono, iphe asoshi l'ẹhu ono zẹru azẹe bẹ buakwaa iphe, aasọ nsọ; tẹme iphemiphe, bu iphe, ọ nọru anọ l'a-bukwarupho iphe, aasọ nsọ. ⁵ G'onye denyiru ẹka l'iphe-azẹe onye obu; sakwaa uwe iya asasa; wua ẹhu. A -nọwaa jasụ nchi jihu bẹ a taa sọhedu iya nsọ. ⁶ Onye nọru anọ l'iphe, onye iphe shi l'ẹhu asoshi shi nọdu anọ; g'onye ono sakwaa uwe iya; wua ẹhu. A -nọwaa jasụ nchi jihu bẹ a taa sọhedu iya nsọ. ⁷ G'onye denyiru onye iphe shi l'ẹhu asoshi ẹka sakwaa uwe iya; wua ẹhu. A -nọwaa jasụ nchi jihu bẹ a taa sọhedu iya nsọ. ⁸ Onye ono, iphe asoshi l'ẹhu ono -gbua onye a ta sọdu nsọ ọnumini; g'onye obu sakwaa uwe iya; wua ẹhu. A -nọwaa jasụ nchi jihu bẹ a taa sọhedu iya nsọ. ⁹ Tẹme iphe, aagbajẹkpo agbagba, onye ono, iphe asoshi ono nọru gbaa bẹ buakwaa iphe, aasọ nsọ; ¹⁰ tẹme onye denyiru ẹka l'iphe, onye obu shi nọdu anọ; g'a sọkwaa onye obu nsọ jasụ nchi ejihu. Onye wotaru iphe obu bẹ a-sakwa uwe iya wua ẹhu. A -nọwaa jasụ nchi jihu bẹ a taa sọhedu iya nsọ. ¹¹ Onye iphe shi l'ẹhu asoshi -denyi onye ọzo ẹka; ọphu ọ kwoduru ẹka; g'onye ono sakwaa uwe iya asasa; wua ẹhu. A -nọwaa jasụ nchi jihu bẹ a taa sọhedu iya nsọ. ¹² Ọ -buru ite, a kpuru l'urwa bẹ onye obu denyiru ẹka; g'a tukupkwaa ya; teke ọ bu iphe, e gude oshi mee; g'e gudekwa mini saa iphe obu asasa.

¹³ “Onye ono, iphe asoshi l'ẹhu ono -kaẹpho mma; g'ọ gutaru onwiya ujiku ẹsaa nọ g'e gude mee ya g'a ta sọhe iya nsọ; l'ọ saa uwe iya; gude

mini, doru rişaa wua ẹhu; l'ọ bya aburu onye a ta sọdu nsọ. ¹⁴ O -be ẹ mbọku k'ẹsato l'ọ nwuta kparaka labọ; ọzoo unwu ndo labọ gude bya l'ataphu Chipfu l'ọnu-abata ọlo-ẹkwa-ndzuko; bya anụ iya onye uke. ¹⁵ Onye uke anwuta iya gude gwee ngweja. Nanụ bẹ oo-gude gwee ngweja-iphe-ẹji; l'ọ gude ọphuu gwee ngweja-akpọ-ọku. Noo g'ee-shi bụ ono l'ọ pfa ụgwo iphe-ẹji onye ono, iphe asọshi l'ẹhu ono l'iphu Chipfu.

¹⁶ “Teke nwoke gbọshiru unwuda; g'ọ wukotakwa ẹhu iya l'ophu. A -nọwaa jasụ nchi jihu bẹ a taa sọhedu iya nsọ. ¹⁷ Ẹkwa; ọzoo akpọ, a gbọru unwuda kpua bẹ ee-gude mini saa asasa. A -nọwaa jasụ nchi jihu bẹ a taa sọhedu iya nsọ. ¹⁸ Nwoke yẹ nyee ya -kwaa akwakwa; ọ -buru ẹ nwoke ono gbọru iphe; g'ẹphenebo jekwa awua ẹhu. A -nọwaa jasụ nchi jihu bẹ a taa sọhedu phe nsọ.”

Nwanyị, anọ nsọ

¹⁹ “Ọ -buru ẹ nwanyị bẹ nsọ-nwanyị eme bẹ ọo-buru onye mmerwu dụ l'ẹhu abali ẹsaa; ẹme onye denyiru iya ẹka a-buru onye aasọ nsọ jasụ nchi ejihu. ²⁰ Iphe, bụ iphe, ọ zẹkpooru azẹ teke ono, ọono nsọ ono; ọzoo iphe, ọ nọru anọ bẹ tukoakwaru buru iphe, aasọ nsọ. ²¹ Onye denyiru iphe-azẹ ya ẹka; a-sa uwe iya asasa; wua ẹhu. A -nọwaa jasụ nchi jihu bẹ a taa sọhedu iya nsọ. ²² Onye denyiru iphe, ọ nọru anọ ẹka; a-sa uwe iya asasa; wua ẹhu. A -nọwaa jasụ nchi jihu bẹ a taa sọhedu iya nsọ. ²³ Onye denyiru iphe-azẹ ya ẹka; ọzoo oshi,

oŋoŋe aŋo eka be buakwaa onye aa-sò nsò jasu nchi ejihu. ²⁴ O -buru le nwoke jepfuru nwanyi, aŋo nsò; mee ono, ala nwanyi ono -rwua ya l'ehu; g'a sòkwaa ya nsò ño abali esaa. Teme iphe, nwoke ono zeru azee g'o ha abukotaru iphe, aasò nsò.

²⁵ "O -buru le nwanyi be mee laru ujiku olemole le teke o too ñodu nsò; ozoo le mee obu laghataru onye obu ujiku ole, oŋoŋe nsò; g'a sòkwaa onye obu nsò g'aasoje iya me o -ñodu aŋo nsò pho. ²⁶ Iphe, bukpo iphe-azee, o zeru azee l'iphe, bukpo mboku le mboku ono, mee ono ala iya ono; be aa-sòkwapho nsò g'a sòru iphe-azee, ozeje me o -ñodu aŋo nsò pho. Iphe, bu iphe, o ñoru aŋo; g'a sòkwaa ya pho egube ono, aasoje iya me o -ñodu aŋo nsò ono. ²⁷ Iphe, bu onye denyiru eka l'iphe ono buakwaa onye aasò nsò. G'onye ono sakwaa uwe iya; wua eh. A -nòwaa jasu nchi jihu be a taa sòhedu iya nsò. ²⁸ Obenu le-a; mee obu -labuhue ya pho; g'o gutaru onwiya ujiku esaa ño. E -mechaa l'o bya aburu onye a ta sòdu nsò ²⁹ O -be le mboku k'esato g'onye obu nwuta kparaka labo; ozoo unwu ndo labo; nwutaru onye uke l'onu-abata ulo-ekwa-ndzuko. ³⁰ G'onye uke ono nwuta enu lanu gude gwee ngweja-iphe-eji; l'o gude ophuu gwee ngweja-akpo-oku. Onye uke ono e-shi nno pfua ugwo iphe-eji nwanyi ono l'iphu Chipfu le ke mee ono, laru iya nu ono, shi mee ya; o buru onye aasò nsò ono.

³¹ "Noo g'unu e-shije dobe unwu Izurelu iche l'iphe, e-me g'ephe buru ndu aasò nsò; g'ephe

ta aburu ndu aasọ nsọ; nwụhu; m'ephe turwua ụlo-ekwa mu ono, nọ l'echilabọ phẹ ono.”

³² Ono bụ ekemu, a turu doberu nwoke, iphe asoshi asoshi l'ẹhu; yee nwoke, gboru unwuda; shi nno buru onye aasọ nsọ; ³³ bya abukwarupho ke nwanyi, nsọ-nwanyi eme. O bụ k'onye iphe asoshi l'ẹhu; m'ọ bụ nwoke-o; m'ọ bụ nwanyi-o; yee k'onye jepfuru nwanyi, aasọ nsọ.

16

Eswē apfu ugwo iphe-iji

(Uke 23:26-32; Ógú 29:7-11)

¹ O be le g'unwu Eronu duchaa ẹbo nwụhu; g'ephe jekubeerupho l'ataphu Chipfu phọ; Chipfu bya epfuru yeru Mosisu; ² sụ iya: “Pfuru yeru nwune ngu, bụ Eronu sụ iya g'ọ tọ bujekwarupho teke dụ iya ree be ọo-byaje l'eka-kakota-adu-nsọ ono; mbụ l'eka ono, e gude ekwa kobuta ono, bụ iya bụ l'iphu ẹka aapfuje ugwo iphe-iji, bụ ophu nọ l'eli okpoko Chileke ono; odumeka be ọo-nwuhukwa. Noo kele mu anoduje l'urwukpu bya l'eli ẹka aapfuje ugwo iphe-iji ono. ³ Waa ge Eronu e-gudeje bahu l'eka-kakota-adu-nsọ ono baa: Oo-gude nwa oke-eswi, oo-gude gwee ngweja-iphe-iji; bya egude ebili, oo-gude gwee ngweja-akpo-oku.

⁴ “L'ọ chita uwe-ime-ẹhu ocha, e doberu nsọ phọ yee; bya eyekwaaphọ nwiba ocha, eeyeje l'ime ẹhu; l'ọ wota ekwa-ochaa atụ-butal'upfu gude tubuta onwiya; bya ewota okpu-ekwa ocha kpuru. Uwe ono g'ọ ha dukota nsọ;

noo g'o gude o je l'a-wuada ẹhu ẹme l'o gude uwe ono kwaa onwiya akwa ono.

⁵ “Ge ndu Ízurelu kpẹe Erõnu mkpi labọ g'o gude gwee ngweja-iphe-ẹji; waa ebili lanu, oo-gude gwee ngweja-akpo-ọku. ⁶ Ge Erõnu kputa oke-eswi phọ gude gwee ngweja-iphe-ẹji ke nkiya; shi nno pfua ugwo iphe-ẹji, o meru; yee ke ndibe iya l'ataphu Chipfu. ⁷ L'o bya akputa mkpi labọ phọ bya l'ataphu Chipfu l'õnu-abata ulo-ekwa-ndzuko. ⁸ Erõnu abya eworu ido tũaru mkpi labọ ono. Idõ lanu a-buru ke Chipfu; ophu aburu ke Azazelu. ⁹ Erõnu abya akputa mkpi ophu idõ Chipfu daru gude gwee ngweja-iphe-ẹji; ¹⁰ obenu le mkpi ophu idõ ke Azazelu daru be aa-kputa le ndzu bya l'ataphu Chipfu g'e gude iya pfua ugwo iphe-ẹji; ẹme l'a kputawa iya ro je ahaa l'echiegu g'o lapfu Azazelu.

¹¹ “Erõnu abya akputa oke-eswi phọ, oo-gude gwee ngweja-iphe-ẹji; gude pfua ugwo iphe-ẹji onwiya yee ke ndibe iya phọ. L'o woru oke-eswi ono gbua g'o buru ngweja-iphe-ẹji k'onwiya ono. ¹² L'o wota iphe, aaguje oku; vota oku l'oru-ngweja, no l'ataphu Chipfu; vo-jia ya avo-ji; bya ahata unwu-isensu ophu e-ji mkpoji eka labọ, e gweru rwukuru rwukuru; gude bahu l'eka ono, e kobutaru eka ono. ¹³ L'o bya eworu unwu-isensu ono tukobe l'eli oku ono, no l'ataphu Chipfu ono; k'ophu enwuru-oku unwu-isensu ono a-kpu tuuu kpu-chia eka ono, aanoduje apfu ugwo iphe-ẹji ono, no l'eli okpoko ono, e doberu ekemu ono. Oo ya bu k'ophu o toonwuhudu. ¹⁴ L'o meta mee oke-eswi ono; gude

mkpushi-eka phee ya l'eli eka ono, aapfuje ugwo iphe-eji ono; l'o gudekwapho mkpushi-eka phee mee-iphe ono mgbo esaa l'iphu eka ono, aapfuje ugwo iphe-eji ono.

¹⁵ “L'o woru mkpi pho, e gude gwee ngweja-iphe-eji ndu Ízurelu pho; woru gbuwa egbugbu; gude mee ya bahu l'ime eka ono, e kobutaru eka ono; woru mee ya ono mee g'o meru mee oke-eswi pho; mbu phee ya l'eli eka ono, aapfuje ugwo iphe-eji ono; yele iphu eka ono, aapfuje ugwo iphe-eji ono. ¹⁶ O buru egube ono be oo-shi pfua ugwo iphe-eji k'eka-kakota-adu-nsa ono; kele ndu Ízurelu be buwaa ndu aasa nsu; waa kele ephe meswewaru iphe l'iphe-eji, ephe mekotaru g'o ha. O bukwarupho nno bu g'oo-me iya le k'ulo-ekwa-ndzuko, bu ophu no l'echilabo phe teke ono, ephe bu ndu aasa nsu ono. ¹⁷ G'o to dukwa onye a-nodu l'ime ulo-ekwa-ndzuko ono; me Eronu bahuepho l'eka-kakota-adu-nsa ono je anodu apfu ugwo iphe-eji; jasu l'o pfughee ugwo iphe-eji k'onwiya; ye ke ndibe iya; ye ke ndu Ízurelu l'ophu; lufuta. ¹⁸ E -mechaa l'o jeshia l'oru-ngweja ono, no l'ataphu Chipfu ono; je apfua ugwo iphe-eji k'eka ono. L'o meta mee oke-eswi pho; ye mee mkpi pho; wuru ye le mpu, e mobegbaaru l'oru-ngweja ono. ¹⁹ L'o meta mee ono gude mkpushi-eka iya phee ya l'oru-ngweja ono mgbo esaa; shi nno swafu iya asa nsu ke ndu Ízurelu; dobe iya nsu ozo.”

Mkpi, vu iphe-eji, ndu Ízurelu meru

20 “Erõnu -pfuchaa ugwo iphe-èji, e meru l'èka-kakõta-adu-nsõ ono; yee k'ulo-èkwa-ndzuko ono; yee k'õru-ngweja ono; l'õ bya akpufuta mkpi phõ, nõ ndzõ phõ. 21 L'õ bya eworu èka labõ byabè mkpi k'ono, nõ ndzõ ono l'ishi; mbu Erõnu; bya atuko èjo-iphe, ndu Ízurelu mekõtaru; mekpoo emeswe, ephe meswekõtaru; yee iphe-èji, ephe mekõtaru g'õ ha; pfushikõta kpua ya; l'õ tuko iya byabè mkpi ono l'ishi; kpuru iya kpèe onye a turu èka g'õ je ahaa ya l'echiègu. 22 O buru mkpi ono e-vutakõta èjo-iphe phè g'õ ha laa l'õma-ègu; èka e budu ebubu; je anõdu. O buru èka oo-je ahaa mkpi ono bu l'echiègu.

23 “Erõnu abahu l'ulo-èkwa-ndzuko je eyefu uwe õchaa ono, o yeru tème õ bahushia l'èka-kakõta-adu-nsõ ono. O -yefuchaa ya l'õ haa ya l'èka ono. 24 L'õ nõdu l'èka du nsõ wua èhu; woru uwe iya ye; lufuta bya egwee ngweja-akpõ-õku kè nkiya; yee kè ndu Ízurelu; shi nno pfua ugwo iphe-èji k'onwiya yee kè ndu Ízurelu. 25 L'õ woru èba-anu, e gude gwee ngweja-iphe-èji phõ kpõõ õku l'õru-ngweja. 26 Onye phõ, jeru je ahaa mkpi phõ; g'õ lapfu Azazelu phõ; l'a-sakwaphõ uwe iya; wua èhu; tème l'õ batawarõ l'ime èka ndu Ízurelu kpõberu ulo-èkwa phè. 27 Oke-eswi phõ; yee mkpi phõ, e gude gwee ngweja-iphe-èji phõ, bu õphu e wobataru mee ya l'èka-kakõta-adu-nsõ g'e gude pfua ugwo iphe-èji phõ; bè aa-paru lufu l'azu èka ndu Ízurelu kpõberu ulo-èkwa phè; l'e woru akpõ iya; waa anu iya; mekpoo nshì iya kpõõ õku. 28 G'onye ono, jeru akpõõ ya

ọku ono sakwaa uwe iya asasa; wua ẹhu; ẹme l'ọ bata l'ime ẹka ndu Ízurelu kpọberu ọlo-ẹkwa phe.”

Ekemu eswe apfu ụgwo iphe-ẹji

²⁹ “No iya; g'iphe-a bukwaru iphe, Chileke toru ọkpa iya sụ g'e tsoje, unu e-meje jasụ l'ojejoje. Mbụ-a; o -rwuje l'ọnwa ẹsaa; ẹ mbọku, ọnwa ono dụ l'abalị iri; unu aswiye ẹgu. Unu te ejekwa ozi ejeje ophu; mbụ unubẹ ndu a nwuru ẹ Ízurelu; mẹ ndu lwaru alwalwa, bu l'echilabọ unu; ³⁰ ẹke ọo mbọku ono bẹ aa-pfu ụgwo iphe-ẹji, unu meru; g'e gude sachafu unu iphe-ẹji, unu meru g'ọ ha; unu aburu ndu a ta sọdu nsọ l'iphu Chipfu. ³¹ Mbọku ono a-buru unu eswe Sabatu, bụ eswe-atuta-unme; unu aswĩa ẹgu. Iphe ono bụ iphe, Chileke toru ọkpa iya sụ g'e tsoje, unu e-meje jasụ l'ojejoje. ³² Ọ bụru onye uke, a wuru manụ l'ishi dobe nsọ g'ọ bụru onye uke l'ọzori nna iya bụ onye a-pfu ụgwo iphe-ẹji ọbu. Oo-yeje uwe ọchaa ono, dụ nsọ ono. ³³ L'ọ pfua ụgwo iphe-ẹji, e meru l'ẹka-kakọta-adu-nsọ; mẹ k'ulo-ẹkwa-ndzuko; mẹ k'oru-ngweja; l'ọ bya apfua ụgwo iphe-ẹji, ndu-uke meru; mẹ ke ndu Ízurelu l'ophu. ³⁴ Ono a-buwaruro iphe, Chileke toru ọkpa iya sụ g'e tsoje, unu a-nọdu emewarọ jasụ l'ojejoje; mbụ l'aa-pfujẹ ụgwo iphe-ẹji, unwu Ízurelu l'ophu mekọtaru. Ọ bụru mgbo lanu l'apha bẹ ee-meje iya.”

E mekọtaepho iphemiphe gẹ Chipfu suru Mosisu g'e mee ya.

17

Ekemu g'a ta tajeshi mee-iphe

¹ Tɔbudu iya bu; Chipfu bya epfuru yeru Mosisu su iya: ² “Waa iphe, ii-pfuru yeru Erɔnu yee unwu iya; yee unwu Ízurelu l'opfu baa; su phe-a: Wakwa iphe, Chipfu tɔru ekemu iya baa: ³ Ọ -duru onye Ízurelu gburu eswi; ọzoo nwaturu; ọzoo egbu l'ime eka ephe kpɔbegbaaru ọlo-ekwà phe; ọzoo l'azu eka ono; ⁴ ọpflu onye ono egudedu iya bya l'onu-abata ọlo-ekwa-ndzukọ g'e gude gwee ngweja nu Chipfu l'ipfu ọlo-ekwa Chipfu ono; onye ono be ikpe ọchi nmaakwaru; ọ buakwaa ọchi be o gburu. G'e bufukwa iya le ndu nkiya. ⁵ Iphe, meru iphe, a tɔru ekemu-a bu g'o mee ge ndu Ízurelu wotaje ngweja ono, ephe anɔduje egwe l'oma egu ono; bya egweru nu Chipfu; mbu g'ephe woru iya nu onye uke l'onu-abata ọlo-ekwa-ndzukọ; g'o gbua ya g'ọ buru ngweja-ehuguu, e gweru Chipfu. ⁶ Onye uke ono ephee mee anu ono l'oru-ngweja l'onu-abata ọlo-ekwa-ndzukọ; bya akpọ eba iya oku g'ọ buru ngweja, mkpọ iya du Chipfu ree. ⁷ Ephe te egweeduru ngweja phe anu agwa, a kpuru; ọ du g'eghu; mbu agwa ono, meru ephe du gheleghelehele ono. Ono bu iphe, Chipfu tɔru okpa iya su g'e tsoje, ephe a-nɔdu eme jasụ l'ojejoje; ephe eme iya; e -shi l'ogbo sweru ogbo.

⁸ “Su phe le-a: Onye bu onye Ízurelu; ọzoo onye lwaru alwalwa, ephe l'ephe bu, bu onye gweru ngweja-akpọ-oku; ọzoo l'ọ duru ngweja

ozo, o nuru; ⁹ ophu o gudedu iya bya l'onu-abata ulo-ekwa-ndzuko bya egweru nu Chipfu; g'e bufukwa onye obu le ndu nkiya.

¹⁰ "Iphe, bukpo onye Izurelu; ozoo onye lwaru alwalwa l'ali Izurelu, taru mee-iphe be mu a-noduepho achi le njo; mbu l'onye ono, taru mee-iphe ono; be mu e-bufu le ndu nkemu.

¹¹ Noo kele ndzu iphemiphe, e meru ememe dobe bu le mee be o du. O kwa mee ono be mu nuru unu g'unu gudeje iya bya apfu ugwo iphe-eji unu l'oru-ngweja. O buru mee be eegudeje apfu ugwo ndzu nemadzu. ¹² Oo ya kparu iphe, mu suru unube ndu Izurelu: G'o to dukwa g'unu ha onye a-taje mee-iphe; ophu o dukwa onye lwaru alwalwa, unu l'ephe bu ebubu, a-taje mee-iphe.

¹³ "O -duru onye Izurelu; ozoo onye lwaru alwalwa, unu l'ephe bu, akpa l'egbudu; o -gbua anu; ozoo enu, a ta sodu nsu; g'onye ono phushikwaa mee ya l'ali kpochia ya eja. ¹⁴ Noo kele iphemiphe, no ndzu, e meru ememe bu le mee be ndzu iya no. O buru iya kparu, iphe, mu suru ndu Izurelu: 'Unu ta adukwa mee iphe, unu a-taje; kele ndzu iphemiphe, e meru ememe bukota le mee be o no; l'onymonye taru iya nu be ee-bufukwa ebufu.'

¹⁵ "Onymonye kp; m'o bu onye a nwuru le Izurelu; m'o bu onye lwaru alwalwa, bu onye taru iphemiphe, bu iphe, nwuhuru anwuhu; ozoo iphe, anu dzugburu; be a-sa uwe iya asasa; wua eh; l'o buru onye aaso nsu jasu nchi ejihu; teme l'o buru onye a ta sodu nsu. ¹⁶ Ole o -buru l'onye obu ta saduru uwe iya; ophu o wuduru

ẹhu; bẹ ejo-iphe ọbu, o meru tukokwaru iya l'ishi.”

18

Akwakwa nwoke yẹ nwanyi ọphu adudu ree

¹ Tọbudu iya bụ; Chipfu bya epfuru yeru Mósisu sù iya: ² “Waa iphe, ii-pfuru yeru unwu Ízurelu baa; sù phẹ-a: Ọ kwa mbedua bụ Chipfu; bya aburu Chileke unu. ³ Unu te emekwa g'eemeje lẹ Ijiputu, bụ iya bụ ẹka ono, unu shi buru ono; tẹme ọphu unu emekwa g'eemeje l'ali Kénanu, bụ ali ẹka ono, mu edu unu ala ono. Unu te etsokwa ẹka phẹ. ⁴ Unu mejekwa iphe, mu turu l'ekemu; waa iphe, mu tọru ọkpa iya sù g'e tsoje; kele ọ kwa mbedua bụ Chipfu; bya aburu Chileke unu. ⁵ Unu tsojekwa iphe, mu tọru ọkpa iya sù g'e tsoje; unu emekwaphọ iphe, mu turu l'ekemu, bụ iphe, onye meru iya nù e-gude nọdu ndzù. Ọ kwa mbedua bụ Chipfu.

⁶ “G'ọ tọ dukwa onye e-jepfu onye ẹphe l'iya bụ ọkpobe abubu g'ẹphe l'iya kwaa; kele ọ kwa mbedua bụ Chipfu. ⁷ Te ejekwa g'unu lẹ ne ngu kwaa; shi nno mee nna ngu iphe-iphere; noo kele onye ọbu bụ ne ngu. G'unu lẹ ne ngu ta akwakwaa akwakwa nwoke yẹ nwanyi. ⁸ Te jepfukwa nyee nna ngu; kele ọ kwa eme nna ngu iphe-iphere. ⁹ Te jepfukwa onye unu l'iya bụ nwune ọzoo nwanna; m'ọ bụ l'unuphu lanu bẹ e yeru unu; ọzoo l'e yeru iya l'ibe onye ọzo. ¹⁰ Te jepfukwa nwanwa ngu; m'ọ bụ nwa ngu nwoke nwuru iya; ọzoo nwa ngu nwanyi nwuru iya; kele ono bukwa eme onwongu iphe-iphere. ¹¹ Te

jepfukwa nwada nyee nna ngu; mbụ onye e yeru nna ngu; noo kele ọ bụ nwanna ngu nwanyi. ¹² Te jepfukwa nwune nna ngu; noo kele ephe le nna ngu bụ mee lanu. ¹³ Te jepfukwa nwune ne ngu; noo kele ephe le ne ngu bụ mee lanu. ¹⁴ Te jepfukwa nyee nwune nna ngu; shi nno mee nwune nna ngu obu iphe-iphere, noo kele ọo nyee nwune nna ngu. ¹⁵ Te jepfukwa nyee nwa ngu; kele ọo nyee nwa ngu be ọ bụ. Be jepfukwa iya. ¹⁶ Te jepfukwa nyee nwune ngu; kele ọ kwa eme nwune ngu iphe-iphere. ¹⁷ Te jepfukwa nwanyi; yee nwa iya; ophu i jepfukwa nwanwa nwanyi ono; ozoo onye ophu nwa iya nwoke nwuru; ozoo onye nwa iya nwanyi nwuru; noo kele ephe l'iya be bụ mee lanu. Onye eme nno eme ejo-ememe. ¹⁸ Te ejekwa aluta nwune nyee ngu g'ephe le nwune iya bya anodu kpaaha enya l'ibe ngu. Teme unu l'iya akwaa akwakwa nwoke yee nwanyi l'eka nyee ngu nokwadu ndzu.

¹⁹ “Te jepfukwa nwanyi teke onono nsọ; mbụ teke aasokwadu iya nsọ ke nsọ-nwanyi ono, eme iya nu ono. ²⁰ Te jepfukwa nyee nwoke obutobu ngu; shi nno merwua onwongu. ²¹ Ta adukwa unwu ngu ophu ii-kwe g'e gude kpoo oku gude gwaa agwa ono, bụ Moleku; mbu-a; te shikwa egube ono merwua epha Chileke ngu. O kwa mbedua bụ Chipfu. ²² Te jepfukwa nwoke ibe ngu g'unu l'iya kwaa akwakwa nwoke yee nwanyi; kele ono bukwa ebyi. ²³ Te jepfukwa anu; shi nno merwua onwongu. G'ọ to dukwa nwanyi, a-togbo onwiya g'anu jepfu iya; kele ono bukwa ejo ahuma be ọ bụ.

24 “G’o tọ dukwa iphe ono mę nanu, unu egude merwua onwunu; noo kele ọ iphemiphe-a be ọhamoha gude merwushia onwophe; mbu ndu-a, mu abya achifu l’iphu unu-a. 25 Umere phe ono woru ali ẹka ono merwushia; mu nua ndu ẹka ono aphu; ali ono gboshia ndu bu iya nu g’onye gboru egbo. 26 Oke-a; unu tsojekwa iphe, mu toru okpa iya su g’e tsoje; waa iphe, mu turu l’ekemu. Ophu o dukwa onye e-je eme iphe ono, bu ahuma ono mę nanu. G’onye a nwuru le Izurelu te emekwa iya; ophu onye lwaru alwalwa emekwa iya; 27 kele ọ ahuma ahuma ono g’o ha be ndu ali-a meru; mbu ndu ono, vuru unu ọzo bua l’eka-a; ephe merwushia ali-a. 28 O kwa k’ophu ali ono ata agboshidu unu g’onye gboru egbo; mę unu merwushie ya pho; egube ono, o gboshiru oha ono, vu unu ọzo ono. 29 Kele o -duru onye meru ahuma ahuma ono; be ee-bufukwa onye ono le ndu nkiya.

30 “Noo g’o gude unu je l’emeje iphe, mu suru g’e meje; g’o tọ du ejo omelali ono ophu unu emeje, bu ophu e shi emeje teme unu lwa ono; ophu unu egude iya merwushia onwunu; kele o kwa mbedua bu Chipfu; bya aburu Chileke unu.”

19

Ekemu, ekemu ozo dugbaa nu

1 Tobudu iya bu; Chipfu bya epfuru yeru Mosisu su iya: 2 “Waa iphe, ii-pfuru yeru unwu Izurelu l’ophu baa; su phe le-a: Unu dukwa nsọ; kele mbedua, bu Chipfu bya aburu Chileke unu dukwa nsọ. 3 G’onyenonu l’ime unu kwabejekwa

ne iya ẹphe ẹ nna iya ùbvù. Unu edobeje ekemu eswe-atùta-unme mu; ẹkele ọ kwa mu bụ Chipfu; bya aburu Chileke unu.

⁴ “Unu te jejekwa l'agwa; ọphu unu akpukwa agwa akpukpu doberu onwunu; ẹkele ọ kwa mbedua bụ Chipfu; bya aburu Chileke unu.

⁵ “Unu -nọdu egweru Chipfu ngweja-ẹhu-guu; unu gwejekwa iya l'uzo, ọo-nata iya unu. ⁶ G'a tajekwa iphe ngweja ọbu ẹ mbọku, unu gweru iya; ọzoo ẹ nchitabọhu iya. Ọ -buru l'o duru ọphu phoduru jasụ ẹ mbọku k'eto; g'a kpoo ya oku. ⁷ Ọ -bukwanuru l'a taru iya ilile ẹ mbọku k'eto ono be ọ buakwaa ahuma be e meru; ọphu a taa nataekwa iya. ⁸ Ọo ya bụ l'onymonye, bụ onye taru iya nu be ẹjo-ipe, o meru a-tukoru l'ishi; ẹkele o merwuru iphe, duru Chipfu iche. Onye ono be ee-bufukwa ẹ ndu nkiya.

⁹ “Unu -nọdu akpata iphe, unu meberu l'egu; unu ta akparwujekwa okoke; ọphu unu aturutajekwa ọphu nashihuru ndu akparu iya unu daa l'ali. ¹⁰ Unu te jejekwa mkpakwa akpuru vayinu l'opfu-vayinu unu; ọphu unu aturutajekwa ọphu dashihuru l'ali. Unu pajeru ndu k'ono haaru ndu ukpa; waa ndu lwaru alwalwa; noo ẹkele ọ kwa mbedua bụ Chipfu; bya aburu Chileke unu.

¹¹ “Unu te ezijekwa iphuru; ọphu unu adzujekwa ukpa; ọphu unu aghojekwaru nwibe unu ugho. ¹² Unu ta akpapyabejekwa iphe, unu meru gude ẹpha mu gụa ẹnwa; shi nno merwua ẹpha Chileke unu. Ọ kwa mbedua bụ Chipfu.

¹³ “Te erijekwa nemadzu ibe ngu urwu; ọphu i najekwa iya nfu. G'aswa ozi onye i butaru

k'ozi ta akwajekwa ngu akwakwa l'eka futa utsu.
 14 Te ephujekwa onye ada nkuchi iphu; ophu i dochijekwa onye ata aphudu uzo iphe l'uzo. Tsuje Chileke ngu ebvu; noo kele o kwa mbedua bu Chipfu.

15 “Unu te ekpejekwa ikpe, apfuduru-oto. Unu te elejekwa onye ukpa enya l'iphu haaru iya enge; kele o bu onye ukpa; ophu unu akwabejekwa onye ha shii ubvu haaru iya enge; kele o bu onye ha shii. G'ikpe, unu e-kpeje nemadzụ ibe unu buru ikpe, pfuru oto. 16 Te etsokwaru aghaphe asuphe asulasu; ophu i nodujekwa le mpfube g'e gbua nwibe ngu. O kwa mbedua bu Chipfu.

17 “Ge nwune ngu ta adujekwa ngu ashị l'ime okpoma. Gudeje obu ngu baaru iya mba g'i ti tsoru keta oke l'ejo-iphe, onye obu meru. 18 Te emelatajekwa iphe, unwu ndibe unu meru ngu; ophu o dukwa onye ophu ii-vujeru aphu l'obu. O chia g'i yee nemadzụ ibe ngu obu g'i yeru onwongu. O kwa mbedua bu Chipfu.

19 “Unu mejekwa iphe, mu toru okpa iya su g'e tsoje. G'a ta hajekwa anu-ulo g'o shia ophu yee ya abudu udu anu lanu. Ophu i kujekwa uzi iphe labo l'opfu ngu; ophu i yejekwa uwe, abudu udu ekwa lanu be e gude kwaa ya.

20 “O -duru onye jepfuru nwamgboko, a gbaru ohu, e kwetawaru l'ee-ke nwoke ozo; teme ophu o budu l'a gbafutawaru iya g'o nweru onwiya; g'e kpekwa ya ekpekpe nukwa ndu obu aphu, rwuberu phe nu. Ole g'e te egbukwa phe egbugbu; noo kele nwamgboko ono bukwadu ohu.

²¹ G'onye ke nwoke kputakwa ebili gude bya anu l'onu-abata ulo-ekwa-ndzuko; g'e gude gweeru iya ngweja-apfu-ugwo l'iphu Chipfu. ²² Onye uke egude ebili ono, e gude gwee ngweja-apfu-ugwo ono pfa ugwo iphe-eji onye ono l'iphu Chipfu; l'a guaru iya nvu l'iphe-eji ono, o meru ono.

²³ “Unu -bahupho l'ali ono; unu bya eyeshia ya oshi-omi, dugbaa iche iche, eeri mebyi iya eriri; unu sojekwa mebyi iya nsọ. G'a sokwaa ya nsọ ono apha eto; g'e te erikwa iya eriri. ²⁴ Teke o beerupho l'apha k'eno g'e doo akpuru, oshi ono mitaru nsọ; woru gweeru Chipfu ngweja-ekele. ²⁵ O -be l'apha k'ise; unu awatawaro eri akpuru oshi obu. O buru nno bu g'ee-shi; iphe, unu meberu l'ali emehuaha; eevu aka shii eje. O kwa mbedua bu Chipfu; bya aburu Chileke unu.

²⁶ “Unu ta atajekwa anu, mee dukwadu. Unu te emejekwa omamanshi; ophu unu emejekwa mgbashi. ²⁷ Unu ta akpufubebejekwa egbushi, no unu l'ishi; ophu unu akpu-byishijekwa ejí-agba unu akpubyishi. ²⁸ Unu te eyebatajekwa onwunu onya l'ehu opfu le nemadzu nwuhuru; ophu unu ebyikashijekwa onwunu mbo. O kwa mbedua bu Chipfu obu.

²⁹ “Te emekwa nwada ngu g'o buru nwanyi-ovuoba; shi nno merwua nwa ngu obu; a -nonyakwa; o buru ndu agba ukpara e-sweta ndu unu; ejo-ememe eji ali ono bushihu. ³⁰ Unu dobeje ekemu eswe-atuta-unme mu; unu akwabeje ulo mu ono, du nsọ ono ubvu; kele o kwa mbedua bu Chipfu.

³¹ “Unu te ejejekwa aji maa l'ibe ndu aphu ophulenyaa; ozoo ndu jibya; noo kele epherwu unu. O kwa mbedua bu Chipfu; bya aburu Chileke unu.

³² “Gbeshijekwaru ndu-ishi-ewo l'oshi. Kwabeje ndu bu ogerenya ubvu; l'i tsuje Chileke ebvu. O kwa mbedua bu Chipfu.

³³ “O -duru onye lwaru alwalwa l'ali unu; unu te emekpakwa iya ehu. ³⁴ G'e mejekwa onye lwaru alwalwa, bu l'ali unu g'eemeje onye a nwuru le Izurelu. Unu yekwaa onye ono obu g'unu yeru onwunu; noo kele unubedua shikwapho buru ndu lwaru alwalwa l'ali Ijiputu. O kwa mbedua bu Chipfu bya aburu Chileke unu.

³⁵ “Unu -nodu atu ogologo iphe; ozoo erwa iphe; ozoo g'iphe habe l'igwerigwe; unu te emekwa iya l'uzo, apfuduru-oto. ³⁶ Unu gudejekwa iphe, darwuru nu gude mee ya; mbu iphe, e gude atu erwa iphe ophu bu okpobe iya; ye okpobe nkweka; ye okpobe ekpemu be bugbaa iphe, unu e-gudeje tua iphe. O kwa mbedua bu Chipfu; bya aburu Chileke unu; onye dufutaru unu l'ali Ijiputu. ³⁷ Oo ya bu le-a; unu tsokotaje iphe, bukpo iphe, mu toru okpa iya su g'e tsoje; waa iphe, mu turu l'ekemu g'o ha. Unu meje iya nno; noo kele o kwa mbedua bu Chipfu.”

20

Ahu onye meru iphe-eji

¹ Tobudu iya bu; Chipfu bya epfuru yeru Mosisu su iya: ² “Waa iphe, ii-pfuru yeru unwu Izurelu baa: Iphe, bukpo onye Izurelu;

ozoo onye lwaru alwalwa bya eburu le Izurelu, kputaru nwa iya je anu Moleku; g'e gbukwa onye ono egbugbu. Ge mkpukpu ono l'ophu wufutakwa je atugbua ya le mkpuma. ³ Mbèdua l'onwomu a-gbanwuberu onye ono iphu mu; bufu iya le ndu nkiya; kele o gude nwa iya gwaa Moleku; shi nno merwua ulo mu ono, du nsò ono; bya arwutoshia epha mu ono, du nsò ono. ⁴ O -buru le ndu mkpukpu ono humaru onye kputaru nwa iya je anu Moleku; epe nyia nchi manu; ophu epe egbuduru onye obu; ⁵ be mu a-gbanwubekwaru onye obu iphu mu; yee ndibe iya; bufu phe le ndu nkephe; mekpoo iphe, bu ndu ono, yee ya eshiswe uzo; jeru; epe le Moleku nodu eri ogori ono.

⁶ "Onye ejeje aji maa l'ibe ndu jibya; shi nno du ghelegheleghele; be mu a-gbanwubekwa iphu; bufu iya le ndu nkephe. ⁷ Unu dobekwa onwunu iche; unu adu nsò; noo kele oo mbèdua bu Chipfu; bya aburu Chileke unu. ⁸ Unu dobe iphe, mu toru okpa iya su g'e tsoje; meje iya ememe; kele oo mbèdua bu Chipfu, emeje unu g'unu du nsò.

⁹ "Onye phuru nna iya; ozoo ne iya iphu; g'e gbukwaa onye obu egbugbu; kele oo nna iya; ozoo ne iya be o phuru iphu; ge mee ya tukokwaru iya l'ishi.

¹⁰ "O -buru le nwoke jepfuru nyee nwoke ibe iya; epe shi nno ria ogori; g'e gbukwaa nwoke obu yee nwanyi obu egbugbu. ¹¹ Ozo bu l'onye jepfuru nyee nna iya bukwa nna iya be o meru iphe-iphere. G'e gbukwaa ephenebo egbugbu; ishi ochi phe atu-koru phe l'ishi; mbu ndu ono,

e gburu ono. ¹² Onye -jepfuru nyee nwa iya; g'a tũko ẹphenebo gbua; noo kele iphe, ẹphe meru bu akpamara. Ishi ọchi phe bukwa onwophe be ọ tu-koru l'ishi. ¹³ Ọ -buru le nwoke jepfuru nwoke ibe iya; ẹphe l'iya kwaa akwakwa nwoke yee nwanyi; be ẹphenebo mekwaru ẹbyi. G'e gbukwaa ẹphenebo egbugbu. Ishi ọchi onwophe bukwa ẹphebedua be ọ tu-koru l'ishi. ¹⁴ Onye jeru aluta nwanyi; bya emechaa je alutafua ne nyee ya ono mekwaru ẹjo-ememe. G'a kpatakwa nwoke ono; yee unwanyi labo pho je akpo ọku. Oo ya bu; g'ẹjo-ememe, du ẹgube ono ta adu l'echilabo unu. ¹⁵ Teke ọ bu le nwoke jepfuru anu; g'e gbukwaa ya egbugbu; gbukwapho anu obu. ¹⁶ Ọ -buru le nwanyi togboru onwiya g'anu jepfu iya; g'e gbukwaa nwanyi obu yee anu obu. Ishi ọchi onwophe atu-koru phe l'ishi.

¹⁷ "Teke ọ bu le nwoke lutaru nwune iya; ọzoo nwanna iya; o -jepfu iya; be ọ bukwa iphe-iphere. G'a nodukwa l'edzudzu-oha ndu nkephe bufu phe ebufu. Ọ kwa nwune iya be o meru iphe-iphere. Iphe, o meru tu-koru iya l'ishi. ¹⁸ Onye jepfuru nwanyi teke ọono nsọ be buakwaru ẹnu-mee nwanyi ono; mbu le yebe nwanyi kpuhawaru ẹnu-mee ya ghebe onu. Oo ya bu; g'a tukokwa ẹphenebo bufu ebufu le ndu nkephe.

¹⁹ "Te jepfukwa nwune ne ngu; ọzoo nwune nna ngu; kele onye meru nno bu onye yele iya bu mee lanu be o meru iphe-iphere. Iphe, unu meru a-tu-kokwaru unu l'ishi. ²⁰ Onye jepfuru nyee nwune nna iya; ọzoo nyee nwune ne iya; be

bukwa nwune nna iya ono; ozoo nwune ne iya ono be o meru iphe-iphere. G'iphe, ephe meru tu-kokwaru phe l'ishi. Ephenebo ta abyadu atogbo akọ le mgboko. ²¹ Onye tugburu je aluta nyee nwune iya be mekwaru iphe, aaso nsọ; bya emee nwune iya obu iphe-iphere. Ephe ta abyadu atogbo akọ le mgboko.

²² “Oo ya bu le-a; unu tsoje iphe, mu toru okpa iya su g'e tsoje g'o ha; waa iphe, mu turu l'ekemu. Unu meje iya ememe; k'ophu ali ono, mu edu unu ala ono ata agbodu unu g'onye gboru egbo.

²³ Unu te emejekwa iphe, ephe emeje; mbu oha ono, mu abya achifu l'iphu unu ono; noo kele o kwa iphemiphe ono, ephe meru ono meru g'o gude mu soo phe oyi. ²⁴ Mbu le mu suru unu-a: O kwa unu e-nworu ali phe; mbu le mu a-nu iya unu g'o buru okiphe unu; mbu ali ono, mini era-eswi waa manu-enwu aso gborogboro ono. O kwa mbedua bu Chipfu; bya aburu Chileke unu, bu onye hofutaru unu l'echilabo ndiphe.

²⁵ Oo ya bu; unu mejekwa iya g'o doo enya; mbu odu-iche, du l'anu, aaso nsọ; yee anu, a ta sodu nsọ; yee odu-iche, du l'enu, a ta sodu nsọ; yee enu, aaso nsọ. Unu te egudekwa anu; ozoo enu; mewaro iphe, awu l'epho merwua onwunu; mbu anu ono; waa enu; mewaro iphe ozo ono, mu gushiru unu su g'unu soje nsọ ono.

²⁶ Unu dukwaru mu nsọ; noo kele mbedua, bu Chipfu du nsọ; teme mu hofutawa unu l'echilabo ndiphe g'unu buru nkemu.

²⁷ “Nwoke; ozoo nwanyi, aji maa; ozoo onye jibya g'e gbukwaa onye obu. G'e gude mkpuma

tugbua onye ọ bụ. Ishi ọchi onwiya atụ-koru iya l'ishi.”

21

Ekemu, a turu ndu-uke

¹ Tọbodu iya bụ; Chipfu bya asụ Mósísu: “Waa iphe, ii-pfuru ndu-uke baa; mbụ ụnwu Erọnu. Sụ phẹ g'ọ tọ dukwa onye ọphu e-gudeje k'onye nwuhuru anwuhu l'ibe phẹ mee onwiya onye aasọ nsọ; ² gbahaephọ l'onye ọbu nwuhuru nụ ọbu bẹ ẹphe l'onye uke ọbu bụ mee lanụ; mbụ l'ọo ne iya; ọzoo nna iya; ọzoo nwa iya nwoke; ọzoo nwa iya nwanyi; ọzoo nwune iya nwoke; ³ ọzoo nwune iya nwanyi, eteke aludu ji; ọ buru iya bẹ ọ nọ l'eka opfu l'ọ tọ ludu ji; odzu ẹgube onye ono gbakwaru g'ọ gude iya mee onwiya onye aasọ nsọ. ⁴ G'ọ to mekwa onwiya onye aasọ nsọ l'eka ọ bụ onye-ishi l'echilabọ ndibe phẹ; mbụ shi nno merwua onwiya.

⁵ “G'ẹphe ta akpushijekwa ishi; ọphu ẹphe akpụ-byishijekwa aguga aguga ẹjí-agba phẹ; ọphu ẹphe ebyijekwa mbo l'ẹhu ebyibi ọphu. ⁶ G'ẹphe dukwaru Chileke phẹ nsọ; g'ẹphe ta turwu ẹpha Chileke phẹ ono; kele ngweja ono, aakpoje oku nụ Chipfu ono; mbụ nri ono, aanuje Chileke phẹ ono bẹ bụ phẹ agwajẹ iya. Ọo ya bụ lẹ-a; g'ẹphe bukwaru ndu dụ nsọ. ⁷ G'ẹphe ta lujekwa nwanyi, gude agba ukpara merwushiwa onwiya; ọphu ẹphe alujekwa nwanyi, ji iya chifuru; noo kele onye uke duru Chileke iya nsọ. ⁸ Unu meje onye uke g'ọ buru onye dụ nsọ; kele ọo yẹbedua l'agwaru unu Chileke. G'ọ

bụkwaru onye duru unu nsọ; kele mbedua, bu Chipfu, bu onye meru g'unu du nsọ bụkwa onye du nsọ. ⁹ O -buru le nwada onye uke wataru agba ukpara shi nno merwua onwiya buakwaa nna iya be o merwuru. G'a kpokwaa nwamgboko ono oku.

¹⁰ "G'onye bu onye-ishi uke l'echilabo unwune iya; mbu onye ono, a wuru manu l'ishi; bya aburu onye e meru g'o yeje uwe ndu-uke; g'onye ono ta ahajekwa egbushi iya g'o du yagalaya-galayagala; ophu o lakajekwa uwe iya alaka. ¹¹ G'onye ono ta abahujekwa l'eka odzu ze. G'o to dukwa m'obetaru o buru nna iya ozoo ne iya nwuhuru; l'o bahu eka ono je eme onwiya onye aaso nsọ. ¹² G'o to lufujekwa alufu l'ulo, du nsọ ke Chileke; ophu o merwukwa ulo obu; noo kele o manu Chileke iya be a wuru iya l'ishi. O kwa mbedua bu Chipfu. ¹³ Ge nwanyi, oo-lu buru nwanyi, adudu nwoke jepfujeru iya nu. ¹⁴ G'o to lukwa nwanyi, ji iya ta anoedu; ophu o lukwa nwanyi, a chifuru achifu; ozoo nwanyi, agba ukpara; shi nno merwua onwiya. Ge nwanyi, oo-lu bukwaru onye adudu nwoke, jepfujeru iya nu; teme o bukwarupho onye Izurelu. ¹⁵ Oo ya bu; g'o to shi nno mee oshilokpa iya g'ephe buru ndu ndibe phe aso nsọ. O kwa mbedua, bu Chipfu bu onye meru iya; o du nsọ."

¹⁶ Tobudu iya bu; Chipfu bya epfuru yeru Mosisu su iya: ¹⁷ "Waa iphe, ii-pfuru Eronu baa; su iya: Iphe, bukpo onye bu oshilokpa ngu; e -shi l'ogbo sweru ogbo, bu onye nweru eka iphe mebyiru iya; g'o to byajekwa g'o nu Chileke iya

nri. ¹⁸ G'iphe, bu onye nweru eka iphe mebyiru iya ta abyakubejekwa Chileke ntse; mbu onye atsụ ishi; ozoo onye bu eniyeni; ozoo onye iphe mebyiru eka ozo; ¹⁹ ozoo onye iphe lonwuru okpa lanu; ozoo eka lanu; ²⁰ ozoo onye okwebe kweberu; ozoo onye chikpirihuru achikpirihu; ozoo onye iphe eme l'enya; ozoo onye iphe eme l'akpo-ehu; ozoo onye a haru ahaha. ²¹ G'o to dukwa oshilokpa Eronu, bu onye uke, duru eka iphe mebyiru iya, a-byaje ntse k'abya egweru Chipfu ngweja, aakpo oku. Eshinu o duru eka iphe mebyiru iya g'o to kpiritakwaru ntse k'anu Chileke iya nri. ²² G'o rijekwaro nri, a nuru Chileke iya; mbu ophu du nsọ; me ophu du nsọ shii. ²³ Ole eshinu o duru eka iphe mebyiru iya g'o to jekubejekwa mgboru ekwa, e gude kobuta eka-kakota-adu-nsọ; ophu oojekubejekwa oru-ngweja; g'o to shi nno merwua ulo mu ono, du nsọ ono; kele o kwa mbedua bu Chipfu, bu onye meru phe; ephe du nsọ."

²⁴ Tobudu iya bu; Mosisu bya eworu iphemiphe ono kokotaru Eronu; waa unwu iya; yee ndu Izurelu g'ephe hakota.

22

Ndu uke yee iphe, du nsọ ke Chileke

¹ Tobudu iya bu; Chipfu bya epfuru yeru Mosisu su iya: ² "Pfuaru Eronu yee unwu iya g'ephe kwabejekwaru iya enya; mbu iphe ono, ndu Izurelu doberu mu nsọ; g'ephe te egude iphe ono merwua epha mu ono, du nsọ; kele o kwa mbedua bu Chipfu." ³ L'i su phe-a: "Iphe, bu

onye bụ oshilokpa unu; e -shi l'ogbo sweru ogbo, bụ onye aasọ nsọ, byakuberu iphe, ndu Ízurelu doberu mube Chipfu nsọ; g'e bufukwa onye ono l'ataphu mu. O kwa mbedua bụ Chipfu.

⁴ “O -buru l'o nweru oshilokpa Eronu, iphe, eswe nswe eme l'akpo-ehu; ozoo l'iphe alwashị iya l'ehu; g'onye ono te erikwa iphe, dū nsọ; jasū teke oo-dū iche l'iphe obu, eme iya nū obu; buru onye a taa sọhedu nsọ. Teke o bukwanu l'o nweru onye denyiru iphe, aasọ nsọ eka; dū gẹ l'o meru odzu eka; ozoo nwoke, gbọru unwuda; ⁵ ozoo l'onye ono denyiru iphe, awū l'epho eka bụ iphe, ee-me iya g'ọ buru onye aasọ nsọ; ozoo l'o denyiru onye aasọ nsọ eka; ozoo l'ọ dūru iphe ozo, meru iya; o buru onye aasọ nsọ; bẹ o buakwaa onye aasọ nsọ. ⁶ Onye denyiru iphe, dū nno eka a-buru onye aasọ nsọ jasū nchi ejihu. G'ọ tọ dukwa iphe, e doberu nsọ, oo-ri; gbahaa l'o gude mini wua onwiya ehu. ⁷ Enyanwu -nyihuepho; bẹ a taa sọhedu onye obu nsọ. A -gbẹ teke ono bẹ onye ono a-watawaro eri iphe, e doberu nsọ; noo kele oo nri iya bụ ono. ⁸ G'o to rijekwa iphe, nwuhuru anwuhu; ozoo iphe, anu-egbudu dzugburu; g'o to shi nno merwua onwiya. O kwa mbedua bụ Chipfu.

⁹ “Gẹ ndu-uke mejekwa iphe, mu sūru g'ephe meje. O -buru l'ephe te emedu iya; ephe emeta iphe-eji kpua onwophe; teme l'o gbukwaa phe pho. O kwa mbedua bụ Chipfu, bụ onye meru phe; ephe dū nsọ.

¹⁰ “G'o tọ dukwa onye abudu eri ndu-uke, e-rije iphe, e doberu nsọ. G'onye byaru onye

uke ebyaa; ọzoo onye o butaru ebuta ozi te erijekwa iphe, dụ nsọ. ¹¹ Ọle ọ -buru l'onye uke gude okpoga iya gbata ohu; ọzoo l'a nwuru iya ohu l'unuphu; gẹ ndu k'ono rijekwa nri ono. ¹² Nwada onye uke -je aluru onye abudu onye uke; g'onye ọbu te erijeekwa iphe ono, dụ nsọ ono, aanuje ndu-uke ono. ¹³ Obenu teke ọ bu lẹ nwada onye uke bẹ teke anwutadu nwa; ji iya nwuhu; ọzoo l'a chifuru iya achifu; ọ laa ibe nna iya; g'o rijekwa nri ono, bu nri nna iya ono; g'o shi erije iya teke ọ bu nwata. Ọle ọ bu; g'onye abudu onye oshilokpa ndu-uke te erikwa iya.

¹⁴ “Onye riru iphe, e doberu nsọ l'amagama; g'onye ono pfukwaa onye uke ugwo iya. Ọ -pfuchaa ugwo iya l'o wota iphe ono ọzo, ha nno; kee ọzo ise woru oke lanu tukobe l'ono, o gude apfu ugwo iya ono. ¹⁵ Gẹ ndu-uke te emerwukwa iphe ono, dụ nsọ ono, shi l'eka ndu Ízurelu ono, bu ọphu ephe nuru Chipfu; ¹⁶ shi egube ono mee g'ephe buru ndu ejo-iphe tukoru l'ishi; teme ephe aburu ndu-ikpe nmaru; kele ephe riru iphe ono, ephe doberu nsọ ono; kele ọ kwa mbedua bu Chipfu, bu onye meru phe; ephe dụ nsọ.”

¹⁷ Tọbudu iya bu; Chipfu bya epfuru yeru Mosisu su iya: ¹⁸ “Waa iphe, ii-pfuru Eronu; yee unwu iya; yee ndu Ízurelu l'ophu baa; su phe-a: Ọ -duru onye bu onye Ízurelu gedegede; ọzoo onye lwaru alwalwa, bu lẹ Ízurelu, gude iphe abya g'e gude iya gweeru Chipfu ngweja-akpo-oku k'iphe, o kweru ukwe lẹ ya e-me; ọzoo iphe, ọ turu obu iya onyo anu; ¹⁹ g'onye ono kputakwa anu, bu okee ya, adudu eka iphe mebyiru iya

bya. Iphe, oo-gude bya bu oke-eswi; ozoo ebili; ozoo mkpi; k'ophu aa-nafukwanu iya unu l'eka. ²⁰ Unu te wotakwa iphe, nweru eka iphe mebyiru iya gude bya egwee ngweja obu; kele a taa natakwa iya unu l'eka. ²¹ Onye kputaru eswi; ozoo aturu; ozoo eghe gude abya egweru Chipfu ngweja-ehu-guu; shi nno emekota iphe, o kweru ukwe iya; ozoo g'o buru iphe, o turu obu iya onyo anu; g'onye ono wotakwa anu, adudu eka iphe mebyiru iya; k'ophu aa-natakwanu iya ya l'eka.

²² “Unu ba anujekwa Chipfu anu, atsu ishi; ozoo ophu e mekaru iphe; ozoo ophu iphe mebyiru ibe lanu; ozoo ophu iphe alwashu l'ehu; ozoo ophu iphe eme l'akpo-ehu. Unu te egudekwa anu, du egube ono je akporu Chipfu oku l'eli oru-ngweja. ²³ O -buru ngweja, a turu obu onyo anu; g'onye egwe iya nu nujekwaro eswi; ozoo aturu, nweru eka iphe mebyiru iya; aa-nafu iya ya-a l'eka. Ole o -buru ophu onye ono gude emekota iphe, o kweru ukwe iya be a taa nafukwa iya ya l'eka. ²⁴ Unu ta nujekwa Chipfu anu, e mekaru iphe l'akporu-anwu; ozoo ophu e tsupyaruru nkiya etsupya; ozoo ophu iphe lajaru nkiya; m'o bu ophu e bufuru nkiya ebufu. Unu te emejekwa iphe, du egube ono l'ali unu-a. ²⁵ Unu ta nujekwa anu, shi l'eka onye ohozo; g'o buru nri, unu anu Chileke unu. Eshinu egube anu ono du g'anu, nweru eka iphe mebyiru iya be a taa nafukwa iya unu l'eka.”

²⁶ Tobudu iya bu; Chipfu bya epfuru yeru Mosisu su iya: ²⁷ “Nwa eswi, a nwuru k'ophuu; ozoo aturu; ozoo eghe be aa-hajekwa ge yele ne

iya nɔadaa ujiku ɛsaa. A -gbɛ lɛ mbɔku, kwe anu ono ujiku ɛsato tugbua; bɛ a -kpɔta iya bya anu g'e gude gweeru Chipfu ngweja, aakpɔ ɔku bɛ aa-natakwa iya-a. ²⁸ Unu ta tukojekwa neswi yɛe nwa iya; m'ɔ bu aturu yɛe nwa iya gbua ujiku lanu. ²⁹ Unu -nɔdu egweru Chipfu ngweja-ekele; unu mejekwa iya l'uzo, du ree; k'ɔphu aa-nata iya unu l'ɛka. ³⁰ G'a tukokwa anu, e gude gwee ngweja ɔbu takɔta mbɔku ono; g'ɔ tɔ dukwa ɔphu aa-ha g'ɔ nɔo futa utsu. ɔ kwa mbɛdua bu Chipfu.

³¹ “Oo ya bu lɛ-a; unu dobekwa ekemu mu; unu emeje iya ememe. ɔ kwa mbɛdua bu Chipfu. ³² ɔphu unu emerwɔkwa ɛpha mu ono, du nsɔ ono; ɔ chikwa gɛ ndu Ízurelu dobe ɛpha mu iche l'echilabɔ phɛ; kele ɔ kwa mbɛdua bu Chipfu, bu onye meru; unu du nsɔ; ³³ bya aburu onye dufutaru unu l'alì Ijiputu gɛ mu buru Chileke unu. ɔ kwa mbɛdua bu Chipfu.”

23

Ọbo-iphe kẹ Chipfu

¹ Tɔbudu iya bu; Chipfu sɔ Mósisu: ² “Wakwa iphe, ii-pfuru ndu Ízurelu baa; sɔ phɛ-a: Wakwa ọbo-iphe, mɔbe Chipfu doberu baa; mbu ọbo-iphe, unu a-ra arara l'oo ya bɛ a-buru ndzukɔ ɔphu du nsɔ. ³ Ọo ujiku ishii bɛ unu e-jeje ozi; mbɔku k'ɛsaa a-buru eswe Sabatu, bu eswe-atuta-unme. Mbɔku ono a-buru eswe ndzukɔ ɔphu du nsɔ. Unu te jejekwa ozi mbɔku ono; kele ɔ bu eswe-atuta-unme kẹ Chipfu l'ekameka unu bukpɔ. ⁴ Ọwaa bu ọbo-iphe, Chipfu doberu;

mbụ ndzuko, dị nsọ, unu e-dzukọbeje m'o -rwua teke e doberu iya."

Ọbo Ojaghata

(Ógú 28:16-25)

⁵ "Ọbo Ojaghata Chipfu bụ mbọku, aa-boje iya bụ mbọku, ọnwá mbụ dị l'abalị iri l'eno l'uzenyashi. ⁶ O -be lẹ mbọku k'iri l'ise l'ọnwá ono kwaphọ; bẹ unu a-bojeru Chipfu Ọbo-Buredi, ekoduru ekoko. Ujiku ẹsaa bẹ unu a-ta buredi, e yeduru iphe, ekoje buredi. ⁷ Mbọku mbụ k'obo-iphe ono bẹ unu e-nweru ndzuko, dị nsọ; g'ọ tọ dukwa ozi, unu e-je mbọku ono. ⁸ Ujiku ẹsaa bẹ unu a-nọduepho egweru Chipfu ngweja, aakpọ ọku. Teke o rwuẹrupo lẹ mbọku k'ẹsaa; unu enweru ndzuko, dị nsọ; g'ọ tọ dukwa ozi, unu e-je mbọku ono."

⁹ Tọbudu iya bụ; Chipfu bya epfuru yeru Mosisu sụ iya: ¹⁰ "Wakwa iphe, ii-pfuru ndu Ízurelu baa; sụ phẹ-a: Unu -bahụepho l'alị ono, mu abya anụ unu ono; teke unu kpatarụ iphe, e meberu l'alị ono; unu ewota upfu lanụ l'iphe mbụ, unu e-vuru ụzo kpata je anụ onye uke. ¹¹ G'onye uke ono wota upfu iphe ono maa l'iphu Chipfu. Ọo ya bụ gẹ Chileke anata iya unu l'ẹka. Ọ bụrụ lẹ nchitabọhu iya; mẹ eswe-atụta-unme -bvụepho bẹ ọo-ma iya ọbu. ¹² Mbọku ono, unu a-ma upfu iphe ono l'iphu Chipfu ono bẹ unu e-gudekwaphọ nwa ebili, nọwaru apha lanụ, adudu ẹka iphe mebyiru iya; bya egwee ngweja-akpọ-ọku nụ Chipfu. ¹³ Ngweja-nri, a-yikwaru iya phọ a-buru ukpokutu ereshi, a gwọrụ lẹ manụ, jiru nkweka e keru ụzo iri wota uzi

labo, ee-gude gweeru Chipfu ngweja, aakpo oku, mkpọ iya dụ ree; teme l'e yekobekwa iya pho mee, jiru nkeru-eno otu-lupfu otumu g'ọ buru ngweja-mee. ¹⁴ Ophu unu adukwa buredi, unu a-ta; ophu unu atakwa ereshi, a huru ahuhu; ophu unu atakwa ophu dụ oyii; gbiriri jasụ mbọku ono, unu e-wotaru Chileke unu ngweja ono. Ono a-buru iphe, mu toru okpa iya sụ g'e tsoje jasụ l'ojejoje; mbụ l'oo-shije l'ogbo sweru ogbo l'ekameka unu bụ.”

Obo-Idzu

(Ógú 28:26-31)

¹⁵ “O -be lẹ nchitabohu mbọku ono, unu byaru egude upfu iphe gwee ngweja-amama ono; me eswe-atuta-unme bvuchaepfo; unu agbe mbọku ono no-dzua idzu esaa. ¹⁶ Teke a no-dzuerupho ukporo abali labo l'abali iri; o -rwua lẹ nchitabohu eswe-atuta-unme k'esaa; unu abyakwa egweeru Chipfu ngweja-nri, unu e-gude ereshi ophuu gwee. ¹⁷ Unu gbe l'eka unu bu wota ishi buredi ebo, e gheru l'ukpokutu ereshi, jiru nkweka e keru ọzo iri wota uzi labo, e yeru iphe, ekoje buredi; bya anu g'e gude gwee ngweja-amama g'ọ buru akpuru-iphe-mbu, a nuru Chipfu. ¹⁸ Iphe, unu e-wotafua yekoberu ishi buredi ono bu unwu ebili esaa, nokotaru mgbarapha; teme o buru ophu adudu eka iphe mebyiru iya; waa nwa oke-eswi lanu; waa ebili labo. G'e gude anu ono g'ọ ha; waa ngweja-nri, etso iya nu; yee ngweja-mee, etso iya nu; gwee ngweja-akpo-oku nu Chipfu; mbu ngweja, aakpo oku, mkpọ iya dụ Chipfu ree. ¹⁹ Oo

ya bu; unu abya akputa mkpi lanu gude gwee ngweja-iphe-ẹji; bya akputa unwu ebili labo, noḡbaaru mgbarapha gude gwee ngweja-ẹhu-guu. ²⁰ G'onye uke ono woru unwu ebili labo ono; waa buredi ono, e meru l'akpuru-iphe-mbu, a kpataru l'opfu ono maa l'iphu Chipfu g'ọ buru ngweja-amama. Iphe ngweja ono bukota ngweja, du nsọ ke Chipfu; ọ buru onye uke bu onye e-ri iya nu. ²¹ Mbọku ono kwapho be unu e-nweru ndzuko, du nsọ. Unu ta adukwa ozi, unu e-je mbọku ono l'ophu. Ono a-buru iphe, a toru okpa iya su g'e tsoje jasọ l'ojejoje; mbu l'oo-shije l'ogbo sweru ogbo; unu emeje iya l'ekameka unu bukpọ.

²² “Unu -noḡdu akpata iphe, unu meberu l'egu; unu ta akparwujekwa okoke; ophu unu aturutajekwa ophu nashihuru ndu akparu iya unu daa l'ali. Unu hajeru ndu ukpa; yee ndu lwaru alwalwa ophu daru l'ali. O kwa mbẹdua bu Chipfu; bya aburu Chileke unu.”

Obo Apha-òphúú

(Ógú 29:1-9)

²³ Tọbudu iya bu; Chipfu bya epfuru yeru Mosisu su iya: ²⁴ Wakwa iphe, ii-pfuru yeru unwu Ízurelu baa; su phe-a: “Iphe, bukpoo mbọku mbu l'onwa k'esaa bukwa unu eswe-atuta-unme; mbu mbọku, unu a-noje ndzuko, du nsọ. O -be mbọku ono g'e gbua opu gude karu onyemonye. ²⁵ Unu ta adukwa ozi, unu e-je mbọku ono l'ophu; iphe, unu e-mejehia bu l'unu a-nuje Chipfu ngweja, aakpo oku.”

Eswe apfu ugwo iphe-iji
(Uke 16:1-34; Ógú 29:7-11)

²⁶ Tòbudu iya bụ; Chipfu bya epfuru yeru Mòsisu sụ iya: ²⁷ “Mbọku, ọnwá ẹsaa ono dụ l'abalị iri l'a-bujeru unu eswe apfu ugwo iphe-iji. Mbọku ono bẹ unu a-nojẹ ndzukọ, dụ nsọ; unu a-swị ẹgu; gwee ngweja, aakpọ oku anụ Chipfu. ²⁸ Unu ta adukwa ozi, unu e-je mbọku ono; noo kele mbọku ono bụ eswe apfu ugwo iphe-iji; mbụ mbọku, aa-nọdu l'iphu Chipfu, bụ Chileke unu pfa ugwo iphe-iji, unu meru. ²⁹ Kele onyemonye, ta aswịdu ẹgu mbọku ono bẹ ee-bufukwa ebufu lẹ ndu nkepẹ. ³⁰ Teke ọ duru onye jeru ozi mbọku ono; mu e-me onye ono g'ọ chihu l'echilabọ ndu nkepẹ. ³¹ G'ọ tọ dukwa ozi g'ọ dughabe, unu e-je. Ono a-buru iphe, a toru okpa iya sụ g'e tsoje jasụ l'ojejoje; mbụ l'oo-shije l'ogbo sweru ogbo. Unu emeje iya l'ekameka unu bu. ³² Mbọku ono a-buru unu eswe-atuta-unme. Unu aswịa ẹgu mbọku ono. Unu e-shije l'uzenyashi mbọku, ọnwá dụ l'abalị tete tuta unme jasụ l'uzenyashi kẹ mbọku, ọnwá a-dụ l'abalị iri.”

Ọbo-Mkpù
(Ógú 29:12-40; Dit 16:13-17)

³³ Tòbudu iya bụ; Chipfu bya epfuru yeru Mòsisu sụ iya: ³⁴ “Wakwa iphe, ii-pfuru yeru unwu Ízurelu baa; sụ pẹ-a: Teke ọnwá ẹsaa ono dọepho l'abalị iri l'ise g'a bọo Ọbo-Mkpù kẹ Chipfu. Iphe, aa-bọru iya Chipfu bụ ujiku ẹsaa. ³⁵ Mbọku mbụ bẹ unu e-nweru ndzukọ, dụ nsọ;

g'ò tọ dukwa ozi, unu e-je mbọku ono l'ophu.
³⁶ Ujiku ẹsaa ono bẹ unu a-nuje Chipfu ngweja, aakpọ ọku. O -be lẹ mbọku k'ẹsato; unu anọje ndzuko, dụ nsọ; bya anukwapho Chipfu ngweja, aakpọ ọku. Ndzuko ono bukwa ndzuko, dụ nsọ; ọọ ya bụ g'ò tọ dukwa ozi, unu e-je mbọku ono l'ophu.”

³⁷ “Ono bụ ọbo-iphe, Chipfu doberu; mbụ ọphu unu a-ra arara g'ò bụru ndzuko, dụ nsọ. G'a nụ Chipfu ngweja, aakpọ ọku, bụ iya bụ ngweja-akpọ-ọku; yẹe ngweja-nri; waa ngweja-mẹe; mewardo ngweja ọzo. Iphe, bụ ngweja ono bẹ aa-nọdujeepho egwe lẹ mbọku, gbaru iya nụ.

³⁸ A gufukpokwaru ngweja k'eswe-atuta-unme; bya agufu iphe, unu anuje Chipfu anunu; gufu l'onye-a apfu iphe, o kweru ukwe iya; gufu iphe-anunu ọphu unu turu obu unu onyo anụ, bụ ọphu unu anụ Chipfu.

³⁹ “O -rwua mbọku, ọnwa ẹsaa dọepho l'abalị iri l'ise; m'unu kpatachaepho iphe, unu meberu l'ali; unu abọoru Chipfu ọbo-iphe ujiku ẹsaa. Mbọku abahụ iya bẹ unu a-tuta unme ozi; unu atutakwapho unme lẹ mbọku k'ẹsato. ⁴⁰ Mbọku mbụ l'ọbo-iphe ono bẹ unu a-hata akpuru oshi, kachaa ree l'akpuru oshi, unu wotaru; unu egbuta igu; mẹ ẹkali-oshi, ẹkwo dụ shii; waa ẹkali-oshi wilo. Unu gweta iphe ono gude je anọdu l'iphu Chipfu, bụ Chileke unu tee ẹsua ujiku ẹsaa. ⁴¹ Unu bojekwaru Chipfu ọbo-iphe ono ujiku ẹsaa ono aphagapha. Ono bụ iphe, a tọru ọkpa iya sụ g'e tsoje jasụ l'ojejoje; mbụ l'oo-shije l'ogbo sweru ogbo. Ọnwa, aa-boje iya bụ l'ọnwa ẹsaa. ⁴² Ọ bụru lẹ m̀kpù bẹ unu e-buru

abalẹ ẹsaa ono; mbụ l'iphe, bukpoonu ndu a nwuru lẹ Ízurelu e-bukotaru lẹ m̀kp̀u teke ono. ⁴³ Oo ya bụ; g'ogbo l'ogbo a-maru lẹ mu meru g'unwu Ízurelu bua lẹ m̀kp̀u teke ono, mu shi lẹ Ijiputu dufuta p̄he ono. O kwa m̀b̄dua bụ Chipfu; bya aburu Chileke unu."

⁴⁴ Oo ya bụ; Mosisu bya atuko obo-iphe, Chipfu doberu kakotaru ndu Ízurelu.

24

Eleta oroku enya (Awu 27:20-21)

¹ Toṣudu iya bụ; Chipfu bya epfuru yeru Mosisu sù iya: ² "Pfuaru ndu Ízurelu g'ephe wotaru ngu okpobe manù olivu, a tsuru l'ikwe, ee-yeje l'oroku g'oku oroku ono nwuje mkp̄urumkpuru. ³ Gẹ Eronu; yele unwu iya yeje oku l'oroku ono l'ataphu Chipfu l'ime ọlo-ekwandzuko ono; mbụ l'okotazu ekwa pho, e gude kobuta okpoko-ekemu pho. G'ephe mejekwa oroku ono g'o nwuje shita l'uzenyashi jasù l'utsu. Gẹ ndu Ízurelu dobekwa ekemu-a; a - gbẹ l'ogbo sweru ogbo. ⁴ Gẹ Eronu dozije oku l'oroku ono l'eli iphe, aapfubeje oroku ono, e meru lẹ mkp̄ola-ododo ono; g'o nwuje enwunwu l'ataphu Chipfu mkp̄urumkpuru."

Buredi, e doberu Chileke nsọ

⁵ "Gude ukpokutu ereshi gmeta ishi buredi iri l'ẹbo. L'ishi buredi lanù bẹ ii-yeje ukpokutu ereshi, jiru nkweka e keru ọzo iri wota uzi labo.

⁶ L'i woru buredi obu doo l'ogiri labo l'eli teburu

ono, e gude ọkpobe mkpola-ododo mee dobe l'atatiphu Chipfu ono. Ishi buredi ishii l'ẹka lanu; ishi buredi ishii ọphuu l'ẹka iya ọphuu. ⁷ L'i bya eworu ọkpobe ụnwù-isensu dokubegbaa ogiri iya ogiri iya ono; g'ọ bụru iphe, nọ-chiru ẹnya buredi ono; teme g'e gude iya gweeru Chipfu ngweja, aakpọ ọku. ⁸ Iphe, bụkpoo eswe-atuta-unme, a-nwuta anwuta be Eronu e-dozije iya l'iphu Chipfu. O bụru ndu Ízurelu be ọ-ndu emejeru iya; g'ọ bụru ọgbandzu, a-nọ jasụ l'ojeje. ⁹ Buredi ono bụ Eronu yee oshilokpa iya nwe iya. G'ephe ndujekwa l'ẹka du nsọ taa ya; kele ọ du nsọ shii; kele ọ bụ oke iya nkephe le ngweja, aakpọ ọku anụ Chipfu jasụ l'ojeje.”

Onye pfubyriru ẹpha Chileke

¹⁰ O nweru nwoke, ne iya bụ onye Ízurelu; nna iya bụru onye Ijiputu; ephe le ndu Ízurelu swiru. A nonyaa; ọgu daru ephe l'onye Ízurelu l'ẹka ephe kpoberu ụlo-ekwa phe. ¹¹ Onye ono, ne iya bụ onye Ízurelu ono wata epfubyishi ẹpha Chipfu. A kputa iya kpujeru Mosisu. Ẹpha ne nwata ono bụ Shelomotu; nwada Dibiri onye bụ oshilokpa Danu. ¹² A kputa iya je atụ-chia kwaberu Chipfu g'ọ karu phe iphe, bụ uche iya.

¹³ Tọbudu iya bụ; Chipfu bya epfuru yeru Mosisu sụ iya: ¹⁴ “Kputa onye ono, pfubyriru ẹpha mu ono kpufu l'azụ ẹka unu kpoberu ụlo-ekwa unu. G'iphe, bụkpoo ndu nūmaru teke oopfubyi ẹpha mu ono byabẹ iya ẹka l'ishi; g'ọha wulihu woru iya tugbua le mkpuma. ¹⁵ Sụ ndu Ízurelu: Onye pfubyriru ẹpha Chileke iya

bukwa onye obu be iphe-aji iya obu tu-koru l'ishi. ¹⁶ Onye pfubyiru epha Chipfu be eegbu egbugbu. G'oha zefutakwa je atugbua onye obu le mkpuma. Onye obu -buru onye lwaru alwalwa; ozoo l'o bu onye a nwuru le Izurelu; o pfubyia epha Chipfu ono; g'e gbua onye obu egbugbu.

¹⁷ "Onye gburu nemadzu ibiya; g'e gbukwaa yebedua. ¹⁸ G'onye gburu iphe-edobe onye ozo pfukwaa ugwo iya. Ophu dzu ndzu be oo-gude dochia ophu nwuhuru nu.

¹⁹ "Onye mebyiru nwibe iya ibe ehu lanu; bukwapo g'ee-mebyi yebedua ibe ehu lanu. ²⁰ Onye gbajiru nwibe iya okpu g'a gbajilatakwa iya pho. Teke o bu enya be o meru; o pyahu onye obu; g'e mekwapho ge nkiya pyahulata. Teke o bu eze be o chikwofuru onye ono; g'e chikwofulatakwa iya pho eze. Oo g'o mekaberu onye ozo iphe, bu g'ee-mekaberu iya. ²¹ Onye gburu anu nemadzu ibiya; g'o pfukwaa ugwo iya; teke o bu l'oo nemadzu be o gburu g'e gbukwaa yebedua. ²² Ekemu-a du swiru ndu a nwuru anwunwu le Izurelu; yee ndu lwaru iya alwalwa. O kwa mbedua bu Chipfu; bya aburu Chileke unu."

²³ Mosisu pfuchaaru iya ndu Izurelu; ephe kputa onye ono, pfubyiru epha Chipfu ono; kpufu l'azu aka ephe kpoberu ulo-ekwa phe je eworu iya tugbua le mkpuma. Ndu Izurelu shi nno mee iphe, Chipfu turu Mosisu ekemu g'ephe mee.

25

Apha-atuta-unme (Dit 15:1-11)

¹ Tɔ̀budu iya bụ; Chipfu bya epfuru yeru Mosisu l'eli úbvú Sayinayi sụ iya: ² “Wakwa iphe, ii-pfuru yeru unwu Ízurelu baa; sụ p̄h̄e-a: Teke unu bah̄erupho l'alì ono, mu abya anụ unu ono; unu haj̄ekwa alì ono g'ò n̄ọ́oru Chipfu apha-atuta-unme. ³ Unu mebeje iphe l'alì unu apha ishii; unu ak̄ochaje opfu-vayinu unu ak̄ocha apha ishii; w̄o akpuru iya. ⁴ O -be l'apha k'esaa l'a haa alì ono g'ò tuta unme. Ono bụ apha-atuta-unme k̄e Chipfu. Unu be mebekwa iphe l'alì unu apha ono; ophu unu ak̄ochakwa opfu-vayinu unu. ⁵ Unu te ejekwa akpata iphe, daru ẹda. Teke vayinu, e mechaduru emecha m̄iru amimi; unu ta aw̄otakwa iya; noo k̄ele apha ono b̄e alì ono atuta unme. ⁶ Iphe, alì m̄itaru l'apha k'ono, alì atuta unme ono; a-buru nri unu; waa k'ohu unu; waa ndu-ozì, unu butaru ebuta; m̄e ndu lwaru alwalwa, bu l'echilabọ unu. ⁷ O kwapho iphe, daru ẹda l'alì ono a-buru nri iphe-edobe unu; waa anụ-egbudu, bu l'alì unu.”

Apha-ehu-utso

⁸ “Unu ḡa apha-atuta-unme ḡta apha esaa; mbu apha esaa esaa mgbo esaa. Apha-atuta-unme esaa ono bụ iphe, ọo-dụ bụ apha ukporo labo l'apha tete. ⁹ Onwa k'esaa -d̄uepho l'abalì iri, bụ iya bụ eswe-apfu-ugwo-iphe-eji; l'i zia g'e gbua opu gude jedzuru l'alì unu ono. ¹⁰ Unu edoo apha k'ukporo ẹbo l'iri nsọ; unu epfua

g'onnyemonye l'alì ono mgburugburu nweru on-wiya. Apha ono a-buru unu apha-ẹhu-utso; noo teke onyenonu a-la alì iya; mbụ l'onyenonu a-lapfu ndibe iya. ¹¹ G'apha k'ukporo ẹbo l'iri ono bukwaru unu apha-ẹhu-utso. Unu ta akobekwa iphe l'alì; ophu unu ejejekwa akpata ophu daru ẹda l'apha ono; ọzoo ophu mītaru lẹ vayinu, a kochaduru akocha. ¹² Eshinu apha ono buru unu apha-ẹhu-utso bẹ unu e-dobe iya nsọ. Ọo iphe, daru ẹda l'alì ono bẹ unu e-ri l'apha ono.

¹³ “O -rwua l'apha-ẹhu-utso ono; g'onnyenonu lakwaa alì iya. ¹⁴ Ọ -buru l'ọ duru iphe, i reru nwibe ngu; ọzoo l'ọ duru iphe, ì zutaru l'ẹka nwibe ngu; unu mekwaa ya g'ọ tọ dū onye e-ri nwibe iya urwu. ¹⁵ G'ii-gudeje zūa nwibe ngu iphe, bụ: a -gbẹ lẹ g'a bocharu obo-iphe apha-ẹhu-utso. Mbụ l'ọo g'ọo-nọ-beru l'aakpata iphe, ẹ meberu l'alì bụ g'oo-gude ree ngu iphe, ìizu iya. ¹⁶ Teke ọ bụ l'apha a-dū igwerigwe nwua tẹme l'ọo rwua apha-ẹhu-utso; aswa alì obu aha shii. Teke ọ bụ l'apha habe nwahabe l'i gbuzeta aswa iya; noo kele iphe, ìizu ele ẹnya iya gubedua l'azū azūzū bụ iphe i-meta l'alì obu. ¹⁷ G'ọ tọ dukwa onye ophu e-ri nwibe iya urwu; ọ chia iphe, unu e-meje bụ g'unu tsuje Chileke unu ebvu. Ọ kwa mbedua bụ Chipfu; bya aburu Chileke unu.”

Iphe, atsu l'ẹhu lẹ k'apha k'esaa ono

¹⁸ “Ọo ya bụ lẹ-a; unu tsojekwa iphe, mu tọru okpa iya sū g'e tsoje; unu emeje iphe, mu tọru l'ekemu; k'ophu unu e-buru l'alì ono; ọ tọ dudu iphe, eme unu. ¹⁹ Ọo ya bụ; g'alì emehuaha iphe,

a koberu iya; unu erijiaha ẹpho; buru iya; ọ tọ dudu iphe, eme unu.

²⁰ “Unu a-jikwanu sù: ‘?Bù ọ́nù bẹ́ anyi e-ri l'apha k'ẹ́saa ọ́bù; m'anyi adudu iphe, anyi kọ́rù; ọ́phù ọ́ dọ́kwapho iphe, anyi kpatarù?’ ²¹ Ọ́lẹ́ mu e-kebe unu l'ọ́má l'apha k'ishii; k'ọ́phù apha ono e-mehu iphe; unu enweru akpuru-iphe, asuru unu apha ẹto. ²² O -be l'apha k'ẹ́sato; unu awata akọ́bẹ́ iphe l'alì. Ọ́ bọ́rù akahù iphe, unu metaru bẹ́ unu a-nọ́dù erì jasù l'apha kẹ́ tete; teke unu a-kpata iphe, unu meberu l'alì.”

Agbafuta iphe, e reru erere

²³ “G'ọ́ tọ́ dọ́kwa onye e-rebujẹ́ alì iya erebu; noo kẹ́lẹ́ alì bọ́kwa mbeḁdua nwe iya. Unubeḁdua bọ́ abyabya bẹ́ unu byaru; ọ́ bọ́rù anunu bẹ́ mu nuru iya unu g'unu buru.

²⁴ “Unu sùbeje iphe, ee-gude agbata alì ono, bọ́ oke alì unu ono l'ọ́phù. ²⁵ Ọ́ -bọ́rù lẹ́ nwune ngu bẹ́ ọ́kpá byaru; k'ọ́phù ọ́ harù alì iya ree; g'onye a-bya agbata alì ono, o reru ono; bọ́kwaru onye yeḁlẹ́ iya bọ́ ọ́kpobe abubu. ²⁶ Ọ́lẹ́ ọ́ -bọ́kwanuru l'onye ọ́bù te nweḁdu onye e-je agbafuta iya nù; obenu lẹ́ yeḁbedua nwewaru iphe k'ọ́phù ọ́o-dù ike gbata iya; ²⁷ g'ọ́ gbakọ́o apha, nwuwaru nù e -shi teke o reru iya; l'ọ́ pfiya onye o reru alì ono ọ́gwọ́ apha ọ́phù o tokọ́ kọ́dù alì ọ́bù; laphu azù l'alì iya. ²⁸ Ọ́lẹ́ ọ́ -bọ́kwanuru l'onye ọ́bù ta amadù ọ́zọ́, oo-shi gbafuta iya; g'alì ono, o reru ono nọ́dukwa l'ẹ́ka onye zuru iya nù jasù l'apha-ẹ́hu-utso. O -be l'apha-ẹ́hu-utso g'onye zuru iphe ọ́bù haa ya; g'onye ono, nwe iya nù ono laphu azù l'alì ono.

29 “O -duru onye reru ụlo-ebubu ịe mkpụkpu, e gude igbulọ kpụ-phae mgburugburu; g’ọ gbatakwa iya l’ime mgbatapha, o reru iya ono. Oo l’ime teke ono be ọo-gbata iya. 30 Ọle ọ -buru l’ọ tọ gbataduru iya jasụ apha gbaru; ọo ya bu l’ulo ono, du ịe mkpụkpu, a kpụ-pheru mgburugburu ono be ee-me g’ọ buwaruro k’onye zuru iya nu; e -shi l’ogbo sweru ogbo. Ọ tọ kufukpokwaa ya nu l’eka l’apha-ehu-utso. 31 Obenu l’ulo, nọgbaa l’oma mkpụkpu, a kpụ-pheduru igbulọ mgburugburu bu g’eemeje oma egu be ee-meje iya. Ephemedia du k’agbata; teme o jee l’akufu onye zuru iya nu l’eka me o -rwua l’apha-ehu-utso. 32 O bekwanu ịe-a; a bya ịe mkpụkpu ịe mkpụkpu ke ndu Lívayi; ụlo, nọgbaa l’oma mkpụkpu, bu nkephe be ndu Lívayi ono a-gbataje teke du phe ree. 33 Teke ọ duru onye zuru onye Lívayi ụlo; ophu onye Lívayi ono adudu ike gbafuta iya; g’ulo ono, e reru ono, nọ ịe mkpụkpu ono, bu phe nwe iya ono; laphukwa iya azu l’eka; noo kele ụlo ndu Lívayi ịe mkpụkpu ono, a nuru phe ono bu iphe phe l’echilabọ ndu Ízurelu. 34 G’ọ tọ dukwa iphe, e-me g’ephe ree ali eka ephe echeje aturu phe; mbu ophu nọ ịe mkpụkpu phe; noo kele ono bu okiphe phe jasụ l’ojeje.”

Ejie ndu ukpa ugwo

35 “O -buru l’onye Ízurelu ibe ngu be ukpa byaru; ophu ọ duedu ike azu onwiya l’obutobu ngu; yejeru iya eka egube ono, eeyejeru onye lwaru alwalwa; ozoo onye byaru abyabya ono; k’ophu oo-bukube ngu g’o bukube ngu. 36 Ta

natakwa iya ntukwase; o chikwa g'i tsu Chileke ngu ebvu; k'ophu nwune ngu ono e-bukube ngu g'o bukube ngu. ³⁷ Te jiekwa iya okpoga su iya g'o tukwaseru ngu iya iphe; ophu i lekwa enya urwu le nri, i nuru iya. ³⁸ O kwa mbedua bu Chipfu; bya aburu Chileke unu, bu onye dufutaru unu l'ali Ijiputu ge mu nu unu ali Kénanu; teme mu aburu Chileke unu."

Aha ohu g'o nweru onwiya

³⁹ "O -buru l'onye Izurelu ibe ngu, gu l'iya bu obutobu be ukpa byaru; k'ophu o woru onwiya ree ngu; be mekwa iya g'o jejeru ngu ozi g'ohu. ⁴⁰ Oo g'iimeje onye i beru ozi; ozoo onye byaru abyabya bu g'ii-me iya; l'o jeeru ngu ozi nno jasu l'apha-ehu-utso. ⁴¹ O -rwua teke ono l'i haa ya; mekpoo unwu iya; l'o laa lapfu ndibe phe; lapfu okiphe nna iya. ⁴² Kele eshinu ndu Izurelu bu ohu nkemu, mu shi l'ali Ijiputu dufuta be e tee redu phe g'ephe buru ohu. ⁴³ Ta dukwaru onye Izurelu ibe ngu ehuka; l'i tsujekwa Chileke ngu ebvu. ⁴⁴ Ge ndu unu a-gbaje ohu; unwoke me unwanyi; bukwaru ndu shi l'ohozo, no-pheru unu mgburugburu. Nokwa ndu unu a-gbaje ohu bu ono. ⁴⁵ Ndu ozo, unu a-gbajefua ohu bu ndu byaru abyabya, unu l'ephe tukoburu; ozoo ndibe ndu ono, unu l'ephe tukokwapho buru ono, bu ndu ephe no l'ali unu nwushia. Unu -gbaa phe ohu; unu enwowa ru phe ro. ⁴⁶ Ndu k'ono be unu e-me g'ephe buru okiphe, unu ketaru unwu unu, l'etso unu l'azu; g'ephe keta phe g'ephe buru ohu phe jaswaruro. O

-be l'unwune unu, bu unwu Ízurelu; unu ta adukwaru phe ehuka.

⁴⁷ “Ọ -buru l'onye lwaru alwalwa; ọzoo onye byaru abyabya, unu l'iya tuko buru nonyaru bya enweru iphe; onye Ízurelu ibe ngu, yee ya bukube -daa ukpa bya eworu onwiya ree onye lwaru alwalwa ono, bukube ngu nu ono; ọzoo l'o woru onwiya ree abubu onye ono, lwaru alwalwa ono; ⁴⁸ e -rechakpo ya nu be agbafutale iya-a; onye lanu l'ime unwune iya agbafutakpo ya. ⁴⁹ Ge nwune nna onye obu; ọzoo nwa nwune nna iya; ọzoo onye ọzo, ephe l'iya bu abubu jekwaa agbafuta iya. Ọ -buru l'onye obu nonyaru bya enweru iphe k'ophu ọo-du ike gbafuta onwiya; g'onye obu gbafutakwa onwiya. ⁵⁰ G'onye reru onwiya; yee onye zuru iya nu; nodukwa gbakoo maru apha ole, du nu; a -gbẹ l'apha onye obu reru onwiya jasụ l'apha-ehu-utso. G'a gbẹ l'iphe, onye o-gburumita ejetaje ujiku lanu; gbakoo okpoga apha, ghuduru nu; karu iya iphe, ọo-pfu gude gbata onwiya. ⁵¹ Ọ -buru l'apha, ghuduru nu hakwadu shii; g'onye ono keta okpoga ono, o shi gude ree onwiya ono ophu kwata ka shii pfua gude gbata onwiya. ⁵² Teke o -bukwanu l'apha, ghuduru nu habewa nwahabe g'o rwua l'apha-ehu-utso; g'ephe l'iya gbakoo ya; g'o pfua g'apha ole, ghuduru nu ha gbata onwiya. ⁵³ G'e mejekwa onye ono g'eemeje onye-ozu, e butaru ebuta aphagapha. G'e leta enya g'onye ono, o no l'eka ono ta adukwaru iya ehuka. ⁵⁴ Ọ -buru l'a taa gbafutadu iya l'uzo, du egube ono; g'a hakwaa

yẹe unwegirima ibe iya me o -rwuepho l'apha-
ehu-utso. ⁵⁵ Noo kele ndu Izurelu bu ohu mu.
Epho bu ohu mu, mu dufutaru l'ali Ijiputu. O
kwa mbedua bu Chipfu; bya aburu Chileke unu."

26

*Obunggo, ee-bu onye emeje iphe,
a suru g'o mee*

(Dit 7:12-24; 28:1-14)

¹ "G'o to dukwa agwa; ozoo ntekepe, a pyiru
apyipyi; ozoo mkpuma, a kpoberu g'itso, unu e-
dobe l'ali unu. Ophu o dukwa mkpuma, a pyiru
apyipyi, unu ee-dobe l'ali unu wata abaru aja. O
kwa mbedua bu Chipfu; bya aburu Chileke unu.
² Unu dobeje eswe nkemu, bu eswe-atuta-unme
iche; unu akwabeje ulo mu, du nsọ ubvu. O kwa
mbedua bu Chipfu.

³ "Unu -nodu atukojewa iphe, mu toru okpa
iya su g'e tsoje etso; bya emekota iphe, mu suru
g'unu mee; ⁴ be mu a-noduepho edzeru unu
mini l'orwuberu iya; iphe, e meberu l'ali emehu
emehu; teme oshi, no l'egu amishigbaa mebyi
iya. ⁵ Iphe a-nodu emehuru unu shii; k'ophu bu
l'unu a-nodu echi ereshi jasụ ogè awọ akpuru
vayinu erwua. Unu egude awọ akpuru vayinu
jasụ ogè emebe iphe l'ali erwua ozo. Unu a-nodu
eri nri eriji epho; unu eburu l'ali ono; o to dudu
iphe, eme unu.

⁶ "Mu e-me g'unu buru l'ehu-guu l'ali ono;
k'ophu bu l'unu a-ze pyakoo; o to dudu onye eye
unu ebvu. Mu emee g'ejo anu-egbudu chihu l'ali
ono; ophu a byadu alwu ogu l'ali unu ono. ⁷ Unu

a-chi ndu ohogu unu gbushia phe. ⁸ Unu -du ise; unu achia umadzu ukporo ise; teke unu du ukporo ise; unu achia unu ukporo l'ise. Unu egude ogu-echi unu gbushia ndu ohogu unu. ⁹ Mu a-nodu eleta unu enya; mee unu g'unu zua azuzu kabaa l'otu. Ogbandzu mu l'unu be mu e-me g'o nguru anguru. ¹⁰ Ozo bu l'unu e-rije akahu iphe, unu kpataru jasu unu akpata k'ophuu; mbu a -nonyaa unu achishiaha akahu iya k'ophu eewobata k'ophuu. ¹¹ Teme mu eworu ulo-ekwa mu kpobe l'echilabo unu; ophu unu adubaedu mu ideyideyi. ¹² Mu a-nodu ejephe l'echilabo unu; mu aburu Chileke unu; unu aburu ndibe mu. ¹³ O kwa mbedua bu Chipfu; bya aburu Chileke unu, bu onye dufutaru unu l'ali Ijiputu; g'unu ta abuheru ohu ndu Ijiputu. Mu mebyiwaa ike ono, ephe shi gude mee g'unu buru ohu phe ono; shi nno mee unu g'unu phafuta ishi."

*Aphu, aa-nu onye te emejedu iphe,
a suru g'o mee
(Dit 28:15-68)*

¹⁴ "Ole o -buru l'unu ta ngabeduru mu nchi; ophu unu emedu iphe, mu suru g'unu meje g'o ha; ¹⁵ mbu o -buru l'unu ta agubeduru iya iphe; mbu iphe, mu toru okpa iya su g'e tsoje; ozoo l'obu unu woru iphe, mu turu l'ekemu mee; o du ideyideyi; k'ophu bu l'unu te emejedu iphe, mu suru g'unu meje g'o ha; unu eshi nno woru ogbandzu, mu l'unu gbaru mebyia; ¹⁶ bukwa iphe, mu e-me unu bu owa: Mu e-me ge ndzu-agugu rwuta unu; teme ukwaranta eseahaa unu; yee ejo ehukwu, e-woru unu enya mebyia;

ndzụ unu ala ke mmanụ. Unu -kọbe iphe l'alị l'ọburu iphe-mmanụ; noo kele ọo ndu ọhogu unu e-mechaa ria ya. ¹⁷ Mu a-gharu unu iphu le ke njo; ndu ọhogu unu alwu-kpee unu l'ogu. Ndu unu du ashị a-buru ndu-ishi unu; unu agbaaha ọso teke adudu onye achị unu.

¹⁸ “O -buru le mu mechaaru unu nno; ọphu unu angabeduru nchị; mu anubaa unu aphụ iphe-iji unu ono ọphu ha g'owa mgbo esaa. ¹⁹ Mu e-me g'unu kubuhu onwunu; mbụ mee akpaminigwe, unu vu l'ishi g'ọ du gbọrojii ge mkpuru-kpu-igwe; bya emee alị, unu zoberu okpa g'ọ ha ngerengere g'onirubvu. ²⁰ Okpehu, unu gude koo alị a-buru unu ke mmanụ; noo kele alị ta aduedu iphe, oo-meta; teme oshi-omi, pfuru l'alị ono ami-buhu mebyi.

²¹ “Teke o bu l'unu emekwapho iphe, mu suru g'unu te emejeshi; k'ọphu bu l'unu ta angakwaru mu pho nchị be mu e-gude iphe-ehuka, ka iphe-iji, unu meru mgbo esaa; nua unu aphụ. ²² Mu a-chiru anu-egbudu ye g'ephe bya adakaa unu; bya atuko unwegirima unu nakota unu l'okpehu; tuko iphe-edobe unu mebyishichaa; mee; unu ta abaedu ishi; eze gbororo unu adabyiru iphoro.

²³ “Teke mu mechakporu unu iphemiphe ono; ọphu unu agbanwekwarupho; unu nodu emekwapho iphe, mu suru g'unu te emejeshi ²⁴ be mu e-mekwapho unu iphe, mu tege emedu unu; mbụ le mu a-nu unu aphụ iphe-iji ono, unu eme ono mgbo esaa. ²⁵ Mu a-ha g'ogu dapfu unu; gude iya gwata unu ugwo ogbandzu

ono, unu mebyiru ono. Unu -dzukọbeepfo l'oma mkpukpu unu; mu emee g'ejo iphe-ememe dapfu unu; shi nno woru unu yee ndu ọhogu unu l'eka. ²⁶ Teke mu gbuchiru unu ọzo, eeshije akota nri ono; be unwanyi iri a-duje ike ghekota buredi g'unu ha l'ovokoku lanu. Epehe -ghechaa ya; epehe egude iphe, eegudeje atu erwa iphe keeru iya unu. Unu -richaa ya; egu aguroo unu l'eka ọogu unu.

²⁷ "Ole ọ -buru le mu mechaaru unu iphemiphe ono; unu nodu emekwapho iphe, mu suru g'unu te emeshi ²⁸ be mu e-gude ehu-eghu mee unu iphe, mu tege emedu unu; mbu l'oo mbedia l'onwomu e-chi unu iphe mgbo esaa k'iphe-eji, unu eme. ²⁹ Noo teke unu a-wata eri anu unwu unu unwoke; mbu richaa ria anu unwu unu unwanyi. ³⁰ Mu e-mebyishi eka unu agwaje iphe; bya enwutsushia oru-ngweja eka unu akpoje unwu-isensu oku. Mu eworu odzu unu tukaa l'eli nshi unu ono, buhukwapho odzu l'onwiya ono. Unu adu mu pho ideyideyi l'obu. ³¹ Mu emee mkpukpu le mkpukpu unu g'ọ buru iphe, dabyigbaaru iphoro. Mu emee ulo unu, du nso g'ọ buru okorobo ulo. Teke ono be mkpo ngweja, unu gweru ta abyaedu adu mu ree. ³² Ali ono be mu e-me g'ọ buru ochobu; k'ophu bu le ndu ohogu unu, bu ndu e-mechaa buchaa ya nu be ọo-du biribiri. ³³ Ozo bu le mu a-tuka unu nanunanu l'ali ndu ohozo. O buru ogu-echi be mu a-mita gude tsoru unu. Ali unu adabyiru iphoro. Mkpukpu le mkpukpu unu abukotaru ochobu. ³⁴ Noo teke ehu a-wata atso ali ono le ya atuta unme; mbu teke ono, o dabyikporu

iphoro; unubèdua nòdu l'alì ndu òhogu unu ono. Teke ono bè alì ono a-nòdukpoepo ete ẹswa lẹ ya atùta unme. ³⁵ Teke ono, alì ono dabyiru iphoro ono bụ unme bè ọotuta; kẹle o to shidu atùtajekwadu unme l'apha-atùta-unme unu teke unu shi buru iya.

³⁶ “A bya lẹ ndu ọphu ghuduru nụ l'echilabọ unu; ndu k'ono bè mu e-me g'ẹphe dụ ogozi l'ime obu phẹ l'alì ndu ọhogu phẹ; k'ọphu bụ l'ẹkwo, a nmaru yigayiga l'e-me g'ẹphe ye ọkpa l'ọso; gbalaa gẹ ndu e gude ogu-echi achi. Ẹphe adaa l'ẹbe adu onye achi phẹ ọso. ³⁷ Ẹphe e-vukotajẹ nwibe phẹ daa dapyabẹ phẹ gẹ ndu e gude ogu-echi achi l'ẹbe abụ l'ọ duru onye achi phẹ nụ. Ọphu unu adubaedu ike apfuru l'iphu ọhogu unu. ³⁸ Unu a-nwushihu l'alì ndu ọhozo. Ọ buru alì ndu ọhogu unu e-ri ishi unu. ³⁹ Teme nwa ndu ọphu phoduru nụ l'echilabọ unu bè a-nodu eyifu eyifu l'alì ndu ọhogu unu. Ọ buru ejo-iphe, ẹphe meshiru; waa ọphu nna phẹ oche phẹ meshiru bè ẹphe e-gude yifu ono.

⁴⁰ “Ọle ọ -buru l'ẹphe pfushiru ejo-iphe, ẹphe eme; yẹ ejo-iphe, nna phẹ oche meshiru; mekpoo emeswe, ẹphe mesweru mu; yẹ ememe, ẹphe emeje iphe, mu sụru g'ẹphe te emeshi, ⁴¹ bụ iphe, meru; mu mee phẹ iphe, mu tege emedu phẹ; chiru phẹ jeye l'alì ndu ọhogu phẹ. Ọ -buru l'ọkpoma phẹ ono, ejo-iphe jiru ejiji ono bè ẹphe e-woze alì; bya apfua ụgwo ejo-iphe, ẹphe mekotaru; ⁴² bè mu a-nyatakwa-a ọgbandzu mu lẹ Jiékpọ; yẹ ọgbandzu mu lẹ Áyizaku; mu anyatakwapọ ọgbandzu mu

lẹ Ébirihamu; nyatakwaphọ alì ono. ⁴³ Obenu l'alì ono bẹ ẹphe a-ha g'ọ dabyiru iphoro; gude ẹhu-utso nyaa ọku. Noo teke ẹphe a-pfụ ụgwo ẹjo-iphe, ẹphe meru; noo kele ẹphe ta adudu iphe, ẹphe guberu iphe, mu turu l'ekemu; wafua l'ẹphe woru iphe, mu toru ọkpa iya sụ g'e tsoje mee; ọ dọ ideyideyi. ⁴⁴ Oke g'ọ dẹhabe bẹ teke ono, ẹphe a-nọdu l'alì ndu ọhogu pẹ ono bẹ mu ta ajikakwa pẹ; ọphu mu edobekwa pẹ gẹ ndu dọ ideyideyi; ke gẹ mu mebyishikọta pẹ kpamu; mebyia ọgbandzu mu l'ẹphe; kele ọ kwa mbedua bu Chipfu; bya aburu Chileke pẹ. ⁴⁵ Oke mu e-gude iswi ẹhu pẹ nyata ọgbandzu mu lẹ ndu ndiche pẹ, bu ndu mu shi l'alì Ijiputu dufuta l'ataphu ọhamoha; k'ọphu mu a-buru Chileke pẹ. Ọ kwa mbedua bu Chipfu.”

⁴⁶ Ono bu iphe, Chipfu toru ọkpa iya sụ g'e tsoje; waa iphe, ọ turu l'ekemu; waa ekemu, Chipfu turu dobe l'echilabo ẹphe lẹ ndu Ízurelu l'eli úbvú Sayinayi. Ọ buru Mósisu bẹ ọ nuru iya g'ọ nọ pẹ.

27

Ekwe ukwe emeru Chipfu iphe

¹ Tọbudu iya bu; Chipfu bya epfuru yeru Mósisu sụ iya: ² “Pfuaru unwu Ízurelu; sụ pẹ-a: Ọ -buru lẹ nemadzu rifuru angụ lẹ ya e-woru nemadzu nọ Chipfu; g'ọ pfukwaa ụgwo l'ishi onye ọbu:

³ “Ọ -buru nwoke, nọwaru a -gbẹ l'ụkporo apha rwua ụkporo apha ẹto; bẹ iphe, aa-pfụ l'ishi iya bu mkpọla-ọchaa, ẹrwa iya dọ ụkporo

shẹkelu labọ ẹ shẹkelu iri. G'ọ bukwaru iphe, eegudeje atù ẹrwa iphe l'eze-ulo Chileke bẹ eegude t̄a ya.

⁴ “Ọ -buru nwanyị; bẹ iphe, aa-pf̄u l'ishi iya b̄u mkp̄ola-ọchaa, ẹrwa iya d̄u ụkporo shẹkelu ẹ shẹkelu iri.

⁵ “Ọ -buru nwokoro, n̄oru a -gbẹ l'apha ise jas̄u l'ụkporo apha; bẹ iphe, aa-pf̄u l'ishi iya b̄u mkp̄ola-ọchaa, ẹrwa iya d̄u ụkporo shẹkelu; ọ -buru nwanyị; iphe, aa-pf̄u l'ishi iya ab̄uru mkp̄ola-ọchaa, ẹrwa iya d̄u shẹkelu iri.

⁶ “Ọ -buru nwata kẹ nwoke, n̄oru a -gbẹ l'ọnwa lan̄u jas̄u l'apha ise; bẹ iphe, aa-pf̄u l'ishi iya b̄u mkp̄ola-ọchaa, ẹrwa iya d̄u shẹkelu ise. Ọ -buru nwata kẹ nwanyị; iphe, aa-pf̄u l'ishi iya ab̄uru mkp̄ola-ọchaa, ẹrwa iya d̄u shẹkelu ẹto.

⁷ “Nwoke, n̄o-ghataru ụkporo apha ẹto b̄u mkp̄ola-ọchaa, ẹrwa iya d̄u shẹkelu iri l'ise bẹ aa-pf̄u l'ishi iya; teke ọ b̄u nwanyị l'a pf̄ua mkp̄ola-ọchaa, ẹrwa iya d̄u shẹkelu iri.

⁸ “Ọ -buru l'onye ono, riburu anḡu ono bẹ akpa nri; k'ọphu b̄u l'ọ t̄o d̄udu ike apf̄u iphe, a suru g'ọ pf̄ua; g'ọ duru onye ọbu, o riru anḡu iya ọbu; dujeru onye uke. Onye uke ono elee ya ẹnya k̄ooru iya iphe, ọo-pf̄u. Ọ buru g'ike onye ono, riburu anḡu ono habe b̄u g'ee-gbuberu iya iphe, ọo-pf̄u.

⁹ “Teke ọ bukwanu l'ọo an̄u bẹ nemadz̄u gude bya an̄u Chipfu iphe ngweja; mb̄u an̄u ọphu gbaru g'an̄u iya Chipfu; iphe, bukpo o an̄u, a n̄uru Chipfu ẹgube ono d̄ukotakwa ns̄o. ¹⁰ G'ọ to wotakwa an̄u ọzo dochia ẹnya iya; g'ọ to wotakwa an̄u ọzo ka ẹji; ọzoo ọphu ka ree gude

gbanweta anụ k'ono, o riburu angụ l'ọo-nụ ono. Ọ -buru l'o gude anụ ọzo je agbanweta iya bẹ anụ ọp̄hu o gude je iya agbanweta; yẹe anụ, o jeru agbanweta tũkoakwa buru anụ, dũru Chileke nsọ. ¹¹ Obenu; ọ -buru l'ip̄he, o riburu angụ l'ọo-nụ bụ anụ, aasọ nsọ; mbụ anụ ọp̄hu e tee gudejedu egweru Chipfu ngweja; g'a kputakwa anụ ọbu kp̄j̄eru onye uke. ¹² G'onye uke ono lee ya ẹn̄ya maru m'ọ dũ ree t̄o ọ dũ ẹ̄ji; ọ buru ip̄he, onye uke ono sũkp̄oerupho g'ọ p̄f̄ua bụ ip̄he, ọo-p̄f̄u. ¹³ Ọ -buru l'onye nwe iya n̄ bẹ ọ dũ g'ọ gbata iya; g'onye ono kee aswa iya ụzo ise wota oke lan̄ tũkwase l'aswa iya p̄f̄ua gude gbata iya.

¹⁴ “Ọ -buru l'ọ dũru onye woru ụlo iya n̄ g'ọ dũru Chipfu nsọ; bũkwa onye uke bẹ ọ dũru ep̄fu l'ụlo ono dũ ree; ọzoo l'ọ dũ ẹ̄ji. Ọ buru ip̄he, onye uke sũkp̄oerupho l'ọo aswa iya bụ aswa iya. ¹⁵ Ọ -buru l'onye woru ụlo ono doberu Chipfu nsọ bẹ ọ dũ g'ọ gbata iya; g'onye ọbu kee aswa iya ụzo ise wota yek̄obe l'aswa iya p̄f̄ua; t̄eme ụlo ọbu abũbaru nkiya.

¹⁶ “Ọ -buru l̄e nemadzũ butaru al̄i-ihe iya n̄ g'ọ buru k̄e Chipfu; g'ee-gude maru ip̄he, bụ aswa iya b̄u ḡe mebyi ip̄he, aa-k̄obe l'al̄i ono habe shii. Al̄i, aa-k̄u-gbu bal̄i, jiru nkweka iri b̄e aswa iya b̄u mkp̄ola-ọchaa, ẹrwa iya dũ ụkporo sh̄ekelu lab̄o l̄e sh̄ekelu iri. ¹⁷ Ọ -buru l'ọo apha-ẹhu-utso b̄e ọ n̄uru al̄i iya g'ọ buru k̄e Chipfu ọbu; b̄uepho ip̄he, a s̄uru g'a p̄f̄ua b̄e aa-p̄f̄u. ¹⁸ Ọle ọ -buru l'apha-ẹhu-utso ghatawaru; t̄eme o ribua angụ l'oo-woru al̄i ono doberu Chileke nsọ; g'onye uke

gụa apha ole, phọduru nụ; teme l'o rwua l'apha-ẹhu-utso ọzo; shi nno karu onye ono iphe, aswa iya bu. Oo ya bu l'ee-gbubota iphe l'iphe, a suru g'a pfa. ¹⁹ O -buru l'onye woru ali ono doberu Chileke nsọ be o du g'o gbata iya; g'o kekwa aswa iya uzo ise woru oke lanu yekobe l'aswa iya pfa gude gbata iya. O -mechaa nno; ali ono abuharuro nkiya g'o shi buru iya. ²⁰ Ole o -buru l'onye ono ta agbataduru ali ono; o woru iya ree onye ọzo; be ali obu kwawaru; ophu o duedu ike gbata iya. ²¹ O -rwuepho l'apha-ẹhu-utso; be ali ono a-duru Chipfu nsọ; o buru ndu-uke be o-du l'eka; eshinu o bu ali, e dobehawaru Chipfu nsọ.

²² "O -duru onye riburu anu anu Chipfu ali, o zuru azuzu, abudu ali iya, shi lenya unuphu ibe phe; ²³ g'onye uke gụa apha ole, phọduru nụ; teme l'o rwua l'apha-ẹhu-utso; shi nno karu onye ono iphe, aswa iya bu. O buru mboku ono be onye ono a-pfu aswa iya obu g'o buru iphe, duru Chipfu nsọ. ²⁴ O -rwua l'apha-ẹhu-utso; g'ali ono laphu azu l'eka onye a zuru iya l'eka iya; mbu onye ali ono bu nkiya gedegede.

²⁵ "G'iphe, bukpo aswa iphe, aapfukpo apfufu bukwaru iphe, eegudeje atu erwa iphe l'eze-ulo Chileke be ee-gudeje tua ya; g'a maru shekelu ole, o du. Erwa shekelu lanu bu ukporo gera.

²⁶ "G'o to dukwa onye a-kputaje anu mbu, vuru uzo waa ekpa ne iya; bya anu g'e doberu Chileke nsọ; kele anu, vuru uzo waa ekpa ne iya bukwa ke Chipfu; m'o bu eswi; ozoo aturu; g'o ha tukoru buru ke Chipfu. ²⁷ O -buru anu, aaso nsọ; g'onye ono pfa iphe, a suru g'o pfa gude

gbata iya; g'o kekwapho aswa iya ụzo ise; wota oke lanu yekobe l'aswa iya ono pfa. Teke o bu l'o to dudu ike gbata iya g'e ree ya onye ozo iphe, a suru l'o bu aswa iya.

²⁸ “Ole g'o duhabe; g'o to dukwa iphe, nemadzu goru nu Chipfu, ee-re erere; ozo gbata iya agbata. Mbu iphe, shi l'iphe, nemadzu nweru enweru; m'o bu nemadzu; ozo anu; ozo ali, bu iya nwe iya; iphemiphe, a goru nu Chipfu dukwaru Chipfu nsọ shii. ²⁹ G'o to dukwa onye e doberu k'egbugbu, aa-gbataje agbata; g'e gbukwaa onye obu egbugbu.

³⁰ “Oke-lanu-l'uzo-iri l'iphe, e metaru l'ali; m'obeta o buru mebyi iphe, a kpataru l'iphe, a koru l'ali; ozo akpuru, oshi mitaru; bukotakwa ke Chipfu; o duru Chipfu nsọ. ³¹ O -duru onye eme g'o gbata oke-lanu-l'uzo-iri nkiya; g'onye ono kekwaa iphe, bu aswa iya ụzo ise; wota oke lanu yekobe l'aswa iya ono gude gbata iya.

³² A bya l'oke-lanu-l'uzo-iri, shi l'eswi; ozo ophu shi l'eghu me aturu; mekpoo ophu shi l'iphe, bu anu, eye ishi l'oka; g'oke-lanu-l'uzo-iri, shi iya nu dukotajeru Chipfu nsọ. ³³ G'o to jejekwa iya enyocha ke ?a maru o du ree to o du eji; ophu o gbakwa iya inwe. A -gbakwanaa ya inwe agbagba ophu; g'ono ye ophu e gude agbanweta iya tukokwa buru iphe, du nsọ; ophu a byadu agbata iya agbata.”

³⁴ Ono bu ekemu, Chipfu tushiru nu Mosisu l'ubvu Sayinayi g'o je anu ndu Izurelu.

Bayiburu Izii
Izii: Bayiburu Izii Bible

copyright © 2014 Wycliffe Bible Translators, Inc.

Language: (Izii)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022

c6885c7c-c550-5b8b-a4fe-4bd714af4f6d